


А. П. ПЫРЯ, Н. М. ТЕРЕЩЕНКО


ТОЛАНГГО КНИГА

Няби часть



УЧПЕДГИЗ • 1939





А. П. ПЫРЯ, Н. М. ТЕРЕЩЕНКО

КНИГА ДЛЯ ЧТЕНИЯ

ЧАСТЬ ВТОРАЯ

ДЛЯ ВТОРОГО КЛАССА
НАЧАЛЬНОЙ НЕНЕЦКОЙ ШКОЛЫ

Утверждено Наркомпросом РСФСР



Едэй книга.

Пэти школахад то. Небяханда, нисяханда
ванерабтё сырнга.

Нисяда ма:

— Пэтиков, хуркавна тоходанан?

— Тюку яля няби классхана тоходана
пяв.

Парумбари книгам тюхулнга.

— Ти, едэй книгами. Сыркарнгади', пад-
вэда сянгок, падта'мида сянгок'.

Небыда, нисяда нюнди' хэван тонгаха'.
Няхарнгэ книгам манэсаладо'.

— Тюку хибя? — нисяда ман'ма.

— Тикы Водопьянов летчик, нгарка
герой. Сиесея аэропланхана няна' турнгась.

Сырнгади', сырнгади', аэропланнгэ сянгок',
красноармеец сянгок. Хардангэ нгарков',
нгарков'. Тикар Москва мар'.

Книгамда тяха' лисдамба пяда.

— Тюку Ленин! Сталин! Великой вождь-
хаюна'.

Нгока падта'мам нисяханда, небяханда
манэ'лабта. Нгока лаханакком тола. Нисяда,
небяда тэри инзеленгаха'.

Нюхунди' нгобо' манзетыхы':

— Пэтикоми' ян похобэй!

Вопрос':

1. Ханяд Пэти мяканда то?
2. Нисяда ха'манга?
3. Пэти ха'манга?
4. Пэти школахад нгамгэм та?
5. Пэти нгамгэм небяханда, нисяханда манэ'лабта-
ба пя?
6. Небяда, нисяда нгамгэ е'эмня Пэтимди' саву'-
лади'?

Водопьянов летчик ваде'мы.

Нгэрм няна нгэвы сер'. Хадан еремява'.
Тасиня хад сюра. Нумда хуна нгэвам,
янда хуна нгэвам хамадита янгу. Лэркабт
сидна' синё талмада.

Молортана помна миндадарев' мингава'.
Хов, синёда малан'й'. Яхам падернгава'.
Маханий хэвхадана' мар' нгадимя.

Яха сэркана аэродром манэ'нгава'. Няръяна флагсавэй хибяри' ну'.

Нгодь' аэропланни мюд тарп'махадани хэвхани октябренок', пионер' то'. Ты хобаха-



на сендевы няхар' нюдякоця пякоцяхад сертавы нюдякоця ханакохона подерада тым та' ни'им'.

— Пыдар „отличноювна“ тир'! — нгацекы' ма'. — Маня' нгани „отличноювна“ тоходанггува'. Пуня' тоб'нанд ватора'мава' манэтар.

Вопрос:

Водопьянов летчикан октябренок', пионер' ха'манза'?



Ямда иле.

Салм. Хаер' пэсьда. Нумда, ямда нгоб-толсаха'. Ямд сылыв'. Хуна хухуртана яда ни нгадю'.

Хов, я хэвхана и' мулкада. Нгамгэхэва париденя нгадимя. Сэврида нялекада'. Тикы няк. Ян пинянгы хэвхананда юдмян сюдбя халя сюмб енара.

Маханяку' сылыв'. Я хунзер' вэбаркыд ёнда'. И'лидо' мунггомби'. Хаерад няю' тэри хаеры'. Тивтер, някар, вэбаркар, халякор, нгани тэнз ид сармикар тяхаринда нгока.

Тикы сармик' помна нюнякуд, нга'нгуцид, паерэкуд, нгани тиртякуд мулкадарнга'.

Нгобо' манзеты':

— Гогарлы, гогарлы, ы, ы, ы...

Нята вади пэртядрем' нга'нгуцяр нго' вэре.

— А'—а'—а'—алдык! А'—а'—а'—алдык!
Сенггбяр тайна.

Сэв пирта яда ид сармикахат ялри иле.

Мани' нго' няданггуни'.

Нумда- хаерако. Хэ'нёко мерця нимнебты. Няканиня сяторэдми' хадаванзь хаяни'. Том тяханя' мадами'. Мерцяда нгули' хэ'на.

Тянёмбоковна ныла'махадани' тыяк па-хакоцям нярхалани'. Янда вар нгуво лабя-хана пес'яни'. Сяторэнгэ нгэдавы мунггдарев' понггани' сят тебернга'.

Яля ямбан и'имня есернгани'. Сяторэнгэ нгока нгэвы. Сяторэнгэ ялриндо' нгарка'. Яляхананда юкад вата то лохокоцям талани'.

Пэвсьнякуна япыка мерцянгэ хая. Есерми' мяртэдани'. Мя'ни' няю' янггэбцани' марнари.

Мякани' тэвыни'. Ханзоць нгаворнгани'.
Нгавора'махадани' халыни' мюмдени'.

Сэратайни'. Хардыта юдмян ватамбой пуд сяторэй хадавэни'.

Тикыни' пухувана нгобкад ёрманзь ядер-нганинзь. Тарем ёрманзь ядермахана колхозва' государственной планм ёльце нядани'.

Задание:

Тасикуна вадета частьда хода':

1. Сяторэй хадабава.
2. Мяканандо'.

Баразби пионер.

Советской яна' нгардахад юно, корова, овца сававна вадабада' сава колхозхана мэнина' Москван то'. Тикы съездхана колхозхана мэнина' юно, корова, овца мандал' сававна вадава е'эмня лаханаць. Тикы съездхана Сталин нява' мэвы.

Нгацеки колхозхана мэна', вэсако колхозхана мэна' юно, корова, овца сававна пэрмамдо' ваде'нга'. Нята пумна нюдяко хасава нгацеки лаханолы'. Тикы лаханана нгацеки хойляннг яхана иленя—Баразби пионер. Яда Кавказм нюбе'нга.

Пионерта колхозхана {мэни 'нядабавам Баразби ваде'ла.

Баразби ма:

— Самляннг суюм,' нгоб' юно суюм вададм. Мал' пионер' нини отливоювна, сававна тоходана'. Мань нгобтарем отливоювна тоходанадм. Таравахана мань нюр-

уд
р-
л-
г'.
а,
а
г-
г'
г-
а
о
а
и
г
т

тей призм ня'мадм. Маня' пионеригэ тамна саваркавна тоходана ватораваць. Тамна нгокаркавна юно вада ватораваць.



— Сян пор?—Сталин ман'ма.

— Сталин нява', няби юта няхар'поми,— пионер ма.

— Ян похобэн!—Сталин ма.

Колхозхана мэна' Баразби вади' пуна пон пеи пейдемби'. Сталин нява' нгобтарем пеи пейдембись.

Сава манзаянда е'эмня Баразби орденхана наградивысь. Тарця орден сававна манзаранарихи' мипи'.

Вопрос:

1. Колхозхана мэна' съездхана нгамгэм вадеца'?
2. Баразби нгамгэм вадеца?
3. Нгамгэ е'эмня Баразбин орденм ми'нга'?

Хэ' сарё.

(Пэдара яхана иленя нгацекы ваде'мы.)

Нюдя нгэвани мальнггана си'ми тудакуманзь нгэдараць.

Пэдаран тэв'махадани тудакодами ма'ладм, тадхава мякани хэсь пяв.



Лэркабт нумда талмадада, хэ' сарёнгэ яльцеда. Сейни хэсь нгарка пя паханд нгамдыв'.

Нгамгэ пиркана тамна сатакувна нгэвакони ниня хэ' яльцеда'.

Нерыта нимня хэ' ту' есабалыд', тарця нгэхэва сэвни хаемларевын.

Пон нись нга' нгэвани ниня марна нгам-
гэхэва хамзедаванонда. Тикы пуна нгам-
гэхэва нгэвахани тебвонда. Мо'навэв'.
Сэвни сэйвы'. Сэвни нгадимгава сарё нгэ-
вадавы'. Хаерта тарпы'. Пяхат тэса, тир-
тякоця' нгопой вэрнядо'.

Нгарка'я пями хэ' тай'мэдо', нгадьбата
синянда якэда ха'е. Сидя хэвни няна пяни
тайдо'ма' тая юседа'.

Паныни са'невы', нгаяхани тадвы'. Нгэ-
вахани тэрв нгадимы, тянёмбовна евонда.

Савами, тудакуни хо'махадани мякани
сюрбыв'. Тэвыв' нга, мяканани хибяхарт
янгговы. Няньдами мэ'махадани печь ни'
танаюв'. Тикында печь юдерт хонараревэв'.

Сиде'махадани сырнгадм. Нгадьбата
нини тудакуни ябцвыдо', нгаворманзь нгам-
тавыдо', мале нгаворманзь мэйдо'.

Мань нгани нив ла'амда', төреюв':

— Нгамгэ хонёдахани нгаворманзь мэда'?

Пыдо' нгани ма':

— Харт нгамгэ хонын? Мерку тая',
нгавор'!

Задание:

Рассказм часть'маңанда тярнгара'.

1. Хэхэ сарё.
2. Хэхэ сарё пуна.
3. Хардаханда салмада.

*Өнедада тибей', паханда тибей',
нзэванда ниня мата минарнга.*



Лев сармик, няби тѣнякоця.

Лев сюдбя сармик вэсэйма, хане я'малъй'. Хов, нгобиггуна сероць иле идей'. Я хоркадѣн ва'ны', ханггулавни'ма, тадхава таханда марнари. Я сармикэця' ханггуртам вѣдекуць пядо'. Вѣдекурманзь туртахат нгули' нгобкартадо' пуй нгудода нида харес'. Я хоркадѣн тюннгани лев тюку'ли нгамъяда.

Тики нята пумна тѣнякоця то, я хоркадѣ ня'авхад нялида вѣре:

— Левков, хуркавна иленэй?

Лев манзь ханада:

— Вэвавна иледэйм'! Харт нгани нгамгэ няни нинди' тюн'?

Тарця вадаха'на тѣняко ма:

— Нгудо маниедм: янд вангган нгока

сава няр тювы, пуй нгу'умнандо' товэр
янггувы.

Задание:

1. Толара': нгопора' вадета вади толабая, нябира'
лев вади толабая, няхарамдэра' тэня вади толабая.

Вопрос:

Хибя серосаркавы: лев серосаркангав, тэняко [серо-
саркангав?

Ниня пинана.

Нгэнко Хэдоконданя тэхэ' хаяха'. Харта
нгани пиняд нгули' сынггоси.

Нгэнко масьню':

— Пихид пинан?

Хэдоко тэри посанангов:

— Нгамгэ пильнзяхамда пилютадамди'?

Пихимд ядцянгганани насимдаб'нани нив
ханггу'?

Миманди' малхана тэхэти' тэвыхы'. Яда
сава нгани тэнгэ тэри лясы'. Неранди' няна
тюндкоця нгади.

Нгэнко масьню':

— Тикы тюндко нихивад ты'ни' нгэва
нгадьванннгабя.

Нгадьда тюндкон нгамгэ пон мимнаха',
та тэвыхы'.

Тикы яхана сэвриди' мэ'нгаха'. Тэнгэ
тэри сававна тахабэковна мэ'.

Тарем сырпати' неранди' няна нгани
пирця тюндкоця нгади. Ты' нгэвангэ тикы

түндкө тяха' енгглы. Таня' тэвъяха'. Түндкө
сидя хэвхана тэнгэ тэри тарку'.

Нер' тяхакуна Хакцяди' я понггана
хаёвы.

Нгэнко тад нерня' сылы'. Таня нгадьбата
тэнгэ васарнга'. Сидя хэвмди' ханз'нгада,



Хакцямда янголкабта. Ихинянда ма: „Хадри'
ты' Хакцями' мание'“.

Нгэнко ма:

— Хэдоко, ты' вэхэраб' төрамд мэ'ир!
Тарцям намдхава Хэдоко тэри са'мярнгалъй'.

— Нгамгэ пинан?

Хэдокоця вэварахама:

— Нгамгэхэд пинанггудмди'? Нюдядм
нгэсадум?

— Сармик то, төред!
Хэдокоця сейнда хэсь нгоб' нгамдадай'.
— Ювэй!
— Ниня пинанов! Вэнекор минго!

Вопрос':

1. Нгацекэхэ' ханя' пяди'?
2. Хэдоко ханзер' посанаса?
3. Нгэнко ханзер' нянда нива пинвам хорнгада?

Тёняко, нюняко.

(Лаханакко.)

Тёняконд, нюняконд поёди' тяхари сава'.
Нгобнгуна тёняко нюнякохонда ма:

— Нюняко, мякани мядоманзь таля'. Сит нгули' сававна мядолабтанггудм.

Хов, нюнякор нянда мят мядоманзь то.
Тёнякор юрм пире. Юртя пенаряв пед хыдян вабтада. Пед хыдымда нюнянда нгыл' нензлада.

— Нгавор', няв, сава няв!

Нюняко пед хыдыхана пыяри тоярнга.
Нянганда нгамгэхэрт ни еребер'. Тёняко юрм тюку'ли нянзада. Нгаворць мале'махаданда нгаворцяда нюняханда ма:

— Тадхава нгаврани валакада.

Тикы яхана нюняко манзь ханада:

— Мань малеюв'. Пыдар нгани' мякани мядоманзь ту'.

Няби яляхана тёнякор нюнянда мят хая.

Нюняко юрм пире. Юртя тюрляв хыдян хамдада.

Тадхава ма:

— Няв, сава няв, тахаби нгавор'.

Тёнякоця тюрляв хыдя сюртё тэри сюра. Ханзеркарт юртя тэва я'мада. Иб' нгэвамда сы'нгадамба пясъты. Нгэвада ни нялэр'. Нюнякор тикы' ямбхана юртя' мал' нгэр-нгада.

Нюнякор нгаворць мале'махаданда нгаворцяда тёняхохонда ма:

— Тадхава нгаврани валакада.

Тёняхо мяканда хая.

Тикы яляхат тёняхор, нюнякор поёди' хонгаха'.

Вопрос':

1. Тёняхоця хибям мядоманзь ханза?
2. Тёняхоця ханзер' нюнямда мядолабтабасада?
3. Нюняко ханзер' тёнямда мядолабтабасада?
4. Нгамгэ нюняко тёняхонданя поёди' хонгаха'?

Задание:

1. Лаханаком толара': нгопора' вадета вади толабая, нябира' тёняхо вади толабая, няхарамдэра' нюняко вади толабая.

2. Лаханаком сидя ян тярнгара', тярмэнда' нюмг' хода'.

Хасьда Икця.

Хасьда Икця мале вэсэйма. Хурка вэсэйм-бата нго' лыданада янггу. Пи' нянанд еб'нанда хуна нин ман' нгани тым нгаблабтаревэн. Ханар еб'нанд ты' понггана сяранггу. Икцяр

янамбоковна тыт нгабт нгылня' табелабтанг-
гуда. Нгули' нгатенанараха нгэнггу. Хуримна
таримна сырта. Харта нгани хуркари пэвдя-
хана сармикамда манэтада. Сармик тэхэ'
тоб' вэвако'явна нгоб' мадланггу'.

Хуркаривна сармикада нгока нгэя Икцяр
сармикахата сананггу'. Сармиканда нянда
санаб' Икцяр ни хунмбанггу'.



Нгобнгуна нарэй' нгэвы'. Икця суюсавэй
яхадехэ'на е. Икця едэй ни'мы ты' вархана
мэна сидя яхадей няна хая.

Нгамгэмбиркана яхадехэ' вэнолыхы'. Икця
яхадехэ' вэнола'ма ня' санай'. Таняна хунанда
сидя сармикар ти нявотыхы'. Икця нявотада-
ха' нерад санай'. Сармикаха' нянда санаяха'.

Тикы яхана Икця няби сармикм нгателнгада,
сармиканд Икця икан тивда нгоб' лакада'.
Икця сярцехэрта ни' сярце'. Тикымбохона
Икця сармикамда сёхот сякалнгада. Сармик
нгэда ё'нга.

Тикымбохона ервда то. Сармикм едада.

Нгадьбянда сава вэнеко сававна пэрць
тара. Вэнеконд сава нгэб' сармикан тым
нин нгабларабтанггу'.

Задание:

Икця нива пинва ям толада'.

*Пин хэб'нанда тетлингэста
парянгэ хан'нга, мят тьюб'нанда
тар' лахацянгэ хан'нга.*

Ёрма.

Нгобнгуна ёрманзь хаява'. Ёлавахана'
яхакохона' тэв'махадана' нгоб' сидя нэкал-
нгава'. Халям хури сававна еремдева'.

Пумбэртява' ма:

Саване, едава' пиреванзь хаю'! Мани'
нгани Ивання няхар' сёбярива' няць нгоб-
тава' нэкалтава'.

Ханя сава'явна понггава' мова'. Нэкалпа
пява', нгамгэ нгэбта нго' понггава' сангго-
воць минга.

Нгано пумбэртява' ма:

— Яв' итя то, понггава' харцабтамба
пяда.

Тарем нэкалпадахана' понггана' нерденя
ян тэвы'. Нгамгэда нгэвна енд'нгэ тин'мана
сахама, понггава' нгосорнгада нгани сембя-
дахартада сэйнггалъяд'.



Тикы яхана нэхэрабцьма' ма'ламбада
нюдяко Якан сылавэв'. Тания нгадьбата нга-
номда та'ля таванзь ит на'амхале.

Пумбэртява' төрей':

— Якэй, нганомд нултад! нэхэрабцьм
пуна ма'лабцакэва'!

Як ватон ни нга'.

— Хар'н татавэй!

Нгаво' пиркана Як нэхэрабцьнда табы'ы'. Тарем панартаханда нгаво' пиркана ит мялкада.

Тарцям манэкава пумбэртява' нгоб' сюрба паныда, хутыда моё'нга, ит пюрцеда. Хурка маня' нго' тая' сюрбына'. Иван нганохонда нгохолмы'.

Пумбэртява' тикы' ямбхана Якм нгэбтенггахаданда сарвадавэда.

Ян тэврада. Нгаво' пиркана Як пыйта сихид, нянда сихид и' мунггамъй'. Тад сылына', понггана' нго'марида яда.

Понггана' нгодьринда сембьядада нгади'. Нганова' Иван тэвравэда.

Пумбэртява' тандая танггамъй', нгобкава ма:

— Хый, нуёртана нгацекы! Пыдар ниданд халына' хая'. Понггава' нго' яебтярнгэ хая. Теда' манэ'нгарва тикында нин нуёртанггу'.

Вопрос':

Нгамгэ ёрмамдо' лэхэрнгада?

*Нгоб' юр' хасава нгыня' ладар-
нга'. Няди юр' хасава нув' ня'
ладарнга'.*

Падта'мавна рассказм сертада'.



Хасава нгацекэхэ' нгамгэм
пэргаха'?



Ханя' хэванзь мэнгаха'?



Ханзер' халям хадабихи'?



Нгамгэм тангаха'?



Хадавы халямди' хибян'
мипиди'?



Семьядо' нгарханда
нгамгэм пэрга'?

Еня.

Хусувэй няби пихина Ябля няка еванзь ядэрнга.

Ябляко хусувэй няканда еванзь хантан-вахана сэкта:

— Няков', си'ми нянанд еванзь хана'!

Хусувэй сэктавахананда някада манзеты:

— Енананув' тарця нинянгэ мэсанангэ, тад нго' нгэсь нго' хонаранггун.

— Янгго, ёльце нив' хонаранггу'!

Нгамгэ сяханггуна някада пебямда мэванзь валыта.

— Ят сидянгэ ехэни'! Нгули' манэ'ивась хуркавна тыд лэтмбаредась, тад нго' ева пиран нгэрен!

Тэхэти' тэвыхы', тет парисе'эмди' нгэд'-яди'. Харта нгани нгули' хэ'нёкоку. Тарем мэнаханди' ирийда нго' тарпы. Нгамгэ пиркана някада нямда хорпа ма:

— Тыд маниен', нгамгэ хадкэна нгэб' си'ми сидеин! Мань лакамбой немгланггув'.

Няда Яблямда сёбя хынггармана вэдеку'-нгада.

Ябля ибедолы'. Хуняна нгацекы' нята понггана манда: „Ти, хуркадм, пи ямбан нидамзь хоню' тыни лэтмба“.

Ибедорманда сер' харта ириян сырнга. Сянад нгоб' яхана ибедормы нгэбта сидя хэвхана мэна ты' тибяридо' ирабты'. Ябляко

тэхэ'на мэвамда юрлада, юрхалтам нема таледа. Лэркабт хибяхава сита тирцьпавонда.

— Сава енёв!

Ябля няканда төрм намда.

— Нгамгэ хадкэ?

Тад юркы'. Сэвда нянггаркарта я'ма. Сэвда сылыд' нга, нумда ся'нянда ялумы, ирий е'эйнгэ хаерако тарпвы'.

Някада тикы яхана писянзь харцэркарта:

— Хэ! Нгамгэраха еня хасава'я!

Жита мядэхэ' нгэсургна.

Сад.

СССРхана иленя народ' саддо' нгока'. СССР иба няна нянэхэвавна сад нгока.

Плодовой пи, мансо вадабабць' ё саднгэ нюмдебина'. Тарем вадабада пи', мансо ниня груша, вишня, слива, смородина, виноград вадюрнга. Тикы тяхамна нгани нгока тэнз фрукты пя, манас вадёдана.

Тикы вадюрта фрукты' тяхари нгамнелы'. Тарця фруктыд хибяри илннгана саць тарана нгамгэ'.

Фрукты вомдавэхэндо' нгаворп' сава. Тикы фруктыхыт консерв сертаби'. Фруктыхыт вареньем пиреби', тырабтамбидо'.

Саднгэ фрукты сававна вадабавандо' е'эмня, нгамнелавандо' е'эмня саць нгокавна тяхасоковна манзара тара. Пянгэ тенева

тиндо' сер' нгамтамба тара'. Пянгэ пыдадо'
пи вомдабадахат лэтрамба тара. Пи' ниня
вадёвы фрукты тиндо' сер' тёмбёковна ха'-
аврамба тара.



Тарця садхана манзаяр нгоко! Нгэрёнанда
фрукты холкава мальнггана нгока сава нгам-
гэм мэнггун.

Вопрос':

1. СССР яхана ханяна нянэвна сад нгока?
2. Садха'на нгамгэ вадёдана?
3. Фруктыхыт нгамгэм сертаби'?
4. Фрукты сававна вадёданва е'эмня нгамгэм пэрць тара?

Нгадыхы пя малик.

Пэдарахана ти яблоко пя вадёдана. Нгоб'
мэва пи вадабада еся сивасавэй пэдаран
то; яблоко пям манэць манзь ханада:

— Хэ', пякоцяконгэ саво, нянани тяхари таралтые'.

Тики яхана ханя тёмбёковна яблоко пя пахакэци нись хаделе' сабкаяда. Тадхава яблоко пякоцям садханда вадёванзь нгамтада.

Няби похона садм-бэртя харёй харм мине товы. Нгамтавэнда илебей пянда маликэци хархана матыда. Пякоцямда матюйнгэ хаевэда.


Тадикахад матюй пянда малм лекабтада, лекабтавэхэнда няби сава яблоко пя маликм таркабта. Тики пуна садмбэртя таркабтавы

пянда хадеро ханя тяхасовна масыда, тади-кахад тохоцякохона манонъяда.

Таркабтавэнда пянда малм сид'няд падалмы пякоцяха' мэйрахая хаеда. Пякоцяда тянёмбовна хануй'ларай'. Тикиринда нго' сензума. Няби пя малм таркабта'ма та соярай'.

Таркабтавы пя маликэця нгани пя тебтм нгэрпа тяхари мер' вадёданалъй', тарем мэнаханда вэбакоцида илеяд'. Таркакоцида нгобпиня няданыд'.

Няхарамдэй понда текавахана пякоця вэбида илехаявыд', ненянгганда паркако-цяхад тырцекада маликэцида тэри падвы-



ляннг'. Морекадана нгэвакэцита ха'аммахава-
дандо' нго'маханандо' нгоднярахако' нгадимя'.

Нгэрё няна нгоднярахакуна' яблоконгэ
вады'.

Яблоко' нгэбто' нго' сеней вадюрмы
ибцяда яблоко то'лаха' ни' нга', ханя няръ-
яхая нгамнелы'.

Тикында яблоко пякоця тин'мана сава
пякоцянгэ хая, нгани садха' маликада хан'ла
пьяйдо', яблокона' пя маликэцяха'на нгока
сава яблоко пям нгадимде'.

Вопрос':

1. Садмбэртя хурка яблоко пям садханда нгамта?
2. Садмбэртя пэдарахад тавы яблоконда пям ханзер'
мэда?
3. Пя ниня хурка яблоко' тяхакуна вадёданса'?
4. Тебдевы пя мал сояра'махад хурка яблоко' вадёдана
пядо'?

Мичурин садхана.

Мичурин юнета садмбэртясь. Самляннг
юкад ватамбой по мэнена серта яебтамби-
дась. Хуркари опыт сертабись. Нгока едэй
тэнз плодм вада. Тикында тяхана тецьдахад
ниня пинна плод тэнз нгадимдембись.

Невхэна Мичуринхана манзара саць санг-
гово'нгась. Парэнгода правительство пыда
манзаямда нгамгэхэртангэ вуньсяда толабю'.
Опыт сертаванда е'эмня есям нись мипю'.
Мичурин нгамгэхэрт няд'мам нись хомбю'.
Хурка крестьянин' е'эмня манзарабта нгод
пыда манзаяда крестьянинха' нись тэвор'.

Валакада кулакри', помещикри' Мичурин едэйвана нгадимдевы плод тэворъядонзь, мэ'эйдонзь.

Советской власть мальнггана Ленин нюрте'э Мичуринм тензибтеда. Советской власть Мичуринан манзаванда е'эмня есям нгэдаара.

Партия, правительство Мичурин манзаям саць нгаркангэ толабидинзь. Есям мипсахама, ямнго' мипсахама. Мичурин няданггодида, тохоламбдида нгокаць. Мичуринан Ленин орден наградангэ ми'мысь. 1935 по' июнь 7 яляхана Мичурин янггумась. Минревэмда серта тохоламбвыда хибиданерня' минредо'.



Иле'мада, манзара'мада марта пыда нюмнанда Мичуринскнгэ нюмдевы.

Нгока сава нгамгэм Мичурин сертась. Мичурин нгока едэй тэнз плодовой пям вадась. Ти нинянгэ мэсана груша пя. Нинянгэ мэсана груша пя нид грушамда ха'авра сиби. Яебтамбвадо' нго' тяхари нензел'ма. Ти соёлёко, нинянда вадёдана вэбангэ нгодя пя вэба. Нгод тарем нгод нинянда вишня нгодя вадёдана. Хусувэй соёлёконда ниня невхэнда сер' сидясянри нгодя вуни вадюр'. Вадюрта нгодянгэ нгока нгэсь пэрнга. Нгодя пяхад, вишня пяхад Мичурин едэй нгодя пям нгадимде.

Ти нгадя, вишня пякоця. Стол ниня нгэда тюрляв нгэсяко мюня вадёдана. Тюку нюдяко пякоця нгарка тебтета нгодяхана талвы. Нюдякоця пякоцяхана нгока я вуни тара'. Нгодя тамбдадо' нгока.

Мичурин садхана тарця яблоко пя' тая'. Нгылнандо' садм лэтмбада' хонё пина'. Тад яблоко пя нид яблоко мантаб'нанда нгэванд тэрвсавэй сидёдан.

Тарця яблоком нгудаха'нанд ня'амбаван харваб'нанд пеед латавна мэ'.

Мичурин садхана нгока нгодя тэнз вадюрнга. Нгодянгэ нгарка', тяхари тебте'нга'.

Лэ'мор' нгодя нгани яхана вадюрта лэ'мор' нгодя ирэ'на тет та нгар. Нгодянгэ тяхари мэё'. Нгаха' минрева яхана ни' вовор'.

Мичурин садхана хуркари сава нгамгэ нгока. Едэй нгодя вадавам манэ'манзь нгани садмбэртя' Мичурин садан ядэрць пэрнга'. Танда хэм' яхана, тецьда яхана, сяхарт ни'ма вадюра'ма яхана едэй тэнз плод вадаба турта садмбэрти Мичурин тохолавы хибя' тохоламбидо'.

Вопрос':

1. Мичурин хибя нгэса?
2. Мичурин революция нерня манзара условида хурка нгэса?
3. Хибя великой садмбэртя манзаям нгарка нгамгэнгэ толасада, хибя нядасада?
4. Мичурин садхана хурка яблоко' тая', хурка лэ'мор' нгодя тая'?

Пахакэцидо'екар тара', маликэцидо'екар тара'.

Невхэна картофельм | яханана' ехэраць. Тад нго' хурка нгэвахартамда ехэраць.

Нгобнгуна помещик газетахана тола. Хов, яво' тяхана картофель танявонда. Тикы яхана юн падаркана картофель сибико тэва. Тадхава нгаворта нгамдэд ват вадёванзь мацибтеда.

Нгаво' малхана сава мэё картофель вадёда пяда. Я сяр' ни' ханя мэкадувна нгамдэ'нгэ лярцор'й'. Мэкад нгамдэд маликэцяда ха'мыд'. Сэракоця маликэцита нго'ма хана нгодяраха тоенана' мандалюйкоця' хай'.



Тикында тоенана нгодярахакоци помещик ма'лайда. Тадхава юркана пирейда.

Пире'махаданда мядондида ма'ла ехэрана нгавонам нгаманзь. Мядондида тодо' нгодярахаковна нэкалмы'. Нгодярахако нянгатот' мойдо', мядондида нгодякораха та'ваба тэри тынрорнга'. Тарця нгэхэва харта нго' нгоб' нгодярахаком нянганда мода. Нгамгэда нгэса? Тикы нгодякуд нгавонае' пилибтари' нивы' нга' нгабтеко нгабтенд. Тикы яхана ненхада латы'. Хуна нгаха'на манзаранахата ма:

— Хаяда', тюку нгабтени пахаё'омнандо' нид'яда', моё'яда'.

Нгамдэдо нид'ядо'. Нгамгэва' нгэса? Я сяр' нгылад нгамдэт паханггана лонггарта то'.

— Тикы лонггартани пире хоркарцюна'. Хоръядо' нгани ёльце нгамнелавы'.

Нята пуна помещик нго' хоръяда, тадхава манзь ханада:

— Хэ', са'ладм нгэвэдэйм! Нгамгэ тад нер' тяхакуна маликада нись яебтамбю' пахаёда нин пире'?

Писякоця, синзевкоця.

(Лаханако.)

Писякоцяр синзевкоцянданя илевэхэ'. Нгобкана я сибикоця ма'ламбихи'.

Тарем ма'алкованди' малхана синзевкор манзь ханада:

— Нуя! Нгока я сэвкэцям ма'лани'. Теда' нгани тярорпа'ни хурка нгэб'нанда?

— Нгэбта нгэя, тяроркани'!

Хов, тярорнгаха'. Нгобпирковна сидян моё'яди'. Нгоб' я сэвкэця вадума.

Писякор ма:

— Тюку я сэвкэця мань е'эйми. Тад нгод няданд нгокаркавна нисядум манзара'. Ям сабкабавы мань нгэ' нидум'. Ям сабкаба'махадани хадахартани е'.

Тарця вадахана синзевкор манзь ханада:
— Янгго, тюку мань яни сибико. Мара'
маньцеян няданд нгокаркавна манзарадамзь.
Я сибико тю'уд лэтрамбинась. Тю'умна
тиртахани тохортани есьмя'.

Понггананди' тэри пыхы'лыхы'. Тарем
мэнаханда пёдалъяха'. Сидя пёднар марнам
пянгаха'. Нгопой тёрди', нгопой иднади'.
Нгули' хуюмгарт нямда пирда'ле я'мада. Ху
выдара сатадамди' пюлнгаха'.

Синзевкор тиртя сармикэця ма'лавы.

Писякор я сармикэця ма'лавы.

Синзевконд пили' мэбетада минлей
тиртя.

Писяконд пили' мэбетада пэдарэй варк.

Сидя я сюдбя нгобт тебнгаха'. Пэдарэй
варк минлемда маханий хунггляхананда
марнимдада. Ладванда сер' я тарабтай'.

Писяко сейда хая. Пя сябт нгыл' лынг-
гарай'. Тикы' ямбхана пэдарэй варк нята
нимня сейда хая. Тэри ёнггэ:

— Писякоми хуна хэбта?

Тикавахана пэдарэй варкар хобамда
нгадаць нявоты'. Сябтко ни' танхалъй'. Пя
сябт нгылна нгамгэхэва туни пенддарев'
маркадаванонда. Туни пендрахам намдхава
тамна сатакувна сейда хэвы.

— Хэ', няни енернга'!

Варкар нерыта нимня нявоты'.

Хардыта туни пенднгэ пэрмэда писяконд
тибя маркадавы.

Тюку падта'мавна рассказм сертада'.



Ханена ханя' минга? .
Хибя хэвхананда мэ?



Ханена нгамгэм манэ'нга?
Нгамгэм серта?



Вэнеко нгамгэм мине?
Сёнзям хибян сити'леда?



Ханена ху салъй'?
Нгамгэм мяканда мине?

Лымбад нго'ма.

Печора яха тю'унякуна нгобнгуна нгацеки' юномдо' пюрманзь хая'. Нгацекэця'-яха' ти пэдара варм нёдангаха'. Тарем сырпати' неранди' няна Матвей ириди' нылана.

— Матвей ирикэй', нганимбоей'! Юноми' нисяр манэс'?

Тики яхана Матвей ириди' ёненахарта масьню':

— Юнори' хавота нгэсонд лымбдан пакал'й'.

— Нгамгэ лымбдан?

— Пыдари' мадим': тюку нгылэва' ям соябтамба я пили' хасуй я нгэвакыва? Сененяна парэнгода мальнгуна нгылэва' ява' лымбад нгэ' нисяв', нгэ таннана нисьнга'. Овцина', юнуна' нюкця' падирнгаць. Нгоб' мэва коровахарт хацеяць пакал'.

— Ханзер' таня' корова пакалци'?

— Ханзеркава тюку явна мимысь, нгаво' пиркана хавота нгэсонд лымбдан сумннгадавысь.

— Матвей ирикэй', тадхава лымбдар ханяна хаяди'?

Совет властясь. Ся'ны нгэбта нго' маркад хибяри' тоць. Нгэсына' хэвхы ям мал' мал'нгадонзь. Тадикахад маць: „Лымбдамда' тырабта тара“.

Лымбадава' яхан тэхэдтаваць.



Лымбдава' тырабтаваць. Теда' тида' ям
сосябтамбива'.

Хурка лахарюдо' мэса'махадандо' нга-
цекеы' невхы лымбавы нимня ирт сюрбыд'.
Матвей иридо' юнонда со сахамлахава юно-
хонда төрей':

— Но-о, тяха' нэкалт!

Тики яхана ям вадаба ямда ертабць-
нггана ерпа пяда.

Тики пуна няхар' по ваера.

Нгоб' тики ям сосябтамба явна юну
е'эйнгэ трактор' ям ерпабцие нюделавыдо'.
Трактор нгобо' хэбта ямда янглё париде
хаебида. Пэдара тяхана нгани тубци' мун',
ихибцие' сярна' яльцедармондо'. Тикид
лымбавы яхана электростанциям сертаби'.

Нгаво' пиркана сидя нгацекеы пэдара
помна тихи' яднгаха'. Неранди' няд Матвей
ириди' ти ядна.

Нгацекэхэ' ма' нихим:

— Матвей ирикэй', нганимбоей'!

— Ханяд сюрбидей'? — Матвей ириди' ма.

— Электростанциям сертабадаха' ядэр-
нганинзь, — мангаха'.

Матвей ириди' ма:

— Электростанциям мер' ёльценггудо'.
Электростанция сюрхалё нгэда нгэсы' колхоз
ялумданггуда. Тики тяхамна ям няелпабцьма'
нгобтарем электром мэць няёланггу. Ти
нгацекэхэ', пыдари' похо'нанди' мэб'нани

маниениди' нема юдэхэртана нинась манэпю'.
Нгаць нгэвани мальнггана ями пя ертабць-
нггана ерпиваць. Тикы та'альна еся' ям
ерпабця' нгадимяць. Еся ертабцьнгга'на'
юде по' торомданаваць. Теда' сыркарнгади',
тракторха'на ява' ерпива'.

Вопрос':

1. Лымбдахад крестьянин' нгамгэ вэвам манэ'паса'?
2. Советской власть мальнггана лымбадм ханзер'
ханадо'?
3. Лымбад нго'ма яда хурка янгэ хая?
4. Лымбад яхана нгамгэм серта'?

Электро.

Нгэсыхынана' электром серта'. Харда-
хана' хурка маня' нго' сидя электро лам-
паком нгыдава'. Ирива' танясь.
Электро лампако манэ'манда сер'
ма:

— Хый, хумбанзи' яебтамбида',
хуркавна нгэбта нго' посекуда'
нихи' парананггу'.

Сертабавандо' мальнггана хур-
ка мань нгод нидамзь пунрю'. Ят яебтам-
бадидо' тяхари нго' нгэлери нгаць. Керосин
ни тара', сера нго' ни тара'.

Лампакохо' ялям нгэдаравандо' сер' мал'
нгокхана' маинаць.

Тикы яхана нисями ма:



— Нгацекые', ти нгамгэн хибярингэ тэвсетыд': яляда яля, янда нгани нгули' янгу. Печьхартм электрохона тодаламбавамбир электрохона хуркари нгавар тэнзко' ханя сававна пинггу'. Юнохона ям ерпахарта ни таранггу', электро ям ерпабцьнггана ям ерпавамбир.

Посекоцянда нгэвакэця париденяком тилибте'ма нгэвы, нгэвакэцянда панггхана нгани ня'морцийкода сарку. Тикы ня'мор'цийкомда маханя' сюрхалебат тур ялумда. Нябимдей тамна сюрхалебат нгобтарем маханя' тур хабтёда.

— Хэ', хадри мэт'!

Тадхава посекоцянда сюрхалев. Тунгэ хабты.

Нгэвакамда сыхылта'мами ямда нгудыхана хорпюлав, лэркабт нгудани таркам нгамгэхэва варцягтеда. Сейкони хэсь төреюв'.

Тёрхани хона нисями хардан тю, пыда тарем ма:

— Нгамгэ төрырнган?

Мань нгани мадм:

— Нгуди'ни тарци хибяхава варебе.

Нисями ма:

— Посекаднамда ха'авравэр харт нгани тумда хабтабам нивэр тал'. Тикыда ти, еся енгглёдавна электро ныхынгэ минга. Нгудамд та'аль минда электро ныхы ладбида. Посеком нёсетар ха'аврамбю', нябинзер' маям сертанггун.

Трактор' станцияхад турта мядонда'.

Колхоз ям ерпаванзь трактор' то'.

Мале ям ерпа пя'.

Нгацекы' пон нись нга' төреяд':

— Сырнгадов'! Ханзер' ям латавна ерпидо'! Тад нго' нгэсь нго' ёрявна ерпидов'!

Манзаямдо' ёльце' махадандо' тракторист' нгацекы' ня яхакон хая'.

Нгацекы' тракторист' ня нгобкана яха



и'имня пюрнернга'. Хурка икана пюрнер-мамдо' ёльце' махадандо' нгацекы' тракторист' нидо' юндалтаба пяйдо'.

— Нявэй', ханяд тосада'?

— Потёмкинм нюбета станцияхад товаць.

— Нгамгэ станция?

— Тэри машинно-тракторной станция.

Таняна хуркари машинана' тая'. Тикы машинаха'на колхоз ё ерпива'.

Маня' машинно-тракторной станция-ханана' толанггобць' падрона' тая', газетана' тая', радио тая, кино тая. Нгани ханянгэхэна театр сянакова' нгод таясеты.

Тракторист' мацьню':

— Нгацекые', маня' няна' тоида'!

Вопрос':

1. Тракторист' нгацекэхэ' ха'манза'?
2. Ханзер' ям тракторхана ерпидо'?

Невхэна.

Нгавна крестьянин' нгаворцява сырахана помещик крестьянинхата няра'мэй нгуво митернга. Помещик нгувода митерпаванда мальнггана мамы:

— Теда' нгани няра'мэй нгумдамда' тадама, нганихина нумда тангомб' тода' сидя яни десятинам ертада'.

Тарем иленахана' нумда нго' юнуйма. Маня' ерпаванда ядана' яха тирт еремя. Янда сяр' нгули' паёрта тоена, соярацавэй. Ерпанана пилибтари' ни нга'. Пэвсюмбы някуна сарё пудабтылы'. Янда сярм хаця' нюламдеда.

Нумда сарюмгава нисями тэри маймби:

— Саво, ханзеркава тюку ями' ертами'. Сыркар', ям ерпабцьми' ябтёйковна юрете-вэдарев' ханзедарнго!

Нгаворъебте'махадани' ханни' нгыл'

юсибтайни'. Юноми' нгумда матормы ян нгаворманзь нгэдарамн'.

Пи' тэдорти' мун' си'ми сиде'. Паныни хынгармана инзеледм.

Нгадыхы вабц нидевонда:

— Нгамгэ мякананд мэнув'? Мань ти сит танаранггудм... Нгатеват сал хана? Мерку тад!

Нгаво' пиркана сидя юно нгэ' мун' пиняна хэвондо'. Ху' нгодь' нумда ялумгава мань хонёдахани нисями помещик хардан хэвы, пий, ханавы юномда хаманзь.



Час ваера пэдюць то. Нгоб' мунзипой ханда хэван нгамды', сидя нгуда' нгэвамда ня'ма вахалъй':

— Ханяд няхар' селкойм хонггудм? Тад нго' нгамгэ е'эмня салкодадм?

Тадикахад нгэвамда парыбтахая хынебтай'. Харта нгани сятаний сэвнда нгылна нгарка'я танзё, ханда паханггана нгани нгаяда ныдэхэй.

Хувы нгавормани нерня нисями нгани помещик харад няна хая, хэбта нго' нгули' пон янгу. Мань ханни хэвхана нгамдэ нгатенадм. Тарем мэнаханда хаерта пакалъй'. Нисями пэдютахавя нгани нго' то.

— Нгаворцан? — ман'ма.

Тикы пуна нянь хобакоцям нэкалнга, нисъ нго' харва' та'вада, тадикахад манзь ханада:

— Мякани' хэхэни'!

Пэвсюмб' яноць мякани' тэвхава небями ярмы. Ябсялмами яля намдвэда.

Помещик нябимдей, няхарамдэй яляхана юнова' нида та'. Тетимдей яляхана юнова' хаманзь небями хая. Таняна хунанда помещик вэ' хардан тювдавэхэнда сякалмэда, мяканда яркосавэй товы. Нгавора'махадана' нисями яляхананда нябимдей помещик хардан хая.

Таня' нисями тэв'махаданда помещикан тарем мамы:

— Ханзер' харван си'ми пэр', нябинзер' поми тэри ваеранггу.

Тарем туець нисями помещик харад нёнэхэ'на нгамдёвы. Пуна тад нга'на помещик намдада нисяни пыда ямда ерпавам. Нисяни юном есяси' ми'манзь табадавэда. Валакада нисяхани мамы:

— Юномд та'махадани нгоб' десятина пелявна ваць ядами ерас'.

Тарцям намда нисями помещик нгэхэ' нгэвамда ха'авравы. Маймба хардаханда то.

Нгаворцявы юнова' сэвта пэва няра'мэй нгуво нгаворманзь лабцей'. Тадхава нисями небяхани ма:

— Мерку', нянькодми та', манзаями ёльцеванзь хантадм.

Тарем харахана нангадя хаця си'ив яля манзаравдавэй тароси' ваера...

Вопрос':

1. Помещик нгамгэ е'эмня крестьянин юном марцада?
2. Хардахананда помещик крестьяниним ханзер' мэсада?
3. Сяха', хурка условие вадець помещик крестьянинан юном ми'нгада?

Парэнгода мальнггана заводхана манзара'мава'.

(Рабочий невхэмда тензибте.)

Машинасавэй е'элрѣда заводхана манзарадамзь.

Ху' 6 часхана завод няю' рабочийнгэ енгглѣсеты'. Нгудито' малхана нгаврато' мандалако минесеты'. Манзара яля хундада 12 часась.

Нгод тарем нгод недвапдава' тянѣсь. Рабочий ирийхана вары тэнггта пэнггабарць 17—18 селкойм недвацеты. Тикы хавна рабочий манзара ватото' тяха' манзара табадамбидонзь.

Манзара саць санггово'нгась. Манзара хардана' мерця нялтамбидась. Тад хад ладбата нгани заводна' мюня манзара ёна' тюку' сыра тохосеты'. Сарѣ нумгана пихина мѣнадарев' нина' сарѣ хавнасеты.

Вопрос':

1. Рабочий' сян час заводхана манзараса'?
2. Нгамгэмбирм ирийхана ня'амбаса'?
3. Хурка условиехэ'на манзараса'?



Владимир Ильич Ленин.

Великой Октябрьской социалистической революция нгарка яля' хахаялтаныд'. Тохолкода не тохолкованда мальннгана Владимир Ильич иле'мам ваде'ла. Владимир Ильич капиталист' ядонгганзу', парэнгода ядонгганзу' трудящийся вадла'мам ваде'нга. Тикы пуна тоходанна нгацекыда юндалтаба пяйда:

— Нгацекые', мякананда' Ленинм вадецетыдо'?

Оля нгудамда ила, тикында ма:

— Нгэцями няни Ленинм нгока вадецетыда. Пыдади Ленинм харта манэ'мэда.

Тохолкода не ма:

— Оля, нгэцяхаданд намдвэмд вадекарт! Хов, Оля вадець пяда. Вадида та вуни'

нга'. Пыда тамна паханзые, нгамгэхэд ва-
дець пир'манада.

Тохолкода не нгани нгод ман'ма:

— Нгэцямд пэвсюмдэхона вададава'
хэтвавзэ хамб'нана' хурка ихинянд тута?

Оляко ма:

— Тута, тута! Муна' тяха' нгули' ни нгэ-
нгуу'.

Оля нися ненэсянда нгод пэвсюмдэхона
школан то. Оля нися нгармбэрка рабочий
нгэвы, самляннгсян юдмбир пода танядарха'.
Нгэвада мале тахарув. Тобъёва лад паным
мэ'мы. Нгацекы' нерад тарп'махаданда ла-
хана пяда:

— Нгэё, Советской республика нгацекы
гражданиннгэ, инзелеван харвавада' нгани
тахаби инзелета'.

Тикы яля' хубтима' — няхар' юкад вата
по' тяхама'. Таня мальнггана наныкодамзэ.
Машинасавэй е'элрёда заводхана манзара-
дамзэ. Нисями янгузь: нисями заводхана
машина хадавадась. Небями, не нями, на-
ныко папами нянани илещь.

Та мальнггана илебцава' вэвась. Ха-
рад нгылы хоркадё лохокохона нгокангэ
илеваць. Лохокона' хэвды ид подабэясь,
сидерона' нгули' нюдяць, тикахартана'
танггас нуна харад хэвдэн сядо'нгаць.
Хаерад сэвко хунахарт лохокохона' нись
ха'мор'. Нгули' лохокова' пэбись, пэвван-

да тяха' индадм нэкалма серта янгуьсь.

Хусувэй яля' ху' мерувна ялумдата тэвва нерня ямб'явна завод муно'ласеты'. Тикы завод му' рабочий манзараванзь ханга. Тар-цям намда мал' нгокхана' санасетынаць. Небява' нгэта ниня мэвы нгэсеты, мертёвна нгаврадава' нгамтасеты. Сахарципой' париденя няньхана сьинзетыва', мер' мервана манзараванзь хэсетыва'. Манзаява' сангово'-нгась, ю' часувна яляхананда манзараваць. Манзара'мава' недьбява' тянёсь. Сертавына' мирена' ервхана' мингаць.

Нгоб' мэва заводханана' рабочийна' ервандо' ядонгганзу' пядонзь. Недьбямдо' нядаванзь хангаць. Ерва' инзелевахартан нись харва'. Заводханана' собранием сертаваць. Понггадана' нгоб' рабочий тарпыць, тарем лаханась:

— Недьбьядава' нядава нгэсонд манзараванзь нина' тарпанггу'!

Инзеленангэ нгоб' сёвна мава':

— Нгули'ян тарцё!

Лэркабт нгопова' төрей':

— Юно маха ниня тина' палытанов'!

Няна' тебна' палытана' ладорабць' пяха'-нандо' сидна' пярыба пя'. Мань няни ладорабцьнганна сидя мэва махани теба. Имбыта'ми мадаранадарев' хая, нгаяханани сидя вэясавэй пюсюраха хаись. Нина' нгани яндаха' сюрбыдаць.

Сидя юдмян нява' сяролава мят талкад-
таць.

Ти тадхава тарем илеваць.

Нгобнгуна нядни нгаркарка рабочий
нями си'ми хала:

— Пэвсюмдёхона мякани тоинэй.

Нянда ти хаядм. Таняна самляннг
янганямбир хибя ма'лёвы. Мал' рабочий'
нгэвы'. Понгганандо' сэвда па'мя ида лата
хибя нгамдёвысь.

Тикы хибяри няна' лахана пяда:

— Пыдра' манггбида', манзара'махатата'
ервра' сепида пандамби. Ервода' питра'-
махаданда' нянанда' сибимда. Капиталист
питаръяда'! Нгобнзер' хынёси' харта' еканда'
манзарада'!

Маня' нгани маваць:

— Нгули'ян тарцё! Нгэхэва нгэись,
ханзер' питартынати'? Екадандо' полиция
ну. Парэнгода нядандо' нята.

Пыда няна' тарем ма:

— Нерня парэнгодам питарпата' тара.
Тикы е'эмня рабочий' нгобнзер' ня'лабато'
тара, харто' партиямдо' сертабато' тара.
Мал' рабочий' народ нгобнзер' пябта парэ-
нгода хэвдэмда нида лэтранггу'.

Хар'н сермнани ими ядэлыць: „Ненэся
тарем лахана“.

— Пуцей намдав: тикы лаханавэва' харта Ленин нгэвы. Ти тарем нюртей мэва Ленинм манэ'нгавась.

Тикы пуна ю' по ваера. Германия ядонганзу' сайнолыдаць. Нгока хибям сайнолван ханаць. Сайнолвахад нгока хибяри нгудаси', нгэси' тось. Нганидо' я сояра'нгэ хаяць.

Си'ми нгод палытанангэ мэць. Нгамгэ е'эмня сайнорцава'? Парэнгода е'эмня, помещик' е'эмня, фабрика ерво' е'эмня сайнорнгаваць. Нгаво' пиркана палытанангэ нгуди'манана' падвы листовка' ядэлыдаць. Тикы листовкаха'на падысь: „Сайнорць нгэвадайда! Буржуй' ядонганзу' пяра!“

Тарця листовкангэ Ленинхад мингаць. Пыда та мальннгана нгани яхана мэсь, рабочийха', палытанаха', крестьянинха' таняд юнм нгэдо'лась.

Няхар' по сайнортахана' ла'амдамба я'малнгава'. Рабочий', палытана' самб'яд', Ленин тохолкованзер' сертадонзь.

Парэнгодахавам иб' питарцадома, власть нюртери трудящийся' нгудаха' ниць ха'ам'. Тикында нгод Временной правительствонгадимясь. Временной правительствотрудящийся' е'эмня таром ни та'. Временной правительствокапиталист' няд нятась. Нгани

ханянгэхэва' Временной правительство няд
нгаць, няби' Временной правительствон ниць
харва'. Маньзъван ихиняни мадамзъ: „Мал'
рабочий' нгобнзер' ниб'нандо' пя' тарода
янгода“.

Тикахана большевик' партиян падываць.
Партия манзаяда нгокась. Хусувэй фабри-
кахана, хусувэй заводхана собрание серта-
биваць, тарем лаханаваць: „Мал' рабочий'
партиянда' хэван нгобня' ма'ланыда'! Вала-
када тандая пёдвам пява“.

Ся'ны нгэбта нго' тарця юнм намдава':
„Нгани яхат Ленин минга“.

Еся сехэры нулнгалван ядабтанггованзь
хаяваць. Таня' тэвына'. Еся сехэры нулн-
галва хэвхырабочийхат, палытанахат пан'нга.

Нгаво' пиркана поезд то. Мал' хибяри'
марнам ила'.

Тарем нгадьбата еся няравы автомобиль
ни' хибяхава танай'.

Сюрхалё пеи пеиба пя'.

Сававна манэдь тикы тантана Ленин
нгэвы.

Манэпа'мани пуна хурка нгока по ваераб'
нгод минханда тумдав.

Автомобиль нид няна' лахана пяда:

— Временной правительствон нёда'
пунрю'. Временной правительство бур-

жуй' няд нга. Властьм харта' нгудахата'
мэра'!

Совет власть нгэбта тара! Германец'
ядонгганзу' сайнорць вуни тара'. Помещик',
капиталист', буржуй' ядонгганзу' сайнорць
тара.

Таня мальнггана мань хар'н сермняни
ими ядэлыць: „Хад нго' тедахава вадум-
дава'. Теда' вождьва' нянана' мэ“.

Ини ядэра'ма серев' нго' хая. Сян ирий
ваерахава рабочий', крестьянин' Временной
правительством питарнгадо'. Помещикхат
ё маръядо'. Завод', я' Советской государ-
ство нгудаха' еремя'. Заводхат капиталист
питаръядо'.

Хар'на' нгудаха'на' мал' ня'ам'махадана'
Ленин серона' тидхалеба сидна' тохолась.
Тикы яляхат трудящийся' совет' серо тид-
халебидо'.

Тикы яляхат нгод ервона' е'эмня нива'
манзара'. Тедахава хибяхарт нянда манзая-
хад ни иле'. Нгобнзер' нгэда илна' е'эмня
мал' манзарава'.

Манзараван ниня харвана нянана' ни
тара'.

Нгацеки' юнра':

— Ленин ханзер' нгопорингэ мал' тарем
сертада?

Рабочий ма:

— Хадри' Ленин нгопорингэ тарем

вунида серта'. Ленин партияданя тикы серм сертада, мал' рабочий классм, мал' трудящийся пумнанда вадлайда. Ленин сехэрэва' табада. Ленин партиям мэйрада. Ленин сидна' манзара тохола. Сидна' тохоламба мамари хан'нгась: таданда таравандида' тоходаная', сававна тоходаная'.

Ленин врагхат лынгарё'ма.

1917 по февраль ирийхана парэнгодам ха'аврадо'. Яханана' капиталист', помещик' ервода хаи'.

Владимир Ильич Ленин богатой питарманзь рабочий тохоламбидась. Тикы е'эмня капиталист' Ленин пумна нёторць пядонзь. Ленин капиталистхат, капиталист' шпионхат лынзерць пядась.

Ленин марад хэвняна рабочий большевик хардан илелъяць. Ленин рабочий панэхэ' емб'яць. Нгэбтода пида, муноциеда пида. Та мальннгана Ленин тумдъита нгули' янгусть.

Рабочий хибя хардахана Ильич илеванда мальннгана тяхари нгокавна манзарась. Пыда книга, газета толабись, харта нгани нгарка книгам падбись. Нянда нида турнгаць. Ленин богатой' ядонгганзу' пёдвавна табекусь.

Тикы яхана мэвы нгэбта Лениним хонг-

гудонзь. Нгобнгуна харданда ерв нгармбэй
рабочий манзь ханада:

— Владимир Ильичм нгувм мадабалва-
хана' хана тара. Таняна Владимир Ильич
нгувм мадабадангэ иленггу.

Нгувм мадабалвада нга'на то тяхана
нгась. Ильич е'эмня соёлёкохот мядеком
серта'.

Пэвсюмб' яноць Ленин то хэван тэвы'.
Халям вадахаламбабць' вадаком, нгувм
мадабабцям нгудаха'нанда минесь. Панэхэ-
вавнанда нгувм мадабададарев' ембдысь.
Таня мальнггана пыда сита хибяхарт нись
тумднгу'. Нгувондалвахана харданда ерв
ню' нгувондаць. Пыдмбоховадо' нгуво яеб-
тамбиць, нгонабиць.

Пэвсюмб' тодабцям нгарылпиць, чайм
пиребиць, кашам пиребиць. Владимир Ильич
падро толабись, манзарась, книгам пад-
бись.

Нумда нгэрёйма. Сарё' ха'мыд'. Тарця
мякана илева серта янгуума. Вэва нумнгэ
хая. Нумда нго' пэвдянгэ хая.

Ильичм нгани ян хана таралъй'.

Нида Ильичм еся сехэрэвна Финляндиян
хана идеяд'. Еся сехэрэвна Ильичм хана
сиби сер' вунься нга'. Хусувэй станцияхана
шпион' таяць. Нгоб' машинистнгэ таравы
большевик паровознда ниня Владимир

Ильичм кочегар миркана ханаван харбе-
лада.

Пи' Ленин нянданя нюдякоця станциян
то. Ильич минханда паровоз ни' танай'.
Паровозм тодаламбабць' ян нульй'. Поезд
манзада. Машинист паровознда сидер' сив-
на сехэрэн сырнга. Ильич поезднда тум
пяхана пятаби.

Поезднгэ пудана станциян тэвоталъй'.
Тикы станция граница хэвхана нгэвы. По-
лиция, шпион' вагон'мана тэри явырнга'.
Пыдо' вагон тала'. Вагон' мюд хибякохортм
пиня' ниць нгэдарамбю'. Минди' понггана
Ленинм пювы'.

Тикы' ямбхана машинист паровозмда
вагонхат янггреда. Машинистар Ленинданя
паровознди' ик' хамдаванзь хаяха'. Таняна
сюрикохоя итамди' пон пэрнгаха'. Валакада
няхарамдэй звонок пуна пуня' салъяха'.
Машинистар мер' мервана паровозмда ва-
гонхата тебдеда. Поезд нерня' варцеда. По-
лицейской', шпион' поезд миндан вагон'
мюд пин санаяд'. Владимир Ильичм тарем
нидо' хо'.

Ильич паровознда тодаламбабць' хэвха-
на ханя тангако ну, паровознда тум пятаби.
Хибяхарт вуни ман', кочегарнгэ тарана ве-
ликой Ленин.

Сян минута нгэсонггана поезд Финлян-
диян тэвы'. Тикы яхана Владимир Ильич
ниня тосакабтада яхана мэ.



Иосиф Виссарионович Сталин.

Кавказ пэ тяхана Грузия яхана, Курам нубета яха вархана Гори мар' таня. Рабочий Виссарион Джугашвили 1879 похона Иосифм нубета нюда соясь, темд нерня' коммунистической партия, рабочий класс сямьян яндер' трудящийся' вождь. Пыда сита Сталин нянгэ нюмдеба пяць.

Сидндет янгганя понда пиркад трудящийся' свобода е'эмня пёда пядась. Пыда революционернгэ хая. Полицияхад, ервхата-то' тале рабочий кружокха' ма'ламба пясь. Парэнгода ядонгганзу', капиталист' ядонгганзу' пёда тараван рабочий тохоламбидась. Харта мантанда нгока мэва забастовка' нермбэригась.

Сталин полициян хоравонггаданда нга-

ни нюбе'мана илесь. Хуркари нюбе „Дэвид
ням“, „Коба ням“, тикы тяхамна нгока ню-
бе нюбе'нгась. Полиция Дэвидм пюлабата
Сталин нгани несэй нювм нюбе'ласеты. Ти-
кы ваера Сталин несэй Чижиковнгэ манзар-
ралцетыць. Полиция Чижиковм пюла пяхава
Сталин нгани „Кобам“ нюбе'ласеты. Тикыта
малхана пудана нюмда Сталинась. Сталин
нюмда нюбець юнда латыць яндир' нимня.

Манзараванда мальнггана полиция нгу-
даха' сян еремясь. Сяролава мяка'на нго-
кари пон нгамдысь. Сян мэва нгыхы Си-
бирь тецьда ссылкан нгэдарадонзь. Таняд
нгока мэва хунорнгась. Хун'махаданда не-
сэй нювм мэць нгани манзаралцетыць.

Парэнгода полициям нгока яебтярт ха-
аврадась.

Великой Октябрьской социалистической
революциям Сталин Ленинданы хамадам-
бихинзь. Сталин капиталист' ядонгганзу',
помещик' ядонгганзу' пёда нгока ныхым
мэ'нгась.

1917 по' наранякуй тэвы'. Трудящийся' па-
рэнгодам ха'аврадонзь. Капиталист' властьм
нгудахато' ня'мадо'.

Нгани яхат Ленин салъй'. Сталин нго'
пудана Сибирь ссылкахад салъяць. То'ма-
хаваданди' нгули' мэёвна капиталист' ядонг-
ганзу' пэйха'.

1917 по' Октябръхана рабочий', палы-

тана' самб'ядаць. Сталин Лениння самбта
рабочий', палытани' нермтабадамбихинзь.
Рабочий' большевик' партия табадярмана
мимандо' сели' вадума', совет властьм серта'.

Помещик', капиталист' хавамдо' хама-
дахава пудана ныхыдо' ма'ла', тика'нандо'
невхы илам нгани' сюрхалеван харваса'ма.
Советской властьм яннгумдаван харваса'ма.
Тикындо' тяхамна большевик яннгумдаван
харваса'ма. Мэт'мана рабочий, крестьянин
няялман харваць.

Рабочий', трудящийся' крестьянин' сян
по' нгобкад пере капиталист' ядонгганзу'
пёдаць.

Тарем сангговота сайнорма похо'на Ста-
лин нява' сайнолвахана мэсь. Сталин Няръ-
яна Армия тавна ядэрнгась. Нгокари саювда
сангговота серкат нибтесетыда. Нгока мэва
враг' армия яннгумдавам табададась. Нго-
кари няръяна командир табадасетыда.

Сталиндо' тоб' красноармеец маймбасе-
тыць. Красноармеец Сталиндо' вади' пуд
мэбертадрем' хэсеты'. Красноармеец ненэся
нгод вадумлисеты'ма.

Ленин яннгума. Мал' трудящийся' мэне-
на Ленин вождьндо' яннгума мальннгана
Сталин коммунистической партияданя янн-
гумэнди' тин хэвхана ныхым нись сяй',
нись выдаларю' Ленин серм малханда тэвра
валытангаханзь.

Коммунистической партиана', рабочий
классна' коммунизм строительство е'эмня
пёдвам серота сер', нись нгэвадангг', те-
нева, мэёвна великой Сталин табадамбида.

Сталин нермтабадамбававна нгока ёнар'
заводм, фабрикам сертава'. Сталин няна'
нермтабадамбававна нгока едэй марадм сер-
табива'. Сталин няна' нермтабадамбававна
заводна' нгока аэропланм, нгока машинам,
нгока тракторм, нгока автомобилъм сертаби'.

Сталин мэнена вождьна' нермтабадам-
бававна крестьянин' нгобнзер' хынёси' ман-
зараванзь колхозха' туюць. Ям вадаба кол-
хоз' яхана машина' манзара пядо'.

Колхозхана мэна' рабочий' тотрем' нер-
тенгго бригадахана манзара пяд'.

Маня' яханана' трудящийся' сямян на-
циональность' закон'мана праводо' нгобпир'.
Сямян национальность' нидо' нядаби'. Нер-
тенгго социализм илм сертаби'.

Ялы' нимня трудящийся' саваилелтаньд'.
Иландо' ялы' нимня савумдана. Яна' сер'
нгарка яна' тинггэвна ялы нимня савум-
дана. Яна' тинггэвна нга'на нгэда яхартахана'
на электро, радио, кино нгадимя'. Яханана'
сямян ё' нимня падарм теневаина' нгокма'.

Сталин няна' нермтабадамбававна нгока
хуркари тэнз школа нгадимя. Школахана'
нана' сямян яна' тер' нгацекеы' тюку' тохо-
дана'.

Совет яханана' невхэна сямьхат ха'еб-
тарёвы национальность школа' Сталин няна'
нермтабадамбававна харто' вадавнандо' ман-
зара'. Тикы тяхамна книгадо', газетадо'
харто' вадавнандо' падбидо'.

Яна' тер' колхозхана мэна', рабочий',
мал' трудящийся' великой вождьмдо' Ста-
линмдо' мэнедо'. Тюку' нгокхандо' Сталинм
хари' нядандо' толабидо'.

Мал' врагна' Сталин нювм сэхэдадо',
тикында тяхамна нянандо' пильнзива. Ти-
кы' тарця нгэхэва сямьн ё' тер' трудящийся'
Сталин нява' мэнедо'.

Сталин няна' нермтабадамбававна тру-
дящийся' право е'эмня, нгамгэм пэрмандо'
е'эмня едэй Советской государство закон
сертавы. Тикы едэй законм народ Сталин-
ской Конституциянгэ нюмдебида.

Революция нерцюна Сталин няна' манзара'ма.

Сталин нява' ян нгацекы нгэдаханда ре-
волюция манзаян пэяць. Мале 23 потаханда
нгарка марад рабочий' вождьнгэ тарась. Нгоб'
мэва рабочий' тайной собранием сертавыць.
Сталин нява' няндо' мамы:

— Хаернгэ пили' рабочий' народ е'эмня
пэсьдабта тара. Тикы е'эмня нгока трудм
мэп'нана' тара. Нгока нгамгэм ла'амдаб'нана'
тара.

Мал' собраниехэна мэвы' рабочий сер' е'эмня пёдванзь валытавы'. Сталин нява' харта валыта'мамда малханда тэврада. Теда' маня' ява' нерня' вадламбида.

Нгобнгуна заводхана забастовкам серта'.

Полиция рабочий едпа пяйда. Нгамгэмбир рабочийм хада'. Нгока рабочийм мерюле'.

Сталин нява' нида ма'ла. Няхата ма:

— Рабочий едпава е'эмня листовка печатая тара.

Пи' тайной типографияхана манзара пядо'. Мал' нёдо', сидеродо' талвы'. Сталин нява' стол хэвхана нгамдё листовка падбавы. Нгани нида нгобт ма'лабвыдо', печатайбавыдо'.

Хувэхэнда ёнар' листовка' печатайвы' нгэвыць. Тикы листовкангэ нгэсы' тавна, марде тавна, завод тавна нгэдаравыць.

Полиция, жандарм' листовка' тарпвам хамадавэдо'. Нангадя ирий' Сталин няна' пумна вэнекодрем' хутормы'. Нгобнгуна пи' Сталин нява' ховэдо'. Арестуйнгадо', сяролава мят нгамтадо'.

Сталин нява' тикы сяролава мякана по ватамбой нгамдёвы. Нгамдё'мада лохода саць тыер' нгэвы, саць тецьвы. Нгули' мэевна лэтбавэдо'.

Сталин няна' ня' нгули' манэ'ман харвавэдо'. Серта тарем сертавэдо'. Сяролава мят пи тэвабавы'. Сталин няна' ня' пи тэвабадангэ недва'левыд'. Сяролава мята хэвхана пи нгонабавы'. Сталин нява' ядэсумб-

ванзь пин тарпормы. Ядэсумбванда сэр'нида манэпавы. Лаханако ня'мыда.

Нгобнгуна Сталин нява' тале падвы статьям ми'мы. Нида статьям мэ'махадандо' печатайвэдо'.

Сталин нява' сяролава мякана нгамдэ-хорта революцияхана тарана манзаямда сер-табавэда.

Сталинской Конституция.

Маня' советской яханана' иле тяхаринда сава. Хусувэй ялы' нимня илма' савумдана. Хусувэй ялы' нимня илебядёрка илелтанына'. Хусувэй яна' гражданин тоходана, нылана, трудан, вэсэйва'махаданда материальной обеспечениен правода тая. Нгока юр' по ямбан трудящийся' тики правото' е'эмня пёдаць. Нгобкарт яхана яндир' ниня рабочий', крестьянин', служащий' тарця праводо' янгу'. Маня' правона' Сталинской Конституцияхана пады'. Конституциява' — основной законва'.

Сталинской Конституцияхана советской народ победа пады.

Маня' пёдвава' Сталин нява' табадамбида. Мал' победана' Сталин няна' табадьярмана сертавы'. Пыда табадьярмнанда Конституциява' нгод сертавы.

Сталинской Конституциява' мал' яндер' трудящийся' минзь свободан нгэда сехэрым ялумдамби.

Правона' нгэдабава, родинава' нгэдабава хусувэй СССР гражданин священной долг, смянхат нгарка честь.

Нгацекые', тарця ябдана яхана илева-ханда, тоходанваханда маймбабта' тара. Маня' тяхари сава родинана' сава гражданин нгэванда е'эмня манзарада', тоходанада'.

Вопрос':

1. Конституциява' нгамгэ Сталин нюмд нюмдевы?
2. Гражданин' маня' яханана' праводо' хурка'?
3. Нгани яхана иленя трудящийся' тарця праводо' таянга'ам?

Тюку яля сыра'мамд хуняна нир тумданггу'.

Тюку яля сыланггун—сыннгосяда я. Хувы няна сылабат мале советской завод нгадимы нгэнггу.


Тюку яля сылабат лабта яхана нгамгэм нин манэт'. Нгоб' тикы ян хуняна сылабат нгарка'я совхоз нгадимы нгэнггу.

Невхэна аэроплан нид сылавэн нгэбат ям соябтамба янгэ понгга сэвдарев' падвылянгг нгэнггусь. Хусувэй понгга сэвраха я вэцькэцяхана харта янгганя ерв няньм вадабись.

Нгобтики вада теда' сылабат ям вадаба янгэ нгобпирковна ё'онъяхаянггу. Тикы я ниня трактор' манзара'.


Тад нго' нгэсь нго' теда' яр нгобнзер' колхоз янгэ хая.

Невхэна яхакоця ендад' тароси' мие'ма
яхана теда' сылабат электростанция падлы.



Невхэна таб' хаерё'ма яхана теда' хлопок
морекада.

Сенений нивы танпавы пэдара'амна еся
сехэры енгглы, сехэрэнда малхана нгарка'я
завод.



Та нгар яна' нгардан яндаха'на хибяри'
манзара', машина', завод' ялрёри'.

Задание:

Ваде'нгара', пыдара' крайхананда' пудана похо'на
нгамгэм серта'?

Артек теда' маня' е'эйва'.

(Пионер не нгацекы ваде'мы.)

Артекхана нгэда пионерской лагерян хэсь падартами та'. Мань нгани хуна нгэвамда вунив тенев'. Вожатый няни ваде'нгада:

— Крымхана Черной яв' вархана нга. Пыдар тая' пионер нятня нгоб' вагонхана хантан.

Минзь тябюбцо нись нга'. Сян яля нгэсонггавана поездва' Севастополь март тэвы'. Мань нюртей мэва явм манэ'нгадамзь. Ямнгэ я'авлэ! Тэри танзине. Няби янда вар ни нгадю'... Сидна' „Грузиям“ нубета пароходан тибте'. Ямна ти пява'. Няби яляхана мале Артекхана мэваць.

Балконсавэй хардахана илеваць... Хусувэй сидеркад хой' нгади', ям' нгади.

Нюртей мэва ямгана пюрнерць пинадамзь. Не нгацекы' нини тад си'ми ня'амвадо' яхана ит хана'... Тикы пуна хусувэй яля ямд пюрнерманзь хан'лыв'.

Нгобнгуна вожатый ма:

— Нгацекые', тюку яля пионер тодабцям пятанггува'. Хамадыда'!

— Пили' хамадыва'!—нгацекэнгэ нгоб' сён төреяд'.

Тикырихина хувдамдо' ма'ламба пя'. Пэвсюмб' яв' вархана тодабцям пятава'. Тодабць' хэвхана пионер' манзаямдо' ваде'ла, тоходан'мамдо' ваде'ла'. Нгули' мэкадасе.



Хэвани нерцюна лагерьханана' нгарка
ялям мэ'нгаваць. Лагерьхана' Молотов нява' то.

Нгопой ян мал' отрядна' ма' лаяд'. Тикы
яхана Советской яна' сава пионер' мэвы'.
Советской нгацекы' ня героической Испания
нгацекы' мэвы'...

Нюртенанда физкультурам сертабиваць.
Тикы пуна тодабцям пятаваць. Мал' нгоб'
сёвна яннгэрнгаваць: „Пионерской тодабцяма'
тамна яляркавна ту'нгая!“.

Молотов нява' ма:

— Москвахад приветдамда' тадм.

— Ура! Сталин нява' тая илея! Моло-
тов нява' тая илея! Ура! — нгоб' мальнг-
гана пионер' төреяд'.

— Нгацекые', пыдра' нянанда' тюкохона
иле сава? Артек пили' сава пионер' лагерьнгэ
тараван харвада'? — Молотов нява' ма.

Маня' мал' төреяна':

— Маня' саць харвава'!

Тикавахана Молотов нява' сепнда мюд
падарм тюхулнга. Лагерьяна' нермбэртян
ми'нгада.



— Тюку яляхад Артек пионерха' ми'мы, —
лагерь нермбэртя толада. Сяне юр' нгацекы'
харто' вада'амнандо' төреяд':

— Молотов няхана' нгарка спасибо!

— Великой Сталин тания илея!

Вопрос':

1. Артек лагерь хуна нга?
2. Пионер' ханзер' Артекан минза'?
3. Лагерьяна ханзер' илеса'?
4. Хурка пионер Артекан нгэдо'ла'?
5. Артекан хибя тоса?
6. Молотов нява' пионерха' ха'манза'?
7. Пионер' ха'манза'?



Михаил Иванович Калинин илнгдад.

Нгока по тяхана Калинин крестьянин Мишам нюбета нюда соявы.

Тю'уний Троица яхако сяд ниня нгда нгарка нгэсы нгэвы. Хыеда яда паль' пэдара, сюрхалё нгамдэ'лида ё'онъя.

Тикы нгэсыхына крестьяниннгэ манггба илевы'. Ядо' тянё нгэвы. Скотдо' тянё нгэвы. Нгадьбянда крестьяниннгэ нгамгэдамдо' недва'манзь март хан'мы'.

Калинин семья манггбада нгэвы. Нюдякоця нгоб' нинггсавэй хардакохонанда нгока нгацекэсавэй илевы.

Мишар матадм потаханда няданда нюдярка нида, не нида пэрмы. Нгаркамборкангэ хэ'мяхаданда хардандо' хэвхы манзаяхана

хувы ялумдакад пэвсюмбы ялумдата нгэсонд
небямда нядаба манзара пяда.

Хурка сюрхалё пэдара нгэб' нгод, сюрхалё
янда нгамдэ'нгэ тэ'эмъяб' нгод сянакова
нямна, ядэсумбва нямна ихиртада ядэрць
я'амвы.

Хасуюд потаханда Мишам вэсако палы-
танан тохолаванзь ми'нгадо'.

Тикы палытана Мишам невхы серев'
тохоламбвэда. Теда' тоходанабцяна' то'лаха
азбукам палытана ехэравы.

Валакада нгоб' янганя потаханда Мишам
шқолан миць еремдедо'.

Миша сидя по тоходанваханда тет классм
ёльце. Школа библиотекахана нгэда книга
тюку' толаяда. Школамда смянхат сава то-
ходаннангэ ёльцеда.

Манггбава март манзараванзь пидеда.
Калинин Петербургхана заводан манзара-
ванзь недва'леван харвавы.

Тарем харвава сиби сер' вуньвы нга'.
Ибета нгацекы, серм пирта нгацекы Боло-
товской баринан „казачекнгэ“ недва'левы'.
„Казачек“ нгэвкута нгацекы. „Сэрако няньм
хос', молоком хос'“.

Болотовскойхана тет по манзара. Боло-
товскойхана тет по манзара'мада тэри та-
романа ни ха'.

Болотовской библиотекада сава нгэвы.
Михаил Иванович ялыда тэри таромана нивы'

хаюр'. Хусувэй танггаркава минутахананда книга, газета толабавы.

Книгангэ Калининм нгока нгамгэн тохолодо'. Тикы тяхамна рабочий кружокха'на, заводха'на няби юта сиднет янггания потаханда манзара пя'махаданда нгока нгамгэн туху.

Саваиленя', манггбада' таниявахад, малибей', нгаворцяда' таниявахад вэвако ил' нгадибермам хамадада. Малибей' нгаворцяди харто' е'эмняндо' манзара табадамбидонзь. Нгаворцяди' недьбяд тянёвна салдамбиць. Нгадьбянда саваиленя' нгобннггэв' саваилелтаныдаць. Тикы серм Михаил Иванович нгани рабочий няхата ваде'нгадась. Парэнгода ядонгганзу', капиталист' ядонгганзу' рабочий пёда тохоламбидась.

Парэнгода полиция Калининм нидась савода'. Нгоб' сяролава мякад няби сяролава мят еребернгась. Нгоб' ссылкахад няби ссылкан нгэдо'ладонзь.

Теда' ти тверской крестьянин, рабочий-токарь Советской государство нермбэртянгэ хая.

Михаил Иванович Калининм великой родинана' трудящийся' тюку' нгокхандо' нгаркадандо' пэрнгадо', мэнедо'.

Михаил Иванович Калинин СССР Верховной Совет Президиум председатель.

Армиян хамы.

Нефедов Петра Няръяна Армиян хэванда ёльць тэвы’.

Заводхад товы ядарта Егор тидяда Петра нисян, небян ма:

— Хэ’, тюку яля ябдана ялям мэ’мэди’.
Нюри’ Няръяна Армиян минга. Няръяна Армияна’ янгоховаб’ ха’ нива’ам’, врагна’ ям соябтамба ёна’, заводна’, фабрикана’ март’ нисидом’. Маня’ яханана’ трудящийся’ властьм нгудаха’нандо’ ня’амбавам капиталист’ нидо’ мэне’.



Няръяна Армияяна’ мэйра’ма, яна’ нгэда’-ма. Маймба тара: нюри’ Няръяна Армиян минга.

— Егор вадида ненэсё’! — Петра нися’ма.

— Невхы палытана’ ил’ санггово’нгась. Тенеб’нани маня’ саювнгэ пелна’ Калуга марад хэвхана нуць. Нгобнгуна пивна ядадамзь. Яднахани нивэв хамада’, нердани нгоб’ офицер ядвысь.

Няни тад төревонда: „Нгамгэ нин нул’, нгамгэ нгудамд нин ил’?“ Ниня тосанахани няби хавоцянд си’ми марнимда. Мань хэвдэни сер’ нгудахаюни вэнггаладм, ят мадм:

„Ервко, вэвадм!“ Тики пуна няхар’ часан тунисавэй нуванзь си’ми мэта.

— Тики сер’ парэнгода мальнггыхы се-раць. Няръяна Армияхана тарця’ ни’ нга’. Няръяна Армияхана мэва саць сава сер’.



Теда’ Няръяна Армия командир’ невхы то’лаха’ ни’ нга’. Парэнгода армия коман-дир’ богатойхат, капиталистхат тэрабадаць. Теда’ няби сер’: маня’ армияна’ командирнгэ рабочий’, крестьянин’.

Вопрос’:

1. Петра Нефедов ху хантанса?
2. Ядарта Егор тидяда нгамгэм вадеца?
3. Петра нися нгамгэм вадеца?



Красноармеец юн падар'.

„Небёв', нисёв', нганимбоей'!

Мань Няръяна Армияхад вадам нгэдарам-бидм. Нгари' теда' нгэдаравы юн падарти' толав. Мирбе ня'амба совет ява' нгэдабидм. Рабочий', Крестьянин' Няръяна Армияхана таравами нгарцие'нгав.

Мань ханзер' илевами юнради'?

Ху мат' часхана юрксетына'. Мат'мана' пуна физкультурам сертаванзь тарпсетына'. Тики пуна нгаволава хардахана нгаворли-сетыва'.

Яляхана няхар' мэва сидна' нгавлаиб-сеты'. Нгаврава' нгули' сава. Сидна' сававна ембпи'. Илелавина' варци'. Яляхана сиднет

час тоходанава'. Тунина', пулеметна', сяд нгэдянго сававна мэць сидна' тохоламби'.

Няръяна Армияхана сидна' нгока нгамгэн тохола'. Газета, книга толабасетыва'. Нгэвадэва мальнггана Ленин лохокохона ныланасетыва'. Ленин лохокохона сянэрцетыва', тикы хавна хуркари тэнз сянакохо'на сянакосетыва'.

Театр сянаком хар'на' сертабасетыва'. Командирна' нгобтарем хэвханана' сянакосеты'. Тоходанва мальнггана командирна' нгарка ервона'. Нгэвадяр' мальнггана командирна' сямьхат сава нина'.

Пыдри' нюри' Нефедов Петра'.

Вопрос':

1. Красноармеец' ялямдо' ханзер' хаебидо'?
2. Красноармеец' ханзер' нылана пэрнга'?
3. Нефедов командирта е'эмня нгамгэм падби'?

Хамадыва'.

Тянёхорт нгадыхы я еркаран нива' харва'. Хар'на' ява' нгод тянёхортувна нива' мит', — тарем Сталин нява' мась.

Тарця вадаха'на рабочий' ма':

— Нива' мит'!

Колхозник' ма':

— Нива' мит'!

Мал' трудящийся' нгоб' вадавна ма':

— Нива' мит'!

— Маня' Няръяна Армиява' мэбе'нга.

Няръяна Армия совет ям лэтмби.



Няръяна Армия.

Москвахана Няръяна площадьхана нгарка
революционной яляха'на Няръяна Армия
парад нгэсь пэрнга.

Ядэлави' мюмня ядна саювна' хэсь пэр-
цеты'. Юно маха ниня тина саювна' минзь-
ты'.


Марад нимня аэроплан' сюрсеты'.

Красноармеецар нгоков, нгоков! Пушкар,
танкар нгоков, нгоков!


Маня' Няръяна Армиява' мэбе'нга. Врагм
пиде пирда'ленггуда.

Няръяна Армияна' вождь — Климент Еф-
ремович Ворошилов.


Няръяна Армия мирхана сямьхат мэбета армия.




Пехота.



Танк'.



Артиллерия.



Конница.



Авиация.



Яв' флот.

Нюмдейда', тюку падта'маха'на хурка (Няръяна Армия часть) маниеда'?

Няръяна Армиява' хибям нгэдаби?

Ворошилов вэдариҥа.

Сталинград марад хэвхана нгэвы сер' (таня мальнганна Царицыннгэ нюмдебадась).

Сэрако саюв' марад хэван тэвыд'.

Марад варнянгы нгэсы пинянгы хэвхана сэракут пушка' нултавы'.

Ху' мервана генералм нгате табекода табадярцавэй нгэв то.

Тикы пуна сэрако' марадм ня'амба пянгувы'.

Генералм ядабтаванзь юну маха ниня тинам нгэдара'. Генерал автомобиль нгадимгава лабцянгана нида хонра табдадо'.

Хов, таб ха'алнда помна машина минга.

Таня нгадьбата машинангэ лакмбой ланамлада. Тадикахад лэркабт ирт'ли' сехэрэсьда ян сюрхаледа, пушка' няю' пяда.

Юну маха ниня тина нида хонрамба нгудамда ила. Машинам япа нявоталада.

— Няхарто'... Военной'... Хадри' генералва, хибя тамна нгэвна? — юну маха ниня тина ихинянда ман'ма.

Юнумда нявота'ма минханда мадарнга. Нгудамда ила. Рапортм хэтванзь мале нянда сим нянгарта... Нгамдэсянда нид хацей'манта'... Автомобиль мюня нгамдэдит сабито' ниня няръяна нумгыкоця' нгэвы'.

Туни пенд хамзеда. Юну маха ниня тивы мантай'. Лабта явна юнунда мерцярида хая.

Батарея хэвхана мэвы' нгамгэ хадкэвам тюку' манэ'нгадо'. Мэ'ма яхадандо' ю' юнунтана тарудо'. Машина няю' мерцяридо' минга...



— Пулемет! Пулемет та'ля! Нгарехэ' мерку! Пулеметхад енернгада! — батарея хэвхана нгопой тёрдо'.

Илебей нгамдэд хобанорлаха автомобиль лабта явна тэри мирна. Автомобильвана енерма серта янгуу. Машинаха', батареяха' помна харто' сэракудо' нявоталанггу'. Тамна харт нид еданггун...

Юну маха ниня тина' автомобиль пумна
нёта пядо'. Тарем мэнахандо' хаерена пядо'.
Машина мюд енерта' тамнякори енернга'.
Нгоб' юно маха ниня нгамдэда сулмы'.
Нябим мерюлевы юно тэ'элнгада. Няхарам-
дэйдо' нгамдэсянда нид мантай'. Нганихива'
юнодо' мадарпи'. Автомобиль таб ха'алнда
тяхама.

Хой пинянгы хэвхана машина нулъяй'.
Хувы нумгана лабта яхана полынь нгамдэ'-
ли лехэдарнга. Боец' машинандо' мюд тар-
пыд'.

— Тахаби тарпына'? — нгаркадо' ма.

— Климент Ефремович, тарпына', — нгоб'
сёвна нида ма'. — Командир нява' пыдар
е'эмнянд пинаваць.

Невхы боец' Няръяна площадьвана нар-
ком Ворошиловндо' хэвувна хэвандо' маль-
ннгана тю'укуна падвэва' ихиндо' ха'авра
пэрнгадо'.

Вопрос':

1. Автомобильм манэ'мандо' сер' сэрако' ханзер'
ибедо' ядэласид'?

2. Автомобильхана няръяни' мэвам ся'ня хамададо'?

3. Автомобилиян нгамгэ енерць я'амса'?

4. Автомобиль нид енерта ханзер' енерца?

5. Автомобильхана вэдарты' нерм хибя пэрцада?

Казбек.

Сайнорма мальнгана Казбек Буденныйя еремя. Казбек донской санарте'э. Казбекнгэ тяхари паской. Сэвда пядине'. Нгэда лэри'. Нгэбтда париде. Тэвада саб'наи. Тарта бу-
ланой.



Буденный Казбекм минханда хамзхалнгада. Буденный Казбекнда монзанггм нгуда тоеб-
тада. Казбек ехэрана хибяхад вэтортадрев'
мэ. Тикы яхана Буден-
ный сепнда мюня нгэда
сахарм тензибте. Тюхул-
нгада. Казбекан ми'-
нгада. Казбек нгэвам

парыбта. Сахарм мэ'махаданда хунгглямда Буденныйя сити'ле. Тикы яляхат ниди'
ня'лыди'.

Буденный Казбекнда ниня нгока кило-
метрм хае. Мэбете'э юнода ервмда нгули'
ня'лада. Казбек пензь санаби. Вадо' нимня
санарнга. Еси нгохолпи. Буденный юнохонда
нгули' ена пэрмы.

Армияхана Казбекм хибя ехэрасада? Каз-
бекм ехэрана хибя янггувы.

Нгоб' мэва саторивна сайнора'махадандо'
мале пэвсюмя. Нгаво' пиркана Буденный
пиня' минда юнутана саювха' теба.

Буденный вары казакан юндалы':

— Нгамгэ саюв' пеляда'?

— Шкуро генерал сотнява'! — Вадида мэса'махаданда белогвардеец пиня' ёнгамтъй. Мядондамда вунида хамада'. Нер' нгавнанда Буденныйнгэ нгобтарця казак савам мэ'мы. Саванда нерний няръяна нумгыкоця пэвдя-хана вунъвы нгадю'. Нянгэда хэвхана мэна'



казак' няхато' сылангглавыд'. Помнандо' хасабалвыд'. Пон мэва серта янгу. Енабт'-мада Казбекри. Хурка нгэнггобата хунтаре?

Буденный Казбекмда лэркабт халцам-лада, харта частьта няю' пяда. Сян казак пумнанда пядо'. Туниридо' пендернга'. Казбек лабта явна тиртядарев' минга. Сэрако саюв' хаереяд'.

Няръяна Армия Ростовм марадм ня'ам-бава мальнггана марад помна сайнорнгаць. Буденный, Ворошилов нити' нерм пэрнга-

ханзь. Лэркабт враг пулька Казбек нгэван теба. Казбек хунгглыта ни' тиндада нэрнальй.

Буденный Казбекмда тяхари' мэнедась. Маендорта юномда мание ида вома. Хабцямананда едаван харбелада. Нгамгэ нгод нгудада вуни' ил'. Ворошиловханда сюрхальй, манзь ханада:

— Еда саялы. Еда я'мав'. Маси' илебцу'.

Сайнорма пуна Казбекм ветеринарной лазаретан мэдо'. Мал' красноармеец' Казбек едара'мам теневадонзь. Тюку нгокхандо' Казбекм сянгадонзь.

Буденный хусувэй яля юномда вэдомбидась. Самляннг яля нгэсонггана Казбек савумдана пяда. Самляннг янганя яля нгэсонггавана Буденный красноармеец' нерня харта юонда ниня нгэдалысь.

Вопрос':

1. Казбек мирбьяда хурка нгэса?
2. Казбекня Буденный ся'ня поёди' савумза'?
3. Казбек ханзер' Буденным сэракохот хунтасада?
4. Нгобнгуна Казбек нгамгэда хадкэса?
5. Ханзер' савумдамбсадо'?

Николай Щорс.

Гражданской сайнорма мальннгана Николай Щорс Украина партизан' командирнгэ таравы. Щорс юнм намдхава хурид тарид партизан' ма'лана пядо'.

Нгобо' манзеты':

— Отрядханд сидна' мэ'. Украинава' нгэ-дабанггува'.

Мербяривна Щорс отряд няхар' юрмбир-нгэ хая. Партизаннгэ Щорсан нгокари манзь пэрнига':

— Командирнгэ, тунина' ни' тэврю', ю' партизан нгоб' тунида.

Хов, нгавотанехуна хы-мнандо' немец' тунисавэй эшелон хэвам Щорс намда.

Пи' партизан' еся сехэ-рэн хая'. Нгоб' партизан еся сехэры рельсан хамда лабце.

Тадхава ма:

— Тамна нга'на мэвы.

Щорс ма:

— Рельс ха'аврада'! Пулемётмда' накрада'!

Поезд хахаялтаны'. Партизан' накраяд'.

Тикы' ямбхана немец' машинист поездмда тэри мирналтабида. Рельс ха'авра'ман тэв-хава паровоз мантай'.

Щорс төрей':

— Енернгада'!

Врагм едпа пядо'.

Щорс нгока военной терм ха'авра. Тюку' ханаядо'.

Щорс отрядхана мэна' майба ма':

— Немец', вэсода' лэтрада'! Тедахава тунисавэва'.



Ся'нэхэва нгэдакы'. Хынандо' нгэда нгэ-
сыхыд нгоб' хасава нгацекеы Щорсан то.

— Щорс тидякэ', нгэсыхына' хубтахана
немец' тута'.

Щорс тет ю' партизанм тэра. Врагда
ядабтамба хая.

Нгэсын тэв'махадандо' нгэсы терха' тунн
митернга'. Харто' нгани харад' тавна лынг-
гараяд'.



Крестьянин' ма':

— Щорс хуна мэ?

Партизан' ванибтеяд'.

— Нуя, петух тиртя төрехэва Щорс
харта нум' няюд ха'амнгу'.

Нгодь' нумда ялумгава немец' команда
му' тэбкадаванонда:

— Ейн, цвей, дрей! Ейн, цвей, дрей!

(Нгопой, сидя, няхар'.) Рота нгэсы ер' пират тэвы'. Хуна хухуртана нгамгэ вуни со'. Вэнггарт ни' мадар'. Хов, петух тиртя төрей':

— Ку-ку-ре-ку-у-у!

Петух төрехэва хусувэй харад хэвхад тунн' хамзеда'. Немец' ни' пулька яльцеда', граната яльцеда'. Хэхэ мяд сенгга нгэбцынггад Щорс немец пулеметхад няибиде.

Немец' ротам тюку' ед'нгадо'. Тадхава нгэсыхыд хэсь пядо'. Партизанха'на самляннг ю' нгэсындер крестьянин хая.

— Немец Украинахад питарма та'альна нина' нгэваданггу'.

Ти тадхава партизан' командир Щорс тарем сайнормы.

Вопрос':

1. Щорс хибя нгэса?
2. Украина партизан' хибя ядонгганзу' сайнорца'?
3. Партизан' ханзер' тунндамдо' тэвса'?
4. Партизан' ханзер' немец' ротам янггумдасадодо'?
5. Щорс партизан' нгамгэ е'эмня педса'?

Нюдяко чапаевец.

1919 пуху. Нгэрёй'. Чапаев дивизияхана нгэда полк нгоб' киргиз нгэсын нгэвадьярма. Тикы полкхана Марусям нубета не танявы. Маруся нгэсы помна хая. Нгоб' кулак киргиз харад хэвхана лыда няндортана хасава нгацекеым сэвте. Нгацекеэнгэ сангговота минюйм мине.

— Хасава нгацекэця, сит нядахадм!

Хасава нгацекы сейда хая. Хуны'. Марусянгэ няхата тэвхава хасава нгацекым ваде'ла.

Нгацекым теневана' ма':

— Тикар евако. Нисяда янггу, небяда янггу. Нгавнанда кулак киргиз манзарананданда тэмдавэда. Тарем харахана илеванда ямбан кулакхана манзараванда.

Маруся пыса:

— Нгамгэ тюку яхана хибяри тэмдаби'? Пэвсюмб' Маруся нгани кулак вад хэван хая. Сырнга. Нгацекэцяи вад хэван танггабтавы'... Тэри янггэбцан инзеле. Марусям хамада варцяттеда. Маруся ня'мада. Няхата тада. Нгацекы нгули' пон чапаевец' янггэбцан инзеле. Тэри маймби.

Нгэсыхыд чапаевец' хантана пядо'. Нгацекэця хантанни' хэван то. Тимофеев командир нгэн лабцей'. Тэри малуторнга. Нгуданананда ерванда хардан табику. Хурка вадамда ехэраб' нгод чапаевец' тюку' хамададо'.

Маруся ма:

— Мэхэва'ма!

Нгацекым мэдо', юндалтаба пядо':

— Нюмл нгамгэ?

Нгацекы нгэварим парыбта. Хардыта нгацекы нюмгартада янггувы.

Нгацекым пулеметм пэртя Федорован ми'нгадо'. Нгацекэця пулеметм нгули' ханзпида. Нгокари пулеметм пэртя нямда нядаба

лэдырнга. Пулеметнгэ „Максим“ системам
нюбе'нгась.

Нгоб' мэва сэрако саювхат марад марпа
пя'. Лэркабт пулеметм пэртя нгудаханда
едарай'. Ханзеркарт „Максим“ пулеметмда
нгэда я'мада. Хан мюд киргиз нгацекы са-
най'. Пулеметан сяври вынздеда. Нгацекэр
сэрако саюв пулеметхана тэри няйба пяйда.

Сэрако саюв' на'волараяд'. Чапаевец'
марадм ня'мадо'.

Пэвсюмб' Федоров няхата ма:

— Максимкоми хангада'!

Нябид нямдо' хамадахарта я'мадо'. Тикы-
ринда киргиз нгацекы хардан тю.

— Максимкова' ти!

Та мальнггы яляхад Максимкор нгока
фронтан тэворнга. Сайнорць нгэвада'махад
Максимко юнутана милиционернгэ туху.
Теда' лахана Максимкор Киргизия маркана
милиционернгэ манзара.

Вопрос':

1. Сяха' тюку нгэса?
2. Чапаевской полк ханяна нуса?
3. Маруся хибям манэ'нга?
4. Киргиз евако нгацекы хибяхана илеса?
5. Хуркавна илеса?
6. Нгамгэ чапаевец' нгацекым нянандо' ханадо'?
7. Полкханандо' нгацекым хибян мицадо'?
8. Нгобингуна пулеметм пэртя нгамгэда хадкэса?
9. Максим нгамгэм сертаса?
10. Максим хибянгэ хая?

Красноармеец ваде'мы.

Сэрако саюв' ядонгганзу' сайнормана' мальнггана нгэхэни, маханий нгудахани едарайваць. Вангг ян мантавэваць. Вэями нгули' нгокавна хэвысь. Тикыни тяхамна ныхысял-мэдамзь.

Нини нгани ни' со', ни' нгадю'...

И'ни нгэсяко тер и'ми мал' нгэрнгов. Ими нгани нгадимзеты, нгани ёхосеты. Нгоб' яхана юседадм. Нгоб' сэвни нгадимяхана хувы' нгэвы' нгэсеты', няби нгадимяхана пэвсюмбы' нгэвы' нгэсеты'. Иб' тёресетыв' хибяхарт си'ми ни намдор': хад нго' нга'на хая'.

Едара'мини мерёни ла'амдамбнана' пилибтари ни' нга'.

Ихиняни мадм: „Хэ, хад нго' пили' хадм“.

Нгацекые', хавэдм нгэидамзь Гайкам нюбета вэнеко нивы нгэбта ту'.

Няби писавэй яляни мал' тэвоталкава нихива нга'на вэн сынгрё' сулмонондо'. Тарцям намда, нгацекые', ёльце маив'. Валакада ирими ядэрнга: „Си'ми хонггудабтав' нинг-годабтав'?“

Гайка вэнеко си'ми хори хо. Си'ми хохова маймба сярнэлы', ханямна танямна си'ми нянзба пя.

— Хэ', някуцяев, тохоявэн. Тад нго' тарця я'авладам ханзер' нянгэ нирди' нюмденггу'! Гайкам нюбета вэми хэвхани хэв-

далей, махамда няни ихива пята. Вэнекони маха ниня няръяна ненадумдцавэй падко сярвы, ханя вэнеко ихинянда мандакы: „Нгамгэ таранадар харт мэ!“ Тикы яхана падкоця мюд иодм, ман'мам тюхулнгадм, тадхава



мерёни иодхана хамд'ян, манонъян. Си'ми хо'махаданда вэнекоми сёе'мянда тяхана сярда хибям хо хонаркобць' пямда нянгганда няр' мэхэя пуй нгу'умнанда нявоты'. Вэнеконгэ тарем тохолавы: тад хибярим хобта тикы хонаркобць' пяхананда пюрцейтана хибяри хонрамбида. Хибярим нибта хо' вэнекор хонаркобць' пямда нянгганда нида мэнггу'.

Гайка вэнеко си'ми хохова хонаркобць'

пякоцямда няр' нганелабтада санитар няръяна палытана няха'ни тэвы'. Тад тикахад пюдерена палытани няни тэврайда.

Ти тарем хангго'махадани вэнеко си'ми нибтесь.

Вопрос':

1. Гайка нгамгэм мерюян таса?
2. Нгамгэ хонарко пямда нянгганда мэсада?

Няръяна Мар'.

Печора ямгана Няръяна Мар' нгадимя. Няръяна Мар' ненэцие' округ мар'. Няръяна Маркана хуркари школа нгока, тэмдолава нгока. Таняна клуб', кино, библиотека' тамна нгока нгамгэ тая. Сямянхат нгарка хардахана, паской хардахана педучилище нга. Тикында тяхамна Няръяна Маркана пям пи-лебада нгарка завод тая, кирпичм сертабада завод тая.

Няръяна Мар' лаханакохона вадетадрев' ялы' нимня нгарамдана, латамдана.

Тикар едэй мар'. Нгадьбянда Няръяна Марнгэ нюмдевы.

Валакада хасуюд по тяхана Няръяна Мар' нгэсынганна нгамгэхэрт янггусь. Табри хаерысь. Тикында е'эмня Белой Щельянгэ нюмдебидонзь. Теда'яхава Няръяна Мар' нгарка порт нгэсь' марнгэ хая. Та' мальнггана нгока советской пароход, нгани ё' пароход нулннга. Тикында тяхамна Моск-

вахад Северной полюсан миндя аэроплан' нгарка нулнгалвангэ хая. Нгока советской герой Няръяна Маркана нулнггась. Нгока советской нгарка ученый нулнггась.

Советской власть мальннгана Няръяна Марли вуни нгадив'. Саля хард, Дудинка, Табседа хард, Пэ яха хард, Нгамдарма, Яр Саля, Хальмер Седа, нгока нга' нив', мал' нид вадет'. Тики тяхамна ита нгабтень варан сылаб' нгока радиостанция нгадимя.

Советской Союз я нгардан сылаб'нана' едэй нгадимы мар' толава техэ.

Вопрос':

1. Няръяна Маркана нгамгэ сертавы?
2. Няръяна Мар' ся'ня сертавы?
3. Хибя турнга, тирць турнга Няръяна Март?
4. Советской власть мальннгана пыдара' нянанда' хурка марад' нгадимя'?
5. Хурка едэй марад' теневада'?

Маня' ява'.

Яндир' ниня нгарка я тания. Тики сямьянхат нгарка я. Сямьянхат нгарка я маня' СССР ява'.

Тад нгоб' ёльцьннгана яна' вэкана илени радиовна юндалтабат:

— Ялянда' нгамгэвам мэ'нгада'?

Нгопода' манда': хувьыдава'. Нябида' манда': яля ерм мэ'нгава'. Няхарамдэда' манда': пэвсюмбыдава':

Нгани юнраб'нанда':

— Понда' нгамгэ ёльцям мэ'нгада'?

Нгопода' манда': яханана' юнуй'. Нябида' манда': яханана' сывы'.

Юнраб'нанда':

— Нгамгэхэна саваиледа'?

Нгопода' манда': есэхана саваиледа'.
Нябида' манда': пэ ята'махана саваиледа'.
Няхарамдэда' манда': нефтьхана саваиледа'.
Тетимдеда' манда': хлопокхана саваиледа'.
Самлянзимдеда' манда': няньхана саваиледа'.
Матдомдэда' манда': халяхана саваиледа'.
Си'вимдеда' манда': пушнинахана саваиледа'.

Няньм ниня вадабада яха' няньм тэвра тара.

Хлопокм ниня вадабада яха' хлопокм тэвра тара.

Нефть, еся, пэ ята'ма ниня тюлыбада яха' нефтьм, есям, пэ ята'мам тэвра тара.

Задание:

Тюку рассказ тарем толара': нгопора' вадета вади толабая, нябира' юнрава вади талабая, няхарамдэра' ответ вадангэ тарани толабая.

Хурка богатство пыдара' яхананда' тая?

Еся сехэры.

Хой сабка', лабти пирсумда', пул сертернга'. Тарця нгаво мал' хибяри сертеръяда.

Тикы ирт миндя сехэрэвна сиеся рельс вэнггала'.

Вэнггалёда сиеся рельс ни' хибяри' паровозсавэй поездм нгамтавы'.

Паровозм пэ ята'махана тодаламбидо'. Тикы' ямбхана еданда мюй и' тэри лохомба пэрнга.

Танзёхона миндя паровоз самляннг ю' километрхад вата я пойм нгоб' часхана ваенгга. Нгани' поезд' электро ныхына минга'.

Миндя паровоз вагон солаби.

Солабадада вагонха'на нгопохо'нандо' хибяри' ти', нганихи'нандо' хуркари тэнз мире минре'.

Мирнгэ нгоков, нгоков.

Нгарка я еся сехэры.

Варк тонд вархад пэ ята'ма нгэсыннгад Шар нгэсонд еся сехэры вэнггалёда. Варк тонд ята'мам еся сехэрэвна Шар маран лохолабтанггудо'. Шар марахана сян макодата пароход' пэ ята'мамдо' пэмба тания нунггу'.

Шаранд марахана нгани невхы сидяри нюдякоця хардаха' нго'махана нангадя мар' нгэвы нгэнггу.


Шар хунзер' хуркари пароход' тэри вэнэрта'.

Шаранд тяханякуна Вайгачхана заводконд якэда макода'амнанда тэри ха'енггу.

Невхэна ирий' ямбха', сыв' ямбха' мюсе-ра'мина' ёна' еся сехэрэвна нгоб' яляхана тынпанггуна'.

Тэкоцякуна' сававна вадабанггуна'.
Тикында тэкоцякуна' хубта ян нина' тана-
бюрт'.

Вынггы вымна еся ханар нгобо' сярце
пэрти'.



Пэвдяхана татури' есабарта'.

Хуна нин ман' нгани еся ханар ёховы.
Вэнгалёда есяда сехэрэда нгамгэ вуни нык-
ланггу'.

Есямд ханамд хад нида мадарт', сарё
нида мадарт'. Тарця поездхана нгэдалёвар
саць сава.

Сую.

Мурман яхана еся сехэры тая. Харта нгани яда пэдара. Пэдара помна еся сехэры вэнгалы.

Нгобнгуна нгоб' сую хадырць мале'-махаданда еся сехэры энглёдаха' понд хая. Ханя ня'нако сехэрэвна яда. Няби' нида



сехэры сидя хэвхана мэ'.

Лэркабт пунда няна нгамгэхэва ялня сул'й'.

Сую пуня' васадай', нгамгэда нгэса? Нгамгэхэва нгарка'я париденя пумнанда нёта.

Суюкоця сейда хая. Иб' хэвня' сананг-гуць нгамгэ' нгод, тяхари лабадяв нгэвы, ха'амъита пилибтари' янгу.

Ха'мыта тарця нгэхэва тамна нерня' пунгыта ни' тарабтахая нявоты'. Нгамгэмбиркана пуй яханда нгани васадай'. Неры париденя мале сита тэвота пявы.

Суюкоця нганинда янгго пыядасавэй тарабтахая нявоты'.

Машинист машинамда ланамлада. Суюм сехэры нид питарма е'эмня машинист машинанда мунм нэкалнга.

Су'ля машина мунм намдхава нгэвамда, тэвамда нгобт илвыда, сехэры мюмня тяхари' выдбида.

Машина нгани муно'лы', нерыта нимня марнэлы'. Хов, су'ля пиняри' хунмби.

Нгамгэмбиркана сехэрэнда яд' нехэлмам хамада. Пуня' васадаванда сер' сэвтеда. Нгамгэда нгэса? Тикы париденянда сидяда сэвда тунгэ хаерыхы', сехэры хэвня' нгоб' халцабтай'. Тасий тэлвана ти нявотада. Су'ля сейкада саторивна хаё. Машинист писензь харцэрнга:

— Хый, сеяр хая, са'лако.

Машинист невхэнда сер' машинамда мерхаледа. Тарем мэнаханда сехэрэнда лэнггва'-махана поезд тамна нгоб' муно'лы'.

Су'ля тикы' ямбхана пиняри' хунмби. Тарем мэнаханда нгадьбата сюдбья ямб'я минханда ваерана пяда. Хэвамда манэкава тандая танггамъй'.

Танггамгава пыядахая нгувм хадахалнга, тадикахад ханя янамбоковна нята ня' танеты'.

Хорецако, няби писякоця.

(Лаханако.)

Хов, ху е' нгэбта нгод писякоцяр пындрамба пяда. Нгаво танехуна писякоцяр хорецаком ядабта. Писякоця вабта ма:

— Нявэй', хорецаков, худ ханя' минганэй?

Тарця вадаха'на хорецако нгоб' нгодабтай', вабта масьню':

— Нгамгэ нин халэ мание'? Тетми нгэми нераку'удамню'.

Хов, тарця нгэхэва писякоцяр манзь ханада:

— Пыдар нгод ханя' мимар пунсявыню' нгани, нгамгэри нгото нго' нгобкана хэхэней'!

Хорецакор манзь нгодабтай':

— Нгамгэмбода хад нгади'? Хэхэва хэхэнима.

Тикы яхана нясьюмба ядалкаяяха'.

Хорецаконд ядванда сер' нгэвари ярыбты, тибяри' нярыбты', сэв' хаерабты'. Писякоцяр нянда ирмня тэри варна. Хорецаконда ирня нгодринда пере.

Хов, сянад хунад ядриб'нанди' нгамдэдо' понд пакаллиб'нанди' хорецакор пися сюдбямда ё'лидасетыда. Нгамдэдо' понггана хорецакор нгокари писякоцямда хацясетыда танхал'. Нянда иднари'имна хонрисеты'.

Манзеты:

— Хай, няв, сава няв, тая мэхэявэнаню'.


Нгаво танехуна писякоцяр нгод вахалць пяда, мамбата масьню':

— Хорецаков, мадма, лынзекохоней!
Хорецакор тарця вадарим нгатовэраха,
масьню’:

— Нгэбта нгэё! Валакада нини’ вунини
хонггу’.

Вадиди’ мэкава мунзьва хаяха’.

Хорецакор нянда нерня вахалъй’:



— Пыдар тад лэуцяр нюдява нгани
сэвад такалъинась, мань лынггараиваць.

Тарця вадахана писякоця пись’ ванггха’
нгоб’ сакада.

Хов, хорецако’я ху е’ нгэбта нгод няво-
тэй’. Тайна хунанда пензь’ вангго понд ва’ны’.

Хорецако лынггарахава писякоця пюр-
цейта пяда. Сянад хунад писякоця хореца-
комда пюрмэда нгэбта хось я’мада. Тарем
мэнаханда хэнзь выдара.

Нгаво’ пиркана писякоця идя ядэлы’:

— Хай, тикы сюдбямд сероць нирвав-
тэмбара’.

Нгаво' пиркана писякоця сѣнда нгардан
тѳрей':

— Хореков, лынггарын нга нямдод нга-
дей'!

Хорецако тарця вади намдхава ихин-
нянда ма:

— Хэ', нер' нгавнани нямдони ненэся
нго' такалць юрвѳдамню'. Хэ', вѳво!

Тодам манѳкава писякор ма:

— Ёльцьми тѳвы'. Тадхава хурка мань
нгод лынггарахарцюв'.

Писяхава нгамгѳ нга'на хѳвы нгѳвна тад-
хава лынггарай'.

Сянад хунад хорецакор писякомда
пювѳда нгѳбта, писякоця нгамгѳ хоита. Пю-
деренаханда хорецако ху выдара.

Хореко ва'ны'.

Писяко тарпы'. Лыхыркарта, мамбта
масьню':

— Хэ', иб' хорецаконгѳ лѳр нгарка, та-
рем нгод ян са'лан, сикартами хось я'ман.

Та малда.

Вопрос':

1. Писяко хибям ядабта?
2. Писяко, хорецако ханзер' сянакосаха'?
3. Хорецаком хованда е'эмня писяко нгамгѳ ихинда:
ха'амси'?
4. Хибя серосаркавы?

Задание:

Лаханаконком тарем толара': нгопора' ваде-та вади ваде'-
нгая, нябира' писяко вади ваде'нгая, няхарамдѳра' хорецако
вади ваде'нгая.

Нин тэмбаранггу’.

Ху’ мертёвна ты’ мят то’. Нгули’ нгокхана’ тэдва’ сярава’. Яханггэвкоцяхарт няхар’ пыя сэрта сярвы. Хано подермахана вада вуни тая’.

Ху е’ нгэбта нго’ нгэдалайна’. Нерана’ няна пангграха сотым еде’ливэва’. Нгадьда сотэн нгамгэ пон мимнава’, та тэвына’. Мэта ю’ ханхана нултава’.

Харта нгани хурина тарина я’ парцьнехэя’. Нумда нгули’ сава. Хури ибакоку, нгэбт я’ ни манз’.

Пинданий хэвхана яв’ тид’я тантанараха. Яляний хэвхана нгарка пэдарит тид’я нина’ тантанараха. Нерана’ няна Надар хой ти ту’лесада. Нянда сятанякуна Я’не хояр ванггортахая.

Тайбари, ёнэ Пыряр хэвэхэ’. Няхаюти’ пумна тет ю’ нгэдалёда итрем’ хамдума’.

Сямян пуданахана ты иням я’амнаридо’ хаёвы’.

Яля пелянда нгэсонггавахана ненггва’ нёври нгобня’ хунгарпа пявэва’.

Нгаво’ пиркана нгарка то сэрт носи талвына’. Тикы яхана носи’ хавна няхар’ пихим, ю’ тёням талвэва’. Няхар’ пихир тэри пяраса’. Сяне’ ненггхад хэсь пябто’ сарасетына’.

Нюдя Тайбарим сармик’ еде’мэдо’. Тикахавахана тёран вуни’ нга’, нгоб’ хась хаводо’ хылтаць нявотыд’. Нгоподо’ тюранда нимня

санай', няби хананда нимня санай'. Няхрамдэмда тикыри яханда хантанаханда наря сухуда, та хадада.

Нгамгэда нгэвна нгоб' талвахана самляннг юд нохом, ю' тёням, нгоб' пихим хада' нива'ам'.

Ханесэна' тярпа пява'.

Тадебя Пахар манзь ханада:

— Нгацекые'! Тярорпа'на' нго' ханесэна' тет ю' нгопой ян тярць тара'. Тет юкад вата е'эйва' Никола хэхэн митава'.

Тарця вади намда мал' төревондо':

— Нгамгэхэд тет ю' нгопой ян тярпувнина'. Паханзеди' тадебя нгани сидна' невхы сер' хайдембван харван?

Мэсь нгэя, тюркунда тяхана нгока сава нохом илеванзер' ми'нгаваць. Совет яна' мэберма е'эмня хэя!

Тарця вадаха'на тадебя Паханд няби сята хэв пидрем' хэвы. Харта е'эйда нохода мэ'махаданда хадрида хая. Тикы хэхэва хаёдангэ нгоб' письнгэ нганелабтадо'.

— Тадебя Паханзеда сидна' ни тэмбаранггу'!

Вопрос':

1. Ханена' ханя' хая'?
2. Ханена' сян сармикм хада'?
3. Тадебя ха'манза?
4. Толара', ханена' нянда ханзер' лаханаса'?



Хибяри' тирць тохо'ма.

Понггэй мерцянгэ я тю'укумна летчикна' сиеса тиртяха'на мирна'. Нгылэндо' няна марли', выли', хойри', яхакори' мяларнга'.

Нгавнанда ханзер' нгамгэ тирць тохода-наса'? 300 по тяхана нгоб' крестьянин сидяри том сертавысь. Сертавы тода няд'-мякава пирця ё' нид ха'морць пявэдась. Хибяри' тиро'мита е'эмня нямдо' пяхана пярдеведо', тохоюда нгани мальермыдо'.

Рязань маркана Фурвин тю'у' илвы. Нгари' нгавнанда нгарка шарм сертавы, шармда якэхэна пандавэда. Шарханда марам сярвы, сярда мараханда нгамд'махаданда нуна хо' тю'у' илвы'. Шарда мерця серев'



пу'лэй', таяннанда хэхэ мяд сенгга инян теба. Фурвиннгэ сенгга нямю инян хада-халъй', тарем харахана иландамда хо. Тикы-

рихина нгод поп' ма': „Крестьянин тэри ни'
ти', ниня нгадьда ныхым мэць илы'; тун
мось тара, нибта нгани иле я тонда тара“.
Тирмэва' вары тэнггата хабцянггаданда
хуны'.

Шар нгамгэ ныхым мэць тю'у' илвам
хибярингэ нгули' хамада я'мадонзь. Шарм
тю'у' илвы ядембада инд' нгэсава няби якэ
нгэсава.

Франция яхана нгобтарем индкана пан-
давы шарм сертавыць. Шарнгэ пыдамда
ядембада индкана пандавандо' сели' илвыць.
Тарця шархана тирмы инда серев' шармда
нензимдамба я'мадась.

Хибярингэ хурка тирць пяпто' нгод
шардо' нензимдамба я'мыдонзь.

Нгаво' танехуна хибярингэ тирць мэтидо'
нензимдамба нгод туху'. Теда' сертабада
тиртя нгано — дирижабль — летчик' нензим-
дамбидо'.

Хибяри' аэроплан сертаба нгод туху'.
Аэроплан пропеллерм няд'мяць минга.

Аэроплан пропеллерм мотор сюре'леда.
Нензимданггобцянггананда аэропланм хан-
зели' сюре'левамбир.

Вопрос':

1. Хибяри' нгамгэ ниня тирць псадо'?
2. Поп' Фурвинм ханзер' мэван харвасадон'?
3. Нгамгэ тарем мэван харвасадон'?
4. Хурка машинахана хибяри' теда' тирнга'?
5. Хурка советской летчик пыдара' теневада'?



Тю'уна манзарана'.

Нгамдэдм вомдабади хадабава.

Иба яхана нгэ ниня таннана лымбдаха' саранча халы' иле пэрнга'. Саранчавадэ' махаданда париденя тирдарев' ё вадабабць' яха' япа пэръяд'. Саранча нгамдора'ма илебей я' нгарханда нгаблангга пэрнга'. Аэроплан минга. Хуна лымбад нимня хэбта, ям вадаба я нимня хэбта нгабтадм хамдпа пэрнга. Нгабтад ерево'ма яхана саранчари хась пэрнга, нянь ни вовор'.

Сэро вэдепава.

Нгарка тецьда итя нгабтенья явм ява' хэбе'-нга.

Корабль' сэро' помна ядэрць пинаць. Валакада някця', тивтеко', сэр' варк'таняна илець.

Теда яхава тецьда итя нгабтенья ям' сава сехэрэдана' хая. Хусувэй та' пароходнгэ вэталё я хунзер' хэсеты'. Сэро' нимня аэроплан минга. Нерня' минзьдамдо' ямдо' аэроплан вэдепида. Пароход нгамгэда хадкэна яхана аэроплан нюртенгэ няданггованзь пянггуда.

Вопрос':

1. Сельской хозяйствохона аэроплан хурка манзаям пэрць пир'нга?
2. Аэроплан нгэрм няна значениеда хурка?

Челюскинец'.

Челюскинм нубета пароход Великой Северной яв' сехэрым манэ'манзь нгэдаравысь. Нермбэртянгэ Отто Юльевич Шмидт тарась. Пароход ервотангэ Воронин тарась.

Челюскин пароход пиняри' минга. Минзьдавнанда нгоб' сэргэ нгокамдана'. Челюскин нгули' минга. Сэргэ нгокамдана'. Челюскин нгули' минга. Сэргэ нгобпиня нгокамдана', нгобпиня нянгортана'.

1934 по 13 февраль яляхана сэргэ нга'нясавэй пароходм латрадо'. Сэргэ нгопой ирнадо', нгопой марнадо'. Тарем мэнаханда пароход сятаний хэвды нида ла'амда', посара. Челюскиннгэ ид паны, сэр' паны. Пароход ервота Воронин төрей':

— Нго сэро' ни' тер ха'аврада'!

Челюскинец' нгавор' нгэдакы', харад тангга' нгэдакы', иба паны' нгэдакы', нефть хор' нгэдакы' тэри сэро' ни' тэвабидо'.

Тикыринда нгод пароход иде' ёрха' сэя. Нго сэро' ниня хибярингэ ха'лито' хай'.



Тецьда яв' нго сэро' ниня хад тамбир, мерця тамбир. Нгока понгганандо' не' хай'ма, тикы тяхамна ян нинянгэ мэсанако нгацекы' хай'.

Челюскинец' нид' лыдабтара'. Тикыринда нгод хэнггдамдо' хадепа пя'. Мятамдо' серта'. Минханда нгод радиом нгэдарамбабцямдо', радиом ня'мабцямдо' серта'.

Челюскинец' нермбэртя Шмидт радио юнм нгэдара: „Челюскин“ сэя.

Нганондо' мальё'махат, латахат инддедо' я'амни' е'эмня барак харадм серта'. Тэри индкато' савахавя' мяртавы мяка'нато' хай'.

Нянэхэвавна аэроплан нгамдсянгэ салмравы сэрм серта тарасава. Челюскинец' пон аэродром сертаба манзара'. Сибиркавна сиддо' хова е'эмня аэродромдо' ненадумдангг' падалнга'. Аэродромдо' ненадумдад ни' советской флагм нгыда'.

27 февраль яляхана майва яля то: Сталинхад, советской правительство членхат радио юн то.

Челюскинецха' большевистской вадам нгэдарамбива'. Нгобннгэв юнримда' пэрнгава'. Сидда' нядаванзь парумбива'. Экспедициямда' сававна ёльцеван нгули' енава'. Несэйвана талабтана серта' историян паднгу'.

Нго сэро' ниня иле саць санггово'нгась, пэвдяда пэвсава, тецьдада тецьсава. Нго сэр'я нгобпиня тяха' итя нгабтенявнанда ху'лёсава.

Нгамгэхэртад ниць таят': партия, советской власть няданггован енаса'ма. Нго сэро' ниня мэвамдо' хумна нись пю' нгатена'ма, манзара'ма.

Аэродромдандо' салмравы ямдо' нгули' лэтрамбава серта янгуусь: хад тохорасетыда, нибта нгани сэрта лекасеты'.

Тикы пуна нгани несэй ян аэродромдамдо' сертасеты'... Нгули' аэропландамдо' нгателцеты'...

Тайна хунанда яна' тавна аэропланха'на летчик' мингаць. 'Сэро' ниня мэна нидо' нядаванзь минза'ма. Нгамгэ нгод аэропланха'на минди летчик хад мадарпасидава, синё мадарпасидава, сыра мадарпасидава, тецьдар мадарпасидава. Нгод тарем нгод аэроплан' пиняри' выдбидонзь.

Март самлянзимдей яляхана аэродромхад вада то. Мэсьна' нимня аэроплан нгадимя. Мал' нгокхандо' аэродром няю' пядо'.

Лэркабт төр сулъяй'.

— Аэропланэй! Сидна' хонгов'!

Челюскинец' майд'.

Сидям моторта аэроплан моторта ялна тасикумна мэсьндо' нимня хэхэя, минзенда минамда лэхэрпа нгоб' сюрхалъяй', аэродромдо' ни' нгамды'.

Шмидт табадярмна аэроплан сямянхат нерня недо', нгацекеыдо' хана.

Апрель ирий 10 яля нгэсонд летчикна' челюскинец' мэся' нгэсонд тэва я'мыд'. Тангок ялы' ямбан летчикна' хад мадарпида, синё мадарпида, тецьда мадарпида.

Сямян яна' тер' тикы' ямбхана летчикна' тирма юнрим газетахана толабиць. Мал'

совет яна' тер' иленя' ибидо' челюскинец'
няримна нгаць. Хусувэй яля манэ'маха' мер'
газета тэмдабидонзь. Хусувэй хибя хада-
халысь, хай, нгамгэмбир челюскинецм ниб-
теб'нандо'.



Апрель 10 яляхана челюскинец' мэсь'
аэродром нимня нгани аэроплан' нгадимя'.

Тет яляхана самляннг аэроплан' челюски-
нец' тюку' нго сэро' нид ханаядо'. Апрель
13 яляхана аэроплан' пудана мат' челюски-
нецм сода'.

Аэроплангэ тю'у' ти' малёходандо' пудана
мэва челюскинец' мэ'мам сюртедо'. Нго сэро'

ниня советской няръяна флагри лабыбтё хай.

Нгарка яна' тер' нгокхандо' челюскинец илебтеван маидаць.

Сямян ё' тер' советской летчикна' сававна мел'мана тирман пысымбиць.

Советской правительство герой-летчикха'на' наградангэ орден ми'нга, еся премия ми'нга.

Вопрос':

1. Челюскин пароход ханя' нгэдаравы нгэса?
2. Нгамгэ Челюскин пароход сэйса?
3. Челюскинец' ханзер' нго сэро' ниня илеса'?
4. Челюскинец нядаванзь аэроплан хибя нгэдарасида?
5. Челюскинец ханзер' илебтесидо'?

Нгамдарма нимня аэроплан нгадимя.

(Тоходанна ваде'мы.)

Небой похона Нгамдарман нгока аэроплан тось. Нюртей аэропланм тарем ядабта-вась.

Ялей нгаворм хосая хэванзь мэдамзь. Хардани танцие' ни' тарп'махадани лэркабт аэроплан мунм намдадм. Мер' мервана хардахани тюдм. Нгавра'ни нгэсяко хаеян. Аэроплан нгэсына' нимня сюра. Няхар' сюрхалъй'. Тахаби нгамды'. Тикавахана аэропланан сюрбыв'.

Сян яля нгэсонггана нгани' сидя аэроп-

ланм нгателнгава'. Нгамдарман Водопьянов товндась. Сава нумгана яля ямбан нгатенава'. Нгамгэ нгэбта нго' аэроплан' ни' ту'. Няби ялянда пэвсюмбы няна хаднгэ хая. Аэроплан нгули' ниваць нгате'.

Хардаханани нгамдыдм. Урокни хамадам-бидм. Хибяхава төревонда:

— Нгамдармана' нимня аэроплан нгадимя.

Санаюв'. Тэри лыдомбидм. Паныни серадм. Сырпа'ни хардана' мюня хибяхарт нивы хаю'. Сюри тарцядарев' савами ё'нгадм. Пин сюр-быв'. Хибярингэ аэродром няю' тидхалъяд'. Аэропланнгэ синянда сюра'.

Аэроплан' нгамд'махад хуркари лозунг төрпа пява'.

Няхарамдэй яляхана летчикна'ня нгоб' фотографической карточкан тадабтайна'. Тики пуна Водопьянован сидя пионер флагкоцям ми'нгава'.

Водопьянов няна' ма:

— Тюку флагкоцида' Северной полюсан ханангун.

Сохахад аэропланан.

(Советской Союз герой — М. Водопьянов летчик ваде'мы.)

Мань манггбада крестьянин семьяхана соядамзь.

Си'ив пони нгэва мальнггана ирихини манзь пэрмэдм.

— Юну, корова пэртядм нгэнггудм, садкобця пикадармам няна' мэнев.

Юно, корова пэртянгэ нидм хань'. Гражданской сайнормангэ хая. Хар'н ихини Няръяна Армиян хаядм.

Сайнолвахана автомобилъм манэ'нгадм.



„Шофер нгэб' сава нгэвье,“ — ихиняни мадма, тикыринда нгод автомобилъм нензимдабдангэ тоходана пяв. По ваерахава шофернгэ хаядм.

Сидя по нгэсонггана сайнорць мэта аэропланхана нюртей мэва тиюв'.

Тикавахана нгани' несэй харвабцоми нгадимя.

„Летчикадм нгэван харвадм, летчикадм нгэнггудм“.

Таня мальнггана 23 поминзь. Нгод тарем нгод падарм няна' тянёвна теневадамзь. Аэроплан машина тэри машина вуни нга'. Невхэни нимня тоходана пяв. Нгопорингэ нивакэв пирда'ленггу'. Нини си'ми нядабаса'ма.

Маня' ява', маня' партиява', маня' правительствова' си'ми няда'.

Си'ми тоходанванзь нгэдара'. Школахана сян по' тоходанадм. Хусувэй винтм, хусувэй машина частъм сававна теневава е'эмня мэёвна тоходанадамзь. Тохолкодадани Спирин нява' тарась. Тадхава ти, мань летчикадм!

Летчикна' нгока'. Сямянхат тю'у' тиван харвадамзь, сямянхат нгаха' тиван харвадамзь, сямянхат тю'умна пон тирман харвадамзь. Аэроплан тирмдавэй ян тиван харвадамзь. Аэроплан тирмдавэй я Север нгэ' нисяв'. Север е'эмня падда нгока книгам толадм. Северной полюсан тиванзь сиднет по' хамекурнгадамзь. Тикы'ни малхана ти, „Н-170“ аэропланми Северной полюсан тирць минга. Хэвханани Спирин тохолкодами мэ.

— Нгылнана' — Северной полюс! — инда няркна ман'ма.

Ини ядэрабц талей'.

Вопрос':

1. Нюртенанда Водопьянов хибя нгэван харваса?
2. Хибянгэ хая?
3. Хибя тоходана нядабасада?
4. Водопьянов хурка инда ядэрабц талеси'?

Папанин мядонда'.

(Субботин тоходанна ваде'мы.)

Иван Дмитриевич Папанин хардан това'. Цветы, мядонзэй тава'.

Нюртей мядонзэйм октябренок Гога Ягунов та. Нгарка лабтэйком мине. Лабтэйко мюня папанинец' лагерь нго'ма макет нга. Гогангэ нянгота падаркад, ватахад макетмда харта сертавэда. Иван Дмитриевич макетм сававна манэ'нгада, инда ядан ма:

— Гога, ян похобэн, маня' лагерьна'

тотрев' сертавэр. Сэр' ниня иле'мава' сававна
талабтамбвэр. Тюку мядонзэмд Кренкелян,
Федорован, Ширшован манэ'лабтанггув.

Папанин Гогам нгудита ни' илада, нюцяда.

— Харта' нгани хуркавна тоходанада',
отметкада' хурка'? — Иван Дмитриевич юн-
ра пя.



Нгацеки' школахандо' халадо'. Иван
Дмитриевич сидна' юндалтаба пя:

— Школахананда' отличникда' нгока'ам?

Отличникна' нгока нива нгэвам намд' ма-
хаданда манзь ханада:

— Цветыта', мядонзэта' е'эмня спасибо.
Нюртенанда саваркавна тоходанна нгацеки'

школан хантадм. Тетнгэ сэро' ниня мэвана' мальнггана тарем валытаваць.

Савари вади' Советской Союз геройня сидян хаяваць.

Нёнда хэвхана нгани' мядондида пионер', рабочий', летчик', ученый' нувыць.

Вопрос':

1. Нгацекы' хибян то'?
2. Гога хурка мядонзэйм Папанинан таса?
3. Папанин мядонзэнда е'эмня ха'манза?
4. Нгацекэхэт нгамгэм юнраса?
5. Нгацекы' хаман ха'манза?

Валерий Чкалов.

Волга яха вархана нгэда ниня нгарка нгэсыхына Валерий Чкалов вадысь.

Валерий саць пэдава нгацекы нгэвы. Тяхари сававна сюрбермы. Лата Волгам нгохолпавы. Нгэсында нгацекы'ня мэкад сянако сянаку'мы.

Валерий нися ед пэрта рабочий нгэвы. Семьядо' манггба илевы. Валерий саць мер' манзара пявэда.

Сидя янгганя потаханда пароходан кочегарнгэ хэвы. Тикы пуна ядлавахана молотм ютбадангэ хэвы. Нисянда невхы лад панэхэна, нисянда нгэ' сенггана ядэрмы. Хусувэй яля 10—12 час сангговота молотхана ютнавы.



Хуна нгобингуна марто' нимня аэроплан' хан'мы'. Мотор мунм намдхава янзавэй, нёхонда хамдумба пин сананггавы.

Ти мале аэроплан нга'на хая. Нга'на месокорида нгади. Валерий тамна ну. Нумлин сырнга. Ида ядэрмы: „Тихивабэ“... Аэроплан сэвха' тяхама. Валерий тирма нямна ида ядэрнга. Ядлаваханда тю, нгани нгод сангговота молотмда ила.

Яна' нгардан гражданской сайнорма мингась. Самляннг янганя пота Валерий родинамда нгэдабаванзь харта Няръяна Армиян хая. Авиочастян еремя. Аэроплан сулорпа пя. Няна' маймбисе. Валерий аэроплан хаяко маниейдась. Ти тадхава изучивамбир' нгэса'ма. Няна' тирман харвась. Тирма серт няна' тоходанван харвась.

Няръяна Армия врагда няялъяда. Валерий Чкаловм летной школан тоходанванзь нгэдарадонзь. Чкалов летной серт няна' харва тоходанась. Истребитель ядэлана летчикнгэ хая. Тивкабтада Няръяна Армия тю'умна тиртя боецнгэ хая. Молотм ладыбаванда мальнггана инда ядэра'ма тахаби талей'.

Сава тирмахананда хибяри пысыбтамбись. Юнда яна' тавна латы'. Чкалов тикири тирмаханда ни' табас'.

Сямянхат тю'умна, сямянхат нгаха', ся-

мянхат мересарка тирць! — тикы е'эмня Чкалов пёдась. Мал' тикы советской летчик' лозунгнэ хая.

Чкалов торомбэй нгэванда сели' едэй машина хорпадангэ хая.

Хорпувдавэй машина' ханянгэхэна тю'уна вовормы'. Тю'уд пэдрев' ян ха'амварида хаёда. Янгго, Чкалов ни' лыдабтара'. Парашютхана вуни' сана'. Тенева нгамтада.

1935 похона Чкалов аэродромхана нюртей мэва' Сталин нява' манэ'мы.

— Нгамгэ парашютм нин мэс'? — Сталин юндалы'.

— Едэвна хорпада мирета машинаха'на тирнгадм. Машина тахаравонггаданда лэтрамбидм, — Чкалов ма.

Сталин нява' нянда ма:

— Пыдар илевар хуркари машинахад мире'нга. Тарабата парашютм мэць тара.

Чкалов Сталинм манэ'па'манда пуна тамна сатакувна советской летчик сахарамбавам хамадада.

Советской авиация ныхым яндир' ниня иленяха' манэ'лабтава е'эмня невхэта нимня манзара пяда.

1936 по тангы'.

Московской аэродромхад хэвдэнда ниня „Сталинской сехэры“ падда аэроплан илы', восток няю' тидхалъй'...

Чкалов, Байдуков, Беляков аэроплан
ниня тияд'.

Нгамдормадавэй та нгар ява' малнгада.
Чкалов аэроплан 56 час 20 минута нгэсонг-
гана Дальной Востокан нгамды'.

Тикы нерня хибяхарт нгамдормадавэй
танггун ян нись тир'.

Сталин табадяр' талевы.

По ваерахава Чкалов Северной полюс
нимня Американ тий'.

Сарё, хад, синё помна, вы', океан сэро'
нимня сата лимбядарев' няръяна тотна Чка-
лов аэроплан пены. Чкалов аэроплан минзь-
мана тюконда тяхана тамна хибяхарт нись
тир' 63 час нгэсонггавана аэропланмда Аме-
рикахана нгамдрабтада.

Чкалов пили' нюртенгэ СССРхад Се-
верной полюс нимня Американ тирма сехэ-
рым хана.

Советской герой Чкалов, Байдуков, Бе-
ляков юндо' латы' яндир' нимня.

Советской летчикна' пили' Чкалов то'-
лаха пинва техэ' нгэнггу'.

Советской аэропланна' пили' смянхат
тю'умна, смянхат нгаха', смянхат мере-
сарка тирта'.

Вопрос':

1. Чкалов ханзер' вадёданса?
2. Аэроплан ниня тирман харвавада ся'ня нгадимза?
3. Гражданской сайнорма мальнгана Чкалов ханя'
тюса?

4. Летной школам ёльце'махаданда хибянгэ хая?
5. Хуна, сяха' Чкалов Сталин нява' ядабтасада?
6. Чкалов хурка тирмамда „Сталинской сехэрэнгэ“ нюмдеса?
7. Хибя нюртенгэ Северной полюс нимня СССРхад Американ тиси'?

Задание:

Рассказхана Сталин няна' Чкаловня лаханако'ма ямда ваде'нгада'.

Алексей Стаханов.

Стаханов Алексей манггдабада нгэсыхына соявы, вадёвы. Нисяда, небыда недьбяко ед март манзараванзь хан'мэхэ'.

Алексей сидя янгганя потаханда кулак няёлабцянд манзараванзь хэвы. Яля ямбан сангговота нгэсянго тэвабавы. Пий нумгана ерванда юно лэтмбавы.

Октябрьской революция Стаханов илм нганингэ ханада. Тадхава шахтан манзараванзь хая.

Невхы шахтер' нгули' сававна ядабтадо'. Едэй манзаян торомдана нядадо'. Мербяривна Алексей Стаханов пэ ята'мам сававна лабпадангэ хая. Нгобниггэв' тюлыбадамда ята'мамда нгокамдаван харвадась. Тадхава тоходана пяда:



Технической экзаменм отличноювна сер-
тада. Несэйвана манзара идей’.

Алексей Стаханов харта манзаянда е’эмня
тарем лаханавы:

Пэ ята’мам лабпада пэ ята’мам лабпа-
рибта тара. Нгани нгамгэм пэрпата ни тара’.

1935 похона международной юношеской
яля нерцюй пихина Алексей Стаханов шах-
таханда ха’мы’. Тикы пихина едэй серев’
манзара пя’нидав’. Едэй лабпада невхэ-
данда юд мэвавна нгокарка нгэвы. Стаха-
нов манзарава серев’ няби шахтер’ нгод
манзара пядо’. Тюлыбада ята’мангэ нгокма.

Стаханов серев’ манзарава мал’ Союз
тавна латы’. Стахановец’ маня’ яханана’
сямянхат нерденя хибя’.

Москва маркана стахановец’ совещание-
хэна Алексей Стаханов мась:

Великой Сталин ябдана иланд сидна’
минре. Пыда е’эмнянда, большевистской
партия е’эмня, мэнена родинана’ е’эмня пили’
малханда илма’ миць хамадыва’.

Вопрос’:

1. Стаханов ханяна сояса, ханяна манзараса?
2. Хибян манзараванзь хэса?
3. Октябрьской революция пуна Стаханов ханяна манзараса?
4. Нгамгэн нгобннгэв харваса?
5. Стаханов едэвна манзара пя’махаданда нгоб’ ман-
заравахананда нгамгэмбир ята’мам тюхулца?
6. Хурка хибя стахановецнгэ нюмдеба пяся’?



Няхар' герой не.

1938 по сентябрь ирий 24 яля хубта. Москва аэродромхад „Родинам“ нубета аэроплан Дальний Востокан тий'.

„Родинам“ ниня пинна' Валентина Гризодубова, Марина Раскова, Полина Осипенко минредо'.

„Родина“ нгамдуддавэй сян ёнар' километрм хаевндась.

Тайна хунанда няхар' летчик не пи' пэвдяхана, синё нумгана табадавы ян пиняри' пэрнгадо'.

Сентябрь 25 яля хубтахана „Родинахад“ юн мацеда. Няхар' яля ямб сынгрёдо' янггу.

Мер' мервана Советской правительство пюдереванзь аэроплан нгэдара.

Раскова санай'.

„Родина“ тирць мимбта тяхари санггово'-мы. Янгэ тире' тяхама. Хэхэ сарё нгэванзь мэ.

Аэроплан тю'ури' пэрнгада. Нгаркавна тю'-
умна минзь тяхари тецьвы. Нгаво' пиркана
радиондо' аппарат мас'ма юр' ханимя. Юн
нгэдо'ла я'малнга'. „Родина“ Дальний Вос-
ток пэдара нимня минга. Лэркабт приборта
манэ'лабтабабцьнггана няръяна ту нгадимя.
Бензин янггумданвам манэ'лабтаби. Летчик
не' таси' сылыд'. Нгамднана яда пилибтари'
янггу. Ялринда пэдара. Лымбдан машинамдо'
нгамта идеяд'. Тарем нгамдва тяхаринда
тосакабтысь. Нянэхэвавна Раскова мэсь'
няна' тосакабтада яхана, аэроплан пыхана
нгась.

Нгадьбянда Расковам парашютхана сана
табададо'.

„Родинам“ ходо'.

Гризодубова, Осипенко аэропланмди'
лымбдан мел'мана нгамтади'.

— Илен?—Гризодубова ма.

— Иледм,—Осипенко ман'ма.

Летчик нехэ' аэропланди' мюд тарпыхы'.
Аэропланди' хад хэ'мяда янггу. Раскованди'
нямна ибеди' тэтналъяд'. Нямди' хонрамба
сян мэва енернгаха'.

Пингэ хая. Нгамгэхэва маркадаванонда.

Марина минга—Летчик нехэ' майяха'.

Тикава Марина нивы нга'. Ян хахаяко
нгарка варк ну. Нгэвамда тю'у' ила, нгабтиє.
Нгабтиєвамда ёльце'махаданда пэдаран хая.

Ялянгэ ваенгга'. Раскова сынггрёда янггу.

Октябрь 3 яляхана аэроплан нгадимя.
Летчик нехэ' мэся нимня сян сюрхалгъй'.
Тахаби хая.

„Родина“ мэсь' ям манэкава юн яна'
тавна хая.

Няби яляхана Комсомольскхад сян аэро-
план то. Летчик нехэ' нгаврад, юн падарм,
илесянди' танггад мо'. Нгобтики яляхана
нгани нгоб' аэроплан нгадимя. Ниданда тет
хибя парашютхана санаяд'.

Манзь ханадо':

— Нгамгэ няд'ма тара?

— Расковам хось тара!— Летчик нехэ'
мангаха'.

Раскова радинам пю.

Расковангэ санаванда мальнггана пара-
шютда пя малан таркавы'. Тю'у' нгыдаравы'.
Пя таркам хадада. Пыдамда парашютхад
ека'махаданда пявна ян ха'амвы'.

Туни пенд намда. Няхаюта хонарко
пенднгэ пяйда. Туни пенд няю' ядалгъй'.
Паль' пэдара помна яда. Лымбад явна
нинда сяр'ман сумгадарнга. Нянда хар-
вана сармик туни педхана пидебида. Нгав-
рада нябида пеля шоколад плиткари нгэвы.
Тудако хоб'нанда нгамзь пэрмыда, нгодняко
хоб'нанда нгамзь пэрмыда. Хо вэбам нго'
нгамзь пэрмы. Нгобкад пере сян яля минга.
Нгамгэхэртм ни хо'. Ихинянда ма: „хадри

туни пенд тэдарма си'ми тэмбараванггабя".
Тикавана няби няю' ядалъй'.

Юд яля тарем яда. Хэй, нгаво' пиркана
„Родинамда“ манэ'нга. Майванда сер' пэда-
вамда юра сюрба пяда. Нерданда миндя'
нгод сюрби'. Тадхава няхар' ниня пинна
летчик не нгани нгобт тэвыд'.

Салъяд'.

Няхар' герой не победасавэй Москван
салъяд'.

Вокзалхана сяне ёнар' хибяри' няхар'
герой нем ядабтайдо'. Нгока ёнар' хибя
няхар' не героян приветствием ваде'нга'.

Нгамдормадавэй 6000 километр тирць
хая'. Родинандо' е'эмня советской не' миро-
вой рекордм серта'.

Хари' небядарев' великой советской
я ядабтайда.

Великий Сталин хари' нисядарев' няхар'
герой нем ядабтамбидась.

Вопрос':

1. Ханяд, Сяха „Родинам“ нюбета аэроплан тирць
минза?

2. Аэроплан ниня хибя' тирць минза'?

3. Нгамгэ Раскова санабта таралци'?

4. Няхаюда ханя' нгамдсихи'?

5. Нгамд'мади' ян хибя тирць тоса?

6. Раскова „Родина“ аэропланмда ханзер' плюсада?

7. Герой не ханзер' Москвахана ядабтасидо'?

Карацупа пограничник.

Полтавкам нюбета застава ян граница хэвхана нга. Заставана', манчжурской марад сидяха' помна нюдякоця яхакоця ха'морнга. Валакада тикы яхакоця сидмбихиюда. Советской я няюд сырп' марад помна ядэртидо' тюку' нгади'. Ялей нумгана таяна палытана' ядэрнга'. Тикындо' тяхамна мирвдавы хибя' машинахана пуны', нерня' вэнэрнга'.

Пэвсюмб' хою' ниня сехэрэ'эмна нгули' сынггоси.

Нгод тарем нгод маня' пограничникна' Советской Союзна' граница пи', ялы' лэтрамбидо'.

Полтавкам нюбета заставахана Карацупа пограничник тара. Границам лэтрамба Индусм нюбета вэнекода няданггу. Вэнеконданы поёди' нгули' сава'. Карацупангэ Индусм нюбета вэнекомда харта вадавэда. Нюкця вэнекоцянда е'эмня кашкам пире пэрмы. Нацкабтада нумгана шинельхананда тондабюрмэда. Вэнекода вады, мэбернга. Тадхава пограничник няданггодангэ хая.

Нгобнгуна Карацупа нгани пограничник нитаня пи' ямда малпа хая. Нгаво' пиркана Индус нихива сатавна нгарналъй'.

„Нгамгэхэва тая“ — Карацупа инда нгылри ма. Вэнекода нгамгэхэвам япа пя. Тарем мэнаханда вэнекода нгут терей'. Нгудо нёда пя. Карацупа Ермолаев няданя вэне-

конди' пумна сюрбихи'. Тет километр сюр-
бихи'. Ермолаев нульй'. Карацупа тамна
тяха' пяда. Границахад ниня нга'на Карацупа
хасую' хибям манэ'нга. Ханзер' нгэнггу?
Пыдо' хасуюто' пыда нгани нгопори, нянанда
нгэда мирвда нгоб' револьвер. Нгамгэри
нгэбта нго' границам мадавы мадарць идей'.
Хахая тэвхава нгоб' төрей':

— Нуя!

Хибярингэ ян хылтадаяд'. Карацупа враг
тэмбара идей'. Пэвдя нумгана нгани погра-
ничник нита таядадрев' төрей':

— Загайнов, Харламов, сидя хэвувнандо'
тетлад хаяда'! Нгодь' хибяхава сюрба пябта
тикыри яханда едпида'. Мань нгани нгавото'
танявам манэтадм...

Пограничник границам мадавы ю' кило-
метр пират тайда. Граница комендатуран
тэврайда. Ю' километр миманда ямбан
нгобннггэв' нгамгэ тая мэна пумнанда миндя
няхата табекодадарев' төрсе.

Вопрос':

1. Границам лэтрамба Карацунам хибя нядабида?
2. Карацупа Индусмда ханзер' вадабасада?
3. Нгобннггуна Индус хибям нгу'умнанда ватаса?
4. Граница хэвхана Карацупа сян границам мадавым
манэца?
5. Карацупа границам мадавы ханзер' тэмбарасида?

Границам лэтмбада Динго.

Пий'. Пэдарангэ хониндарха. Нгыхы Дальневосточной крайхана пэдара ёсеркана пограничник лынггары. Пэвдя пихина лэр-кабт сидя сэр' панытана тидм хамада. Сидя сэр' наным мэта сэр' сыра нимня минзь сэр' паныди' нгэдянго'олвыди'. Таня нгадь-бата граница няюд мингаха'.



Боец икда ямбуволы': „хибя минга?“

Ехэранаха' сюрба варцяттеди'. Хаданди' тяхамаха'. Тикавахана пограничник няданг-годаданда сямян вэно' ний Дингом нюбета вэнм хай' нив'. Дингонгэ нгудо ханада'ла'-махаданда хунбади няхар' ю' километр хун-

кана хойда. Хунортаха' хо'махавад сид'няд туни пенд' яльцеда'. Нгоб' ехэранам та хэвдаледо'. Нябиюм' нгани нго' хуны'. Мербяривна Динго нгани нгудо ханада'лайда. Нгу'лихинда пяда.

Лэркабт нгута нгани юху... Хардыта вэнекоход нгудода ёхорамба пя ни' танавы'. Нгоб' пяхад няби пян мо' нимня миндаханда нгамгэмбиркон тю'умна хэ' нив'. Динго ханзеркарт хамада я'мада. Пуня', нерня' тэри пяраса. Тю'уняю' пыярим нгодо'ла. Тарем сюрнаханда нгани нгудм хода.

Границам мадавы нянготе'э пя тяха' сакада. Сита нёданаха' енелы'. Вэнеконгэ границам мадавэн сянри' санай', тасий ян мантэдада. Тикымбохонда пограничник' то'. Границам мадавым та ня'мадо'.

Белогвардеец нгэвы. Шпионнгэ тэмдарабэй нгэвы. Ервота табадярмна еся сехэры пулва' тахабтаван харвавы.

Вопрос':

1. Пограничник пи' нгамгэм манэца?
2. Границам мадавы' нгудо'мана хибя хэса?
3. Пограничник' нгоб' границам мадавым ханзер мэсадо'?
4. Динго нгамгэ няби границам мадавы нгудм пон хось я'амсада?
5. Няби границам мадавым Динго ханяна хосада?

Пионер' шпионм ня'ма пограничник няда'.

Падта'мавна рассказм сертада'.



Пионер пэдаракана
нгамгэм пэрцаха'?



Хибям манэ'нгаха'?



Пионерха' нгамгэм
сертасаха'?



Не нгацекы ханя'
сюрба то?



Хибя не нгацекыня
сюрби?



Пограничник' хибям
мадарнга'.



Сармик'.

Ирими пэдарам летмбадангэ тарась. Нгоб' мэва пэдара помна хардаханда ядвы. Мале пэвсюмдана. Хэхэ' сарё нгэванзь мэ. Лэркабт ирими нгобебцм намда. Ирими ензида ямбумда нгод тарем нгод нгобебцангэ нгобпиня хахаялтаны'. Тарем мэнаханда сехэрэвна ирими хаця' сюрбарка пяда. Тад пуны' васадай'. Нгамгэда нгэса?—Пунда няна ту морёкорха' есабарнга'. Тарем инзелеб'нанда сармикангэ тивто' ла'нари' минга'.

Нгаво' пиркана ирими нгарка'я хады пямо'омна танай'. Ирими манэць сармик' пянда хэван та нулъяд'. Сян сярмик' пявна пуныто' ни' нулъяд', пя сябтм нгоб' сяторпа хадепа пядо'. Тарцям манэць ирими тамна тю'у' танай'.

Мэпат мандон тикы яхана сармик' нго-
бернга', хадеторнга'.

Пингэ хая. Иrimi ихинянда ма: „Хад
нго' пи ямбан пя мо' ниня нгамдэ таранггу“. Тю'у' тана'махаданда ханя сававна мо' ни'
нгамды'. Тад мерця сахар' тебванзер', мо'
манзада', ирини савам мерця пу'лабтада.
Ха'амна ирини савам сармик' нгоб' секад-
тадо', манэ'маха' мер' тодо' яха' нгад'нгадо'.
Сармика'я' пиндо' нганивам тю'у' нихира
нгоберць хаедо'. Тикы ямбхана иrimi савам-
бовна нямгадэ пимда ваяртада, нгамдэванда
ямбан пята тэри садыбты.

Тарем пи ямбан нгамды. Нумда ялумзь
сармик' хая'. Валакада сармик' хэ'мяхад
ирими пянда нид ха'мы', тадхава ерангго
мэтада хардакохонда хая.

Пухуцяда төрей':

— Нгамгэр хадкэ?

— Сармикахат пыдами нгэдаба, сарёмда
ваяртамбидамзь.

Тикы вадида мэса'махаданда нгамдэсянда
ни' хонарай'.

*Сармик тарито' аляко' нлэва
е'элиня тунидо' хадабу', тым
хадабавандо' е'элиня хибяри'
хадабидо'. Сармик паньдо' ни-
данго' сэдм'.*



Ниня пинана нява.

(Лаханако.)

Ся'ны нгэбта нго' нявакоця пэдарахана
соаявы. Нгули' хусувэй се'нахад пина.

Ханяхавахана мокоця маркадаб', тиртя
лямбамб' пя нид сехэкоця мантаб' нявакоця
сейда пу'ла' хацясеты'.

Нявакоця яля' пинава, няби пинава, си'ив
пинава, тарем мэнаханда тас по' пина.

По' ваерахава нявакоця вадёдакы, лэр-
кабт пина нгоца.

Нявакоця'я пэдара нгардан төрей':

— Нгамгэхэртад нидм пин'. Ха'мам-
бата' ха'мангада', ят нгамгэхэрт пилютами
янгу.

Няби нявакоця' мамбато' мацьню':

— Сэв пайков, пыдар нгамгэ сармикахад нин пин'.

Нявакоцяр ватон ни нга', масьню':

— 'Сармикахад нидм пин', тёняхоход нидм пин'. Сармик хадаха'ни ерембата харта сита нгамдадм.

Нябид мацьню':

— Писякабтынэй. Са'лаенэй.

Нявако' сармикм тёрпавандо' малхана сармикэця тая мэвэраха. Сармикэця харта серо'мананда ядэро'махаданда лэркабт нявако' мандалаван тэвы'.

Тарця нюрцям намдхава нгамлавада нго' сульй'.

Ихинянда ма: „Нявакоця нгамзам нгамгваб'нани саварка нгэись“.

Тикавахана харида яраби, нгаво' пиркана инзелеб'нанда ян хахая нявакоця' мэвондо', тикында тяхана сита нго' ваде'мондо'. Нгабтиехэя янамбоковна вацадолы'. Тарем мэнаханда сянэрта няваха' ян хахаяко тэвы'.

Тарем соб'нанда сита писедаванондо', смянхат нята нимня сэв пай тэваси нявакоця саханюм' мэ'монда.

„Нухурнгая, нят понггад тэрахая сит нгамдадм“, — ихинянда ма.

Тикы тарця нгэхэва нята нимня' сата нявакоцям санго пюлада. Нявакоця' нгамгэм

ниня' маниена' нерыто' нимня сахадарма-
нондо'. Нгаво' пиркана саханюм' пэрмы ня-
вакоця саликэця ни' танай', тэванда ни'
нгамдхая лахана пяда.

— Сейсей', инзеледа'! Инзеледа', няни
сырнгада'! Теда' нянда' нгоб' нгамгэм манэ'-
лабтанггудм... Тям... Тям...

Неры саханюм' мэ'мы нянда ё'нга. Хар-
дыта сармикм манэ'мы. Нгани' нгамгэм вуни'
мание', сармикм маниенана' нгани индкартада
мадаръй'. Тикы пухувана ханя нивы 'евы
сернгэ хая.

Нгаркадавы нявакоцява' тад тю'у' сана-
вада яхана мандалакодарев' сейнда хэсь
сармиканда лата тай ни' нгоб' пикада. Тад-
хава сармиканда маха' хунзер' мандалюйковна
манрамба хая, тамна тю'умна тибтёва
хая.

Тикы яхад нивэда хамада' хумна хо-
бамда нгадаць нявотавамда. Сянад хунад
нявотавы нгэбта ныхысяламзь хэцяламзь ян
мантай'.

Хурка нявотаванда ямбан сармикада хата
тарем хэсь енядаха'нанда сяклюртарыхась.
Ти валакада, неро мансо' понд сэвда хаемла
мантай'.

Тикы ямбхана сармикангэ няби янда
сеян хобамда нгадаць нявоты. Хурка пыда
нго' сейда хэвы.

Нявакоця тайханда пикадава мальнггана хибяхавам нянда енертархам намд' нивъюв'. Тад няби янда сеян нявота'мада тикыхы.

Сармикар ихинянда ма: „Пэдарахана иленя нява тянё вуни нга', неры исялмбада нява таня нго' хэя, хананада янгу“.

Нявахава пильнзяхад вуни нга', тикьер пыдакоемда лэтрамби.

Нявакоцяе ханя нго' нявоту' тоеда вуни таня'.

Задание.

Лаханаком планвана ваде'нгара':

1. Нявакоця хусувэй нгамгэхэд пина.
2. Нявакоця посана.
3. Сармик нявакохо' вацуда.
4. Нявакоця сармикахад сейда хая.
5. Сармик нявакоход сейда хая.

*Нявахава пильнзяхад вуни
нга', пыдаанда лэтрамби.*

*Нявако ханя нявоту' тоеда
вуни таня'.*

*Сэр' янда малан сидя ту
ята'мал моёку'ла.*

Парюд ябтокоця.

Мюсенахана' лэркабт нерна' някуна вэнеко' нгамгэхэва нгыбарпа пя'. Тад таняку' сюрбыв', нгамгэв нгэса? Вэнеконгэ ябто ханикоци нэлдамби'. Таня нгадьбата Хакцями пудана ханикомда ниринада пявэда. Тикы яхана Хакцяхани төреюв'. Тарцям намда Хакцями нгахат хэ'мядяр' нгэсетыва нгэвадай'.

Таняна хаядм, ябтокоця хаником, ня'мав, небяхани тав. Небями ханикоцям хэнылада пяда, масьню':

— Тикы ябтокоцям ваданггув...

Ябтокоцям нгэсы ян тэврав. Нгэсо'махадана' нгамдэдэцядамда нид'нгадм. Нгамлавы ханикоця тэри сэвта пэва нгаволы'. Тадикахад небями нянькоцядамда ми'нга. Ябтокоця няньм нго' нгама.

Нгавнанда небями ябтокоцямда вада'-махаданда нгэдараван харвадась. Нгарва'-махаданда нгэмгэ нгэдарайта. Ябтокоця тад небяхани торомада яхана нгоб' енгга небяхадани ни хаюр'.

Хуна небяни ханя' нгэдалёб' ябтокоцяда ирмнянда тирцеты. Тирпата нго' ябто сёвнанда мунокаясеты. Ханянгэхэна ханавэй мунм намдриб'нанда небяхани нгани варнасеты.

Тарем мэ'наханда нум'я пявы нгэрэй' нувода. Иба я ня' ябто' ёндалмыд'. Небями

ябтокоцямда хибяридарев' лаханако ня'ал-
вэда. Небями масьню':

— Ябтокоцёв, сыркаёв', техэ' ти', нид
иба ёто' няна хаёв'.

Тарця вадахана вадам намдортадарев'
ямб икцямда я нгэсомана вэнггалахаявы,
нгобо' манзеты:

— Лалак-лак-ла-лак-лак...

Нгобнгуна ненэсянда нго' ёндана няхата
тю'ури' тарада. Таняна хунанда нида нгоб'
сюрхалеяда ялянда серев'. Нгамгэмбиркана
нята понд пакалкава тумдъита янгу.

Небями май':

— Тедахава ябто нюкцями пилибт
хэхэя.

Тарем мэнаханда ябто' мандал' сэвха'
тяхама. Тадхава мят тюва'. Хурка нговор-
мава' ёльце'махадана' пихина вэн' төреяд'.
Небями пин сылы', нгамгэва' нгэса?


Нё ядан ябтокоцява' тэса ха'мы. Ябто
сёвнанда сахадалъей'. Харта нгани иканда
тар' хэвдэнда тар' нинзьмы нгэвы. Не ерв-
ханда нгани нгэвакомда хылто'лада. Ханя
мандакы: „Техэ нини сямдъядангэ си'еми
ни' сода“.

Тарем мэнаханда хань' ха'молыд'. Сы-
рако' мирнелыд'.

Яханана' нгобкарт тиртя хаёдар янгу,
тюку'ли хая'. Нгопой ваданэ ябторива'
хаи.

Нгавка.

Хореко небяда юну' сыра пюсён хась. Хорекоця юнуйхад мяд хэвхана иле. Хорекоця юну' пон небямда юрванда нгэсонд нидонзь нгэдарамбю'. Мякана иле торова'-махаданда пили' нензецъ ядэрцеты. Нюрте'-энанда хуна мят туб'нанда вэнеко' нянда



нгарнасетыць. Торова'махаваданда пыда нго' вэно нида тыбарпю', вэн' нго' нянда нгарна нгэвадаяд'.

Харта нгани тарця нгэсеты. Хадырман харбелаб'нанда мята хэвняку' тан'мадавэй нядэн, нгамдэт хадырманзь хэсеты. Хадырмамда ёльце'махаданда мята хэван ва'анванзь тосеты. Ва'анбата нгани пили' нё ядхана мяд ханзохона нибта нгани мякана ва'ансеты.

Та' мальнггана ты' падеб' яля ямбан мякад нисеты' тарп'. Неняннг нумгана нгоб-

тики вада': мякад нисеты' тарп'. Хуна хадырць тарпбата хадырць ёльце'махаданда турукосавэй' мяканда нявотасеты. Пуркава-хана нгули' тальсись. Сян нгэда хацясетыда парада'.

Тарем мякана иленаханда ханя сававна вады. Нямдода ханя нгарка'. Лэкоцяда ихинда вадёвы суюн ни нгылда'. Тартя нго' ихинда илебеконгэ вадёда.

Хуна не ерванда ханя' хантанаб' Хореко турукосавэй' нявоталсеты'. Ханя' хантанан, мань нго' тутадм. Тикында не ервхананда хэсеты.

Ся'ны нгэбта нго' нгэрёй' нгэвы'. Нгоб' яхана нангадя си'ив минернга'. Мяд хэвхы нядамда нгамдэта мят турта ты' лабцадо'. Тад нго' нгэсь нго' харта тамна нгани ёда ханзинъяда.

Пэвсюмбы' нгэвы'. Хорекоця мякад ниня нга'на нгэда то хэвхы тэлкон илебей нгам-дэтамда нгаманзь хая.

Нер' нгавнанда сармикар Хореком нгатевада. Хореко нгахакана хэхэва сармик мяд няюд том едепа Хореком сахалада. Хореко нгамгэ ху вуни тоса'.

Нгамгэмбиркана сармикар пяда. Тарцям манэць Хореко сейконда хэсь, пуй нгэта ни' тарабтахая, турукосавэй' нерня' тарада. Иб' мята няю' сыласеты' нгамгэ мяд няд сармикар пармыбтамбида.

Иб' нявоты сармикангэ нго' та'альри

минга. Тикы яхана то харарим латраравы'. Ян ит сананаханда сармикар няби монзангганда хобам ныкал' нидав'. Хореко икана тэри хаторямда турута марна' я'авлы'. Тикымбохона Хореко туро' марнам намда то ет вэнгэ марнам ила'. Нгамгэда нгэвна мякад нго' ервода пин сандадо'.

Тарця марнахана сармиканд сейнда хэсь хэвня' нявоты'.

Хорекоця том нгохола'махаданда мята няна турукосавэй' нявота то.

Тигр нюкця.

Дальний Восток няна илеваць. Нисями хане'махаданда тигр нюкцям тавъе. Тигр нюкця понда пеля миндя вэн нюкця нгар.



Нгэвада мандалюй нгарка. Сэвхаюда ту'ленангаха'. Хунггляхаюда нгаркаханзь, мэбе'нгаханзь; пунгыда хунггляхаюта нгэломана ябтаркаханзь. Хэбянзели' нгули' нись нга',

нюдякоця вэн нюдрев' нисяни нгэн пыдамда лабцеда, тадхава нисяни нгэн ихинорць пяда. Тигр нюкцям нга'на нгэда нгарка то вархы нгумгана ня'амвэдонзь. Васькангэ нюмдебидонзь.

Хонаванзь хэхэва Васькам нгоб'нгэ харад мюня хаедома. Васька нгули' сырнга: пэби, тикында тяхамна хибяхарт янгу. Ти я'авкабтада тигр нгамдёся нид санай'. Сейнда хэсь харад мюмня нявоталы', марнам ила. Тикы тарця нгэхэва нисями нянда тарпы'.

Нисяни тохова Васька нисяхани маймба нявоты', пуна харта сермнянда сёнда мун' сулъяд'. Нисями тигр нюкцям несьдалтада, тадхава харта хонёлаваханда ханада, хонёлаваханда хана'махаданда хонарайна'.

Хувы няна Васькам вэнеко няхата нгадимдедо'. Вэнеко' тет нгэто' понд тэвдо' мэхэя хэвня' нявотыд'. Хад нгод тигр нгабт вэнекохо'на пильнзявы. Валакада нюдякоця харад вэнекоця тигр нюкцям сейхалнгада. Валакада пыдрида Васька нимня нгоб' санай', тадикахад тигр Васька хунгглям хадыбтада, нгоб' мадарць сянакулы'. Хурка Васька нго' вэнеко няю' янабоковна нот'-мэдё пяда. Васька хури янабоковна харад мюмня вацуданараха нгэсеты, мунзипой' нгод сянакосеты.

Васькангэ хибяри пыркабтадо саць сянакуць мэнесь. Хуна пыркабтадм тэвна яхана лохомда минханда ныкалцетыда, ныкла'махаданда сидя хунггल्याнда понд латрасетыда ханянгэхэна тад ладбата тар' тэри пудъясеты', нибта нгани' тибяха'нанда

тад пар'па пябта тэри нгарнасеты, ман-
дадарев': нгамгэ я'авкабтада сюдбядм.

Тикы сянаконда хавна Васька тамна
невхы нгэ мал харнакада танясь. Хуна
сянакоб'нанда тэри мэкадувна нгэ' мал се'
харнакамда писякодарев' пя лат' нимня
мантыласетыда.

Тикы хавна Васька нуна пяха' танта
мэнедась. Нибта нгэбта ян лынггабтанггу',
тадхава нгани тю'у' тарабтанггу'. Тарцянда
тоб' пя таркаком тивта, хадита хададаб'-
нанда я тю'укумна худырцеты.

Васька тяхари мер' вадёдана.

Тикы пуна нисями нись нго' пон нга'
зоологической садан мирда'нгадась.

Вопрос:

1. Тигр нюкця мирбьяда хурка нгэса?
2. Васька хибяня поёда сава' нгэса'?
3. Васька хурка ёроком мэнеса?

Сёхо'мяко.

(Лаханako.)

Сёхо'мяко то вархана илевы. Няхар'
нюкцямда нгамдалпи.

Хов, ся'ны' нгэбта нго' тёнякор ням-
билта.

Тёнякор манзь вэсьре:

— Сёхо'мяко сар'нюр та! Нгаворман
няна' харвадм.

Сёхо'мякор ма:

— Сар'нюкоми сяха' тавнав? Нюкцякоми сянгав.

Тёнякор ма:

— Сар'нюмд сямб'нанд тарм сеита палыхынани пямд маданггудм. Нюд нгамдадм, сит нгод нгамдадм.

Сёхо'мяко сейда хая. Нгоб' сар'нюкомда тёнян мода.

Тёнякор сянд пэдары' помна нявотармы нгэбта нгани' Сёхо'мякохонда то.

Манзь ханада:

— Сёхо'мяко, сар'нюр та'! Нгаворман харбелыв'.

Сёхо'мяко пиннае няби сар'нюкомда мо. Тёняконда хэ'мяхад Сёхо'мякор ярць хаи.

Нгаво' пиркана харнар то.

Манзь ханада:

— Сёхо'мяко, нгамгэм яртан?

Сёхо'мяко ма:

— Ханядм яр'? Тёнякоця турнгась, сидя нюкцями нгама.

Харнар ма:

— Харт нгамгэ нюкцяхаюд ми'нгахаюд.

Сёхо'мяко ма:

— Нюкцякохоюни нивы нгэб'нани мис' Тёнякор тарм сеита полыхынанда пями маданггу' нисядав'. Пями мадавы нгэбта нюни нгамдсава си'ми нго' нгамдсава.

Харнар ма:

— Хэ', Сёхо'мяко, са'лан нгэвэн. Тёняр ти сеямд хареби. Тарм сеита палынгэ ваде-тада палы вуни нга'. Тикы тэвада нгэ' нив'. Тадикахад нюд нёд мипю'.

Харна хэ'мяхад Тёнякор нгани нго' то. Нгахат вадида:

— Сёхо'мяко, няна' нгани' нгаворман харбелыв', Пудана нюкцямд та'!

Сёхо'мяко манзь ханада:

— Сар'нюкоми нив тат'. Сидя нюкцями нгаво'марир мэсь. Тахаби пями мадад!

Тарця вади намда Тёнякор нерцирей'. Сёхо'мяконда пя хэвувна сяне' худамзеты'. Тэвахананда пям тэри петембида. Тэванда есямзь пя паханд нгамды'. Нянда хорто'нга. Ида ядэлы': „Хадри сит харна тохолаван-ннгабя. Харвавы, харта нгод сава“.

Тикы яхад тёняко нявоты'. Тайна хунанда ёртяха' тэвы'. Халы' едэ' понд юсибтай'. Нялимда нянгарнга. Харнар то.

Харнар масью':

— Хай Тёняконгэ хавэнаню'. Нгамгэ нгардахавар янгувыню'.

Тёняконда няби сэвм сараданггусь. Тёнякор харнамда та сякалнгада.

Тёнякор ма:

— Ти, тедахава сит нгамдадм.

Харнар ма:

— Нямзенахарнгай! Тай яха савак нгэ-тенана салям нирув мание'. Тикахана си'ми нгав'. Сян мэва няни ихид мерець нявота тохоя си'ми нгамъин. Ян ид вархана си'ми хадава нгамгэда юнда.

Тарця вадахана тёнякор ма:

— Нгамгэда вэва, нгэя! Тедахава ере-мянва ху вунин хант'.

Тикавахана харнамда яха сяд ни' тандада. Яха савак саля малан харнамда нултада. Тёнякор хой ня' нявоты: Таняд Тёняр хавода хылтаць харнаханда нявоты'. Ян харнамда сякалътит нгэда таб'ла.

Тадхава ма:

— Хурка харнангэ сеяр хая?

Харна ма:

— Сейми хади'ни малан санай'.

Тёняр нябимдей тарем тальцеда.

Масьню':

— Харна, сеяр хая?

Харнар ма:

— Сейми яха ит санай'.


Тёняр пудана мэванда нганинда янго нявоты'. Харнаханда тэвоталкава Харнар нгоб' тибтамъй'. Тикы яхана Тёнякор минамда мадарць я'ма яха ванггхана мирня-рида хая.

Лаханаком падта'мавнанда ваде'нгара'.



Нямдода мирвета корова.

Нгобингуна нямдода мирвета коровава' таясь. Нгоб' суюхунда ладартаханда мэсь-нгартамда нямдха'на мальесь. Нямдода нгани нгули' ямбаць тид'ли' нгаць. Нисями нгока мэва корованда нямдо мадаванзь едтеяць, ханзеркава пили' тарерим пароцеты.



Тангы' нгэвы', небями корованда нгамяндерм хамда'махаданда, коровамда пин суюсавэй' нгэдаравы, тадхава неняхани ма:

— Феня, коровахаюд яха вангган-танахаюн. Таня хадырнгаяха'.

Феня нерокоцяхана коровахаюда танангахаюда. Харта нгани пя паханд нгамды'.

Фенянгэ инзелеб'нанда, нерокоця' сеславанондо'. Нгадьбата нгамгэхэва яляко неро' понггад тарпоты'. Феня ихинянда ма: „Хад нго' Серком нюбета вэнеко миндакы“.

Фенянэ вэнекомда нюмнанда халадо.

— Серко, Серко!

Тад сылы' сававна. Нгамгэда нгэса? Корова-
хаюда тикы ялякоход хобди' нгадаць санаяха'.

Феня нгэта ни' санай', пянда хэван
са'меръй', сую нгобтарем хэвханда са'меръй'.
Коровади' токою' сидди' пя ед пуйвэка-
нанда латра. Коровангэ нгэвамдади я нгэ-
сонд ню' лелабтавы, тадхава тэри нарырнга,
ям тыбарпива, нямдода нгани сармик няю'
тиндерейда.

Феня сейда хая, иб' тэренгуць тёр вада
янгу. Сармик нгадьбата ирт'ли' корован
нгэхэда тадикахад нгани пуня' санай', нга-
дьбата нюртей нгэхэдавахананда нямдха'
тебнархась.

Тарем мэнаханда сармикар корованда
хэвды няд нгэхэдарць пяда. Иб' нгэхэда-
сеты яндаха'на хорова нямдха' тебернга.
Ханяри санабата нгод нямдрихи' тебернга.

Нгамгэмбиркана не нгацекеы тэрылы'.

Та мальнггана нина' ниня нга'на манза-
раць. Тад не нгацекеы тёрм, корова нгар-
цитормам намда тая' сюрбыд'. Сармик
тад сюрбади манэць тамна сян мэва сян-
гада. Тадикахад неро' понд нгоб' мялкада.
Нисями тикан тэвванда сер' корованда
нямдотаван май'.

Вопрос':

1. Нгамгэ нисяда корованда нямд мадаван харвасида?
2. 'Нгамгэ корован сянгада?
3. Ханзер' корова суюмда сармикахад нгэдада?

Пидяхананда нгамдэда лэ'морэця.

(Лаханако.)

Тасехэй нгэвта лэ'морэця илевы. Нюмнг-вада Пудик. Халтангголава харад сидер' тю'уй янгокана лимбика пидяхананда иле. Тиркава тамна нись тир', пидяхаданда вэ-дондорманда сер' токцида хорпасетыда.

— Цив, цив! — лэ'мор' небыда нюхунда юнра вэресеты.

Пыда вадам пэртядарев' ян сырць токцяха'нанда лямботорцеты, нгобо' манзеты:

— Цив, цив, цив!

Тадикахад Пудик нися тосеты, нгавра-дамда тасеты, тадхава тэри нгарамдэсеты манзь:

— Ти хуркадм! Нгамгэ мэнанадм? Цив, цив, цив!

Небя лэ'морэця вадаха' мандадарев' я'ав-лынэ, нгобо' муно'ласеты':

— Цив, цив, цив!

Пудик тикымбохона нисянда тавы нгавар тэри нялпасетыда. Хурка нгаворпата нго' нгэвадярта янгу. Нгобкад пидяхаданда пиня' вэдондорнга.

Небыда нгобкад хадита тюкна иб' манзеты:

— Цив, цив, цив! — тарем нгод нюнгэ намдортада янгу.

Нюкцяда нгоб' нгыбкарта, токцянгэ яна-
вна вадёдана'.

Нгоб' мэва мерця сахар' теба.

Пудик пидянда вархана нгамдёвы, мерця
сахарад тебванзер' пидяконда мюд нгоб'
мантай'. Нюкцянда мантаванзер' небя лэ'-
морэця нюнда пумна лямбла хая.

Таняна хунанда нгамгэва' нгэса?

Мантанам манэць кошкаця'я таня мэвэ-
раха. Пудиккоця сейнда хэсь тарицёмда
токцяда пырдата, нгэкцята ниня нгодь' пэнг-
гана:

— Цив, цив, цив!

Небьяда тикымбохона нюкцямда нгоб'
хэвнякубта' тирцидеда. Тикы яхана тарицё-
комда пырдатада, нянгакамда нянггарнга,
кошка сэв нгули' едепида.

Тикы ямбхана ханикоця тю'у' тибтамъй'.
Тода няд'мякава тю'уй сидер' ни' ха'мы'.

Пон нись нга', небьяда нго' тэвасяхава
нюнда хэван нгамды', майенакы', нюкцямда
павэнда син пыякохонанда сухудада, тади-
кахад ябтаковна муно'лы'.

— Цив, цив, цив!

Кошкаця'я тасина нгамды, хунггляхаюда,
тивда сибико лэ'морта мортыкад таремби.

Кошка тю'у' сэвхаюда тэри ту'лесад-
нгаха', нгобо' манзеты:

— Мяв, мяв, мяв! Хэ', няна' вэвадамню',
писакоцярахаюн нгэдарабтадамню'.

Небянда мортысм нихива вадес' ят
нгота нго' сававна маланъй'.

Задание:

Лаханаконда' хусувэй часть нюмг' хода'.

Пёдва.

(Тарем нгэвы сер'.)

Нгобнгуна иба я няна негр'ня ядадамзь.
Лэркабт нга'на буйвол'ям манэс' нива'ам.
Таня нгадьбата тартя юдтяв тигр хэвхана
сюра. Таня нгадьбата буйволнгэ вэида тэри
сялъя'. Негр төрей':

— Пёдвам маниеван харван? Пя ни' та-
навы нгэё!

Негр' харто' нгани пи' нимня танырць
тяхари сёбар'. Пя ни' тана'махадандо' си'-
ми нго' няндо' нэкалнга'. Пыдана' пя мо'
ниня саваркавна мэйрахава сэврина' мэ'-
нгава'. Тигр пуйвэта ниня нгамдадэ нгарци-
торнга, буйвольюм' тигрм нгоб' пиня сюрé'-
леда. Тарем нгамгэмбиркохова паниюмбихи'.

Лэркабт буйвол' тигрмда танзидеда,
нямдха'нанда нгоб' хоркадтада.

Тигр санай', буйволта хэвдэн лабцей'.
Тикы яхана хэвня' мерця ла'айхалтадарев'
мантай'; хобанда падарли' нгамдэд помна
нгадибернга'. Нгамгэда нгэвна тигр вары
ныхыда мэць нгани' нгарнякосавэй буйволта
нгэван санай'.

Буйвол' тарцям манэкава икамда таси' ню'ледеда, тад тю'у' нгорцадавада яхана тигр нямдо' ниня нгэтлѐ хая. Буйвол' нгам-гэмбиркон тигрмда нямдота ниня парыбтам-бида.

Тю'уна тигрнгэ нгоб' ицюмба сятора, хадета вайнорнга.



Пон нись нга' ня'амбю' буйвол' нгэвамда таси' мэда. Тигрмда нямдота нид ян лаб-халнгада. Янабоковна пулыбтахавана нгарка санггумгананда тигрмда я ед тэ'элнгада. Санггум' нгылна тигр нгоб' сяркада, вэва-ко'явна нгарнибтей'.

Буйвол' тикы яхана нгоб муноць нгэ-варим парыбтамби. Нгамзи'нгода тэри леды'.

Тигр мунода нгобпиня нюдимдана'.

Тикы тарця нгэхэва буйвол' пыха мун-завэй хадавэмда тобаха'нанда тыбарпа пята. Буйволнгэ ненханда ямдю ваерахава нульй'.

Нулпата нго' лэнда нгардан нгамзида синянда ялы'. Нгаво' пиркана ямб'явна муно'лы'. Нгоб' нэгр масьню':

— Тикы буйволар сибики. Тикар суюмда ханзь муно'лы'. Нгули' сыр'. Техэ ти, нюдякоця нгамдэд понггы тидерта салъяна суюда ва'анда.

Тикахавахана хаця' пэнггана ва'анда суюнда хэван хая. Суюкоцяда нгэта ни' санай', небяда нюмда нянзба пяда.

Вопрос':

1. Нгамгэ яхана нгэвы сер'?
2. Буйвол' нгамгэм пёдтамбса?
3. Буйвол' нгамгэм нгэдабаса?
4. Ханзер' буйвол' тигрм пирда'леда?

Акула.


(Ваде'мы вада.)

Корабльва' Африка я хэвхана нусь. Нумда нгули' савась. Ид няд япыка мерця нимнебтысь. Пэвсюмбы няна нумда несэйма: нгули' мохонзахама, я няна нгэда Сахара табо' няд тодалавы печь ядэдарев' ядэда лехэдалы'.

Пэвсюмб' хаерта падь нерцюна нганона' ервота нгано синдер' ни' тарпы' нгаво' пиркана төрей': „Икана пыдана' ханзумдаханов'“. Нганом пэртя' тикырихина нгод иня-

дехэя есерм ит нгэдабта', есер' янгорэхэна халтангго пядо'.

Нганона' ниня сидя хасава нгацекэва' танявэсь. Сидя хасава нгацекэхэ' нерня ит санаяха'. Пыдмбоди' нянанди' есер' ниня тыер' нив нга'. Итя нгабтеня и'имня ниди' нертемба нгохолюрць пяди'.



Нганити' янгого хади' хатабця' няю' ирсу' нгохола пяди'.

Нгари' нюртенанда нгопоюм' нямда нертеда, тарем мэнаханда нямда нертевэюм' хаерей'. Няби нгацекы нися нгавхы артиллерист нюмда мание инда нгылри' тэри маймба сырнга. Нгаво' пиркана нюда хаця'

ха'ебтарё пяда нгани нисяда нюхунда тө-
ребтей':

— Нён ха'ебтарю'! нгарехэ' сатакувна!
Нгано синдер' нид хибяхава төревонда:
„Акулов“ Тюку' нгокхана' икана яв' сюдбя
халя махам манэ'нгава'.

Танянанда акулангэ нгацекэхэ' ед ирт'ли'
пэрнгада.

Артиллерист төрей':

— Пуня'! Салъядей'! Акулов! Акулов!—
Нгацекэхэ' невхэнди' сер' намдортади' янгу.
Писянзь хасннгаба төркосавэй нерыти' нимня
тяха' нгохолыхы'.

Артиллерист сеянда хэхэва падартарем'
морормы', нгоб' яхана нюрена тэрихова нга-
цекэхэ' няю' сырнга.

Нганом пэртя' корабль нид нганом ит
ха'авра'. Нганон сана'махадандо' нгацекэхэ'
няю' нганито' янго нганомдо' минхаледо'.
Хурка минаць мимбто' нгод нганоходандо'
нгацекэхэ' тамна нгахакана мэнгаха'. Аку-
ла'я нгацекэхэ' няд сидяри ю' енггахана
мале мэ.

Нгацекэхэ' нянди' төренавам вуньвэди'
намд'. Нгаво' пиркана нябиюм' нгацекы ва-
садай'. Тикырихина нгод нгацекэхэ' ябтию-
вна сяркадавам намдава'. Сярна пухувана
нгацекэхэ' тоди' яха' нгохола пяди'.

Нгацекэхэ' сярнам намда артиллерист
тикырихина сидёдадрем' хая. Ну'махаданда

санай', пушка' няна сюрба хая. Пушка
ня'авм сюрхале. Пушкан хылтеркая таба-
дада, манзхалта нгод манзхала.

Маня' нгани' тюку' нгокхана' корабль
ниня мэнангэ сейна' хэсь тэри нюрермына',
ят нгатенава' тамна нгамгэ нгэре.

Пушкангэ хамзеда, тарем сырпа'на' ар-
тиллерист сята сидя нгуда талхая пушканда
хэван мантавы'. Акула хад хэва, нгацекэхэ'
хад хэва якэ помна вуни нгадю'. Пушка
якэ тюку' синдада. Хов, ид нгэсонггад якэ
тибтена пяда. Нюртеринда яндахат хаця'
тосаркана' мун' тэбкада'. Мунгэ нёври са-
хама'. Пили' пуданаха'на маймба яндахат
тёревондо'.

Нгавхы артиллерист сята нянггарта. Итя
нгабтенян сангом нгэдара. Хамбако помна
тасехэй акула сяберли ябере. Тикырихина
нгод нгано нгацекэхэ' теда. Корабльхана'
тангахаюдо'.

Вопрос':

1. Ханяна тюку сер' хадкэса?
2. Нгано ервота хурка приказм мица?
3. Хасава нгацекэхэ' ханя' нгохола пяди'?
4. Хасава нгацекэхэ' хибя тэвода пяйда?
5. Хасава нгацекэхэ' нядаванзь хибя хэса?
6. Невхы артиллерист нгамгэм сертаса?

Беркут лимбя.

Беркут лимбя сямян лимбяхат нгарка лимбя. Тартя нгани пармахалы. Пирдада метр хун хаця нга'. Тохоюда тад пенадабта латдада сидя метрхад ва'нга. Пыяда ханзукая, хадида ябта сейхана наракабтарка'.

Март ирийхана манггта пэрнга. Няхар' ю' самляннг яля нгэсонггавахана лы сар'ню мюд лимбя ханеко' вэдандо-ланггуд'. Лимбя ханикоця' лы сар'нюто' мюд тарп'марихидандо' сэракоця нянзкоцям таре'нга'.

Ханикути' пидяхана нгамдэва ямбан лимбяха' 20—30 километр пир'мана сарвана пэрнгаха'. Нюди' манггаванди' малхана нгока пиртямди' я сармикм, тиртя сармикм нгамзь пэрнгаха'.

Лимбьяко'я пон иле пэрнга. Ихиндо' ни хирта мэ' юр' пон тэворнга'.

Лимбя ханикоцям нгудаха' мэб' нгани тяхари хибярин мер' тороворнга. Тяхари ервотабто' парю'. Торомдавы ервандо' ханяри' пондан хэб' сацьри ервувнадо' тябихо пэрнга'.

Ихинда ядэрта лимбя' пильнзерка'янга'. Хусувэй ныхы'маседарка я сармикэця',



лимбя мунм намдбато' лыннга пэрнга'. Ханынгэхэна лимбя'я нюдярка нгацекэхэрт хана пэрнга. Лимбянд тарцянда тоб' нгарка хибярихирта' сарвана пэрнга.

Нгоб' мэва тарця сер' нгадимы: нгаворцяда беркут лимбя сэвта пэва парсям танзиде. Парсийко'ян лимбя теба нябир тэри сярнэлы. Тарцям манэць нгоб' хасава лимбям парсяннгад питарнгада. Беркут тикахад хэртманда кошкам танзиде. Кошкамда ня'ам'махаданда хахаяда вад ни' нгамды'.

Мерёлевы парсийко синянда сярнэрнга, едым намдна кошкаця нгобтарем марнам ила.

Тикы яхана хасавар тунимда хо'манзь сюрбы'. Тунисавэй хасава нгадимгава лимбяр таняна танзирць хая. Хасаван лимбяр хадида пакалъяда. Хасавар лимбямда ханзеркарт мэсь я'мада. Тикы тарця нгэхэва хасавар, парсял, кошкар пыдо' няхарнгэ няданггодадамдо' ханзь тёрылыд'.

Тарцям намда няби хардахат хасава' то'. Лимбя'ям ня'мадо', тадхава сярадо'.

Вопрос':

1. Хурка лимбя сямянхат нгарка?
2. Беркут нгамгэ ямбир'мана тирць пэрнга?
3. Нгамгэмбир по беркут иле пэрнга?
4. Нгобнгуна беркут нгамгэда хадкэса?



Беркутня ханева.

Давлетбек колхозникхана беркут илевы. Давлетбекнгэ беркутмда пэ' ниня понгган еремдевэда.

Ханенар беркутмда янимдамба пяда. Терсяда мята мю' талбавэда хуркаси' нгавраси'. Беркутнда нгэва ни' малнгэ сэдвы тобъёвам серибтевы. Нгэва се' мал тобъёвакомда нгаварм мипва мальрихина ха'аврамба пэрмэда. Ханенар беркутмда нгуданда ниня нгамдё тохолада. Ервнда тёрм тумдорць тохолада. Тикыта пуна нгани нгамгэн нгод тохолада. Беркутнда пыя нернякумна иня малан сярхая тёня хоба пускэцям нюдерць пэрмы. Тёнянда пускэцян нгамза ютекм сярпа пэрмы. Беркутнгэ явна нюхулада

тёня хоба пусак пумна тэри варна пэрмы. Тикында пуна ханесэхэнда тальцедарць тохолада.

Нгобнгуна тарця сер' нгадимы.

Ханенар ханеванзь хая. Я хой ниня Давлетбек тёням сэвте. Тунирихина хадаба пяда. Нгэда' нидав', нгамгэ нгод вуни теб'. Тикавахана Беркутнда нгэва се' тобъёвам ха'аврада, тадхава тю'ури' нгэдарада. Беркут тий'. Давлетбек хой нид ха'мы'. Беркутмда пюла. Пэ мыртуй ниня беркутмда, тёнямда манэ'нга. Беркутнгэ нгоб' нгэхэнанда тёнянда махан лабцевы', няби нгэхэнанда тёнямда сяданда пенарамбида. Сата пыхананда тёнямда тэри повабида. Тикы яхана Давлетбек төрей'. Беркут тёнясавэй тю'у' тибтамъй'. Ервханда лямблы. Ханенар юнонда маха нид ян санай'. Беркут тёнясавэй ерванда хэван то. Давлетбек беркут хадахат тёням мэ.

Ханенар беркутмда тяхари нгарцие'нгада.

Вопрос':

1. Давлетбек ханзер' беркутмда тохоламбсада?
2. Ханеванда мальнгтана нгамгэ хадкэса?

Задание:

Рассказм часть'мананда тяригара'. Хусувэй частьнда нюмг' хода'.

Лэ'мор'.

Ся'ны нгэбта нго' сывы' сидер' нэ'мям нянгарнгадм. Харад мю' няръяна хораката лэ'морэця тю. Мань нгани я сибикоцям, нянь пудюкоця ми'нгадм. Нгаворць мале'-махаданда пякоця ни'нгамды', тадхава сэвда хаемла.

Мале сян яля ваера. Лэ'морэцями нгудани ни'нгамдолы'. Нгудани тарка ни'нгамдбата нгод нянь пудюкоця пенггадани нгаворцеты. Нибта нгани марцьни ниня нгамдёрисеты.

Хардахани хэ'ли вэнеко тюннгсеты. Лэ'морэцями нюрте'эри вэнекоход пинась; пунахава вэнеконя ниди'торомдайди'. Ханянгэхэна вэнеконда маха ни'нгамдсеты', тарцянда тоб' вэнеконда нгэва ни'нгамдсеты'. Хэвняд маниеб' нгули' мэкадаха' нгэсетыхы'. Вэнекоця'я нгамднам намда тэвамда халцралтамба пясеты, мадласеты', ханянгэхэвана санасеты' пыдамда парцеты. Нгод тарем нгод лэ'морэця перенадарем' ханя тангга нгамдёхаясеты.

Нгокари муно'ласеты'.

Лэ'морэцями тяхари хибяри нюковам мэнесь. Тад нюкуць пяб'нанд тиртя сёе'мананда хыно'лахаясеты'. Нгоб' мэва хардахадани сянхава ялян хаядамзь. Янггодахани нгани лэ'морэцями тябихоевы.

Янгго'мани пуна тад хардахани тюдм

нгани лэ'морэцями тэри няни лямботолы'. Панэхэртани ека я'мадм. Тадикахад няби марцьни ни' нгамды'. Нгэвакомда нгэвахани ихива пята. Мандадарев': „Янггодаханд няна тябихудм“.

Тикы пуна хэвнякубта нгамды', мэненами янггэбцами тиртя сёвнанда хурка харакохота талехаяда.

Нганзер' нгэда ханико.

Дарья пухуця нгамдалпаванзь курицан няхар' янгганя сар'нюм мацибте. Тикы сар'нюта понд нись сэвте' няхатата нгаркарка



тидертана рка сар'нюм мацибтевы.

Курица сар'нюкута ниня тэри манггта: хуна нгаворманзь, идарманзь хэб'нанда пуня' пидяханда тэри варнасеты. Курица сидя няхар' си'ив сар'нюда нгамдалпахава сар'нюхутата ханикоця' вэдондолыд'.

Сямян нята пуна тидертана сар'нюхуд ханикоця тарпы'. Харта нгани тартя нганзер' нга, нгэкцида хэвха' тикында тяхана харейха', пыякода лабцёй, тарецёкода ёря,

тасехэй. Курица небыда сяне' сыласеты' нганзер' нгэда нюхунда. Тикыта пуна ихинянда манзеты: „Нгамгэри нгэись нгота нго' хора нюкцява“. Пыя лабцёко нгэбта нго' тикыкоцямда няби нюта пирувна сянгада.

Тарем мэнаханда курица ханикоцьяда нгаврадамдо' пюрць, халы тюлыба тохоламба пяйда. Курицанд нюкцида тюку' нгокхандо' хэвхананда тэри варнернга'. Нгобнгуна курица нюкцясавэй' юнко хэван хаё.

Ид хэван тэвхава курица маталтана нюкця ит сабцеда. Курица тарцям манэкава хадита тюкна лямботолы', сяне' ид ня' санасеты'. Няби ханикоця' тэри хынемда' мандадарев': „Някоцява' ит нёя хабтюв', сава хибякоцёв', нгули' няданггуда“ . Нговэй' нгэвы' нгэвна някоцядо' ид сярмна тэри хаторямда, идм сялма маймбахарта, нгэкця-ха'нанда идм тэри тядалпида. Тянёвна вуни ман': „Си'ми сянзь курица небыми, курица нини хадахаладакы“ .

Нгаво' пиркана курица марнан Дарья пухуця пин тарпы'. Тикы яхана тарцям манэць нгоб' хынебтай':

— Хэй! Сене нгавнан курицани сар'-нюху' мацибтембвани мальнгана хад нго' сэвсяламба пыя лабцё сар'нюм мацибтева-кэдэйм.

Евако Ёнко.

(Невхэна.)

Ервхананда иленгаха'.

Янггумэхэюти' пуна Ёнкоця няданда нюдя не нянданя тэтанди' мят илелъяха'. Нгадыхы хибя' понггана пили' хаихи'.

Някахавадиди' иб' танява нгани хынандиди' вуни мэ'. Някадиди' нгани тэтахана недвата. Нгани тэтахана недватванда тяха' нго', тэтада някамдиди' Нгарка пэ' тяхана ханада. Някадиди' янггумэхэюта янггумахад ярме.

Нгоб' мэва тецьда танзерарка нумгана Нгарбиць лабтан нгэсы'. Ненгэ мядонда'.

Хад ханзеркава мядодо' мярыдо'. Хасевдо' нгани ханото' ниня хасавады'. Сямян нята нимня ервдо' нидевонда, нганихива' тэри мунзьвондо'.

Ёнко тыбэртя Хатко няня неро юпихи'. Нер Ёнко маля я'амни неро' пахаё мальемби, маля я'амнида тубка маторпида.

Мя'нгэ мале тума'.

Хатко ерванда вади тябюбтанакы манзь ханада:

— Тюку яхад невхы'на' серев' Нерута мал' ня' пянггуданакэва'. Тарем миндахана' пиндавана' ёльцьнгэ ни хант'.

Тарця вадаха'на ервандо' нгани видида яха ендтарем' ханзеда':

— Тюку по Саляды седаха' нгэсодава'.

Няхар' яля мин'махадана' Хальмер-Хабере'э
лабтан нгэсодава'. Хахаяда нгэсы' тамна
хубта' нгэнггу', хадри' мяпой мякана хэсь
таранггу.



Тикына' хавна вата нянзиhi' хардаха'на
хае тарангаха'. Хибя тенева няди' тутнгов'
нив'. Тад нго' нгэсь нго', Нгарка пэ' тяха'
хэвы ся'ня тута. Манда' маць: нянди' тэта
Харюцита яхана сидя няхар' по' илеван
харва.

Нгадьбянда нгацекэхэ' хардан ханаван
харвангахаюн. Хурка хари' тэнзха' нгэбти'

нгод нгавламба вато вуни таня'. Маня'
нидна' вунихи' ябсялав'. Таня нядэяха', пыд-
риди' хонади' сер' вуни нга'. Мядорць то-
рова'махаданди' харти' мыноди' пэртиди'.
Пям тава пирха' нгэвы нгэхэвабти',
нянани мэвэхэ' нгэихинзь. Харти' нянди'
яебтярк'. Нгавламбвана' хавна ембпа тара'
нихим. Тамбир нгаво ханяд хонггува'?

Вэно' пуна тюнгуи.

Ёнко ерванда вади тюку' намдыда, ха-
мадайда. Ерванда вада' сейкохонанда хар-
танараха'. Сэвкаеда хаял' паны'.

Ютна не хамада' нидав'.

Ёнком нюку'лада:

— Ёнкоця, нён яр'! Маси' небя ню няри'
мербяривна тута.

Ёнко ида ядэлы': „Тюкоход нгавон нгэ-
сыхына вэва нгэвна“.

Хасава' ханото' ниня тамна лаханакон-
вондо'. Хов, хибякоховадо' мамонда:

— Хэ', ненэся нго' теце! тацьдаханда
ханимядм. Една' нинякы' пи'.

Хурка лаханавандо' малхана содо' сюр-
манзь тахара'. Тарем мэнахандо' мят
нгод тю'.

Валакада Ёнкори пихина хаёвы. Тетсян
севэй нером ю'нга. Нялирпей нгобаехэ'-
нанда нгудида синзенгга'. Тей синзебтевы
сятаний нгуданда пикця тэри нинггармонда.

Нгули' ханимя. Нёхобтавы мальцякода пядрем' хэцеръй', нгаяхаданда янгга.

Неро севэйкоцям ня'ма мяканда ядалъй'. Ирида ядэръе: „Пясавай тюр'ни маси' мякад си'еми ни' питарт'“.

Нгодъ мят нгадимгава пухуця нгоб' тёрей':

— Ханя' минган, нганзер' нгэда нгацекэ? Пя тараб' нива'ам манд': „Пя тара. Хань', тяха' хань'! Мякана ненэцие' мэвам нир нгамгэ мание'? Хань', пядар хамада'! Еванда вэно' пин тарп'махад тандая тюрбцакэн.

Си'ми сямда янггу.

Ханзер' нгэвна, Ёнко нгани пин тарпы'. Нись нгод харва' неродамда юпа пя. Сянзимбей нгоба' тамнахая нгудида синзибтемба пя'. Ся'еда сэрнгэ сендей'. Нерута хэнггний хэван хая, танянанда хадо вангганпындеръй'. Нюн'махаданда, тикында тяхамна пи нгод тид вунься хоню', нгаво' пиркана нема тале-вэда.

Нгамгэхэва нгэваханда нгуркаданан сидю' нив'. Сэвда татулыд'. Сейнда хэсь нгэтани' тибтамъй'. Нгамгэда нгэса? Хэвмбохонанда не ерв пухуцянда нгопой тёрда. Пухуця янггцянда нгани' илада. Янггця' тебванзер' Ёнко няби някубта' нгоб' е'нгабтай'.

Ёнко сейнда табтимзь неродамда ю'манда екававна пухуцяна санай'. Пухуця панэхэ'

тив' лабцей'. Пухуця тарцям манэкава Ёнком сяканда тыра ладада. Ёнко хоба пускадрем' лямбамъй'. Юседанам пухуцяр тёркосавэй сян мэва ядцянггананда ладада.

— Неродар юс'!

Пухуця хая. Ёнко юседа хаи.

Нгули' пон юседа. Тарем собта мякана нгавормамдо' ёльцевондо'. Хасава' пин тарпвондо'.

Хатко хэвханда то. Манзь ханада:

— Ёнко, нгамгэ сыра ниня юседан. Ханимдан, хануй'ларанггун.

Ёнко ма:

— Си'ми сямдами янггу.

Хатко Ёнконда сят сылы'. Ёнко пыяхад хэв' сялъя'. Ёнко пыйта хэмгана сырам симдевы.

Хатконгэ Ёнкомда севолкая ма:

— Вадетава, нгамгэр хадкэса?

Ёнко вадам мэманда екававна хайлацейда ха'мыд'. Тикы яхана Хатконд нгод сэвда ябтанадарев' хая'.

— Ёнкоця, та'ли инзелехэр', хуна пухуця сит ютба пяб' няни тосету'. Сит едян нидм мит'. Теда' нгани мят хань'. Ханимдан.

Ёнкоцямда нись нгод харва' мят тюледа.

Хатко мамбта масьню':

— Пыдар нгани евакоцяха'на тэбсяркавэн. Нгокари манзетыда' вэнм лада вэва.

Нинянгэ мэсана нгацекы пярэба нгани вэва
ни нга'? Нгодь' тамна нгацекэн нгудамд
илхарт нгани' савам нён нгате'!

Тадикахад нехэнда ярэй'.

— Нгацекым нгавлад'! Мань ва'авхани
пэнгадамда ми'! Нгацекым ханибтебта',
нгацекым ланзьпата' пуна вэва нгэнггу.

Си'ивсян яля пиркавана кулак тэтадо'
сидя нинянгэ мэсанам харад понд пили'
хаеяда. Тадхава ти сидя нгацекэця мядормам
пянгаха'.

Вопрос':

1. Ся'ня тюку сер' нгэса?
2. Ёнко не нянданя хибяхана илесаха'?
3. Ервда нюдяко нгацекы нгамгэм пэрць табадамб-
сида?
4. Ёнком ханзер' нгавламбсадо', ембпасадо'?
5. Нгамгэ Ёнком пухуця юванзь нисяда мят нгэда-
рамбю'?
6. Ёнко ханяна хонараси'?
7. Пухуця Ёнком ханзер' сидесада?
8. Хибя Ёнком сялада?
9. Ёнко нгэсыхына не нянданя нгамгэм пэрцаха'?

Нгацекы мирдапава.

Та мальнггы яля' хубта', парэнгода
мальнггэхэць.

Лэркабт ханяхавад нгэсын нгацекы

тэмдамбада тоб' манггбада' нгацекыдо' нгавла ныхыдо' янггода' не нюдо', хасава нюдо' миць маймбахартасеты'. Няби вадахана ханя' нго' маймбю', тэмдорта' нго' хуркари нгамгэм ваторцеты'.

Тэмдорта' нгобо' манзеты':

— Нгацекыда' падарт тохоланггун, тикы тяхамна хуркари нгамгэм сертаба тохоланггун.

Тэмдорта юдмян нгацекы ма'ла'махаданда март ханарисетыда.

Март тэвра'махад нгацекы тэмдавы нгацекы сава сэдыбадаха', хуты сэдыбадаха' есям ядбадаха' тодо' ервха' юдмян целкой'-мана мирдацетыда. Тикыда мирда'махаданда нгацекы тэмдабадаха' нгани несэйвана нгацекы тэвра ваторасеты.

Иленя мире тэмдабадид хаця пинарка юнрасеты':

— Нгацекы нянана' хае'махаданд тад харто' хибяридо' танявы' нгэбцу', тикахана нгамгэ нгэнггу.

Нгацекы мирдапада нгобо' манзеты:

— Нёда' пин', тюку нгацекы' хыедо' яхана хибяхартадо' янггу, хумбирувна харвада', тамбирувна ерводада', теда харита е'эйкуда'.

Жуков Иванко.

Жуков Иванко хасуюдм пота нгацеки, хуты сэдыбадан тоходаванзь ми'мы.

Нгобиггуна Иванко ервода хая'. Ервота хэва вэнггохона нгэсынгатата еся пурцавэй перосавэй ручкам тюхулнга, тикы тяхамна чернилам тюхулнга. Ят пиделмы падар' лабцаком лехэбта, тадхава падна пяда.



Падна пяванда е'эмня сидя хэвхата сян васадай'. Падрэцямда нгамдёся' ни' лехэбтавэда. Харта нгани пулыбтай'.

„Ирикэй', Константин Макарович. Падарми нянд падбив. Пыдар хавнанд хуна хуртана тененами янггу, нисями янггу, невкэми янггу“.

Тикы вадида пад'махаданда индта хаця хынебта нгахат нэкалъе.

Еся паднабцянда палабтахая тяха, паднолы’.

„Тей яля’ хымнани тось, нгари’ нгавнанда нгацекеы ебцм манзабтамбидамзь, хонаравэваць. Нгаво’ пиркана хуты сэдыбадами си’ми прыба пя. Тикы яхана мань ярни тёрни ёпин. Тикы тарця нгэсь хуты сэдыбада няданггода’ писензь харцэркарта’. Хад нго’ саць писензявакы. Нгод тарем нгод нямна ханта нгавраами янггу. Ху’ нянькоцям тасеты’, яля ер’ нгавормахана кашкам нялабтасетыдм, пэвсюмб’ нгани’ нянькоцям тасеты’. Хонёванзь нё пинякуна табадамби’. Нгацекеы ярма пихина пи’ ямбха’ ебцм манзабтамбвани нид нисетыдм хоню’.

Ирикэй’, ябтан тюку яхад си’ми мэ’. Харт нгэсыхынд си’ми хана’. Илева серта пилибтари’ янггу. Нгэвами я нэгсонд нгэкцякохот ха’молав, ябтъен тюку яхад си’ми хана’, нябинзер’ тэри ханггудм“. Тамна тяха’ падна пяда:

„Ирикэй’, ябтан ту’. Ябтан си’ми евакоцянгэ ябсядангэ хана’. Ялэхэ’ си’ми прыби’, нгаворман саць харвадм, тяхари тябихудм, тикыни тяхамна ялэхэ’ ярнгадм. Сянако няха’ни вадаха’ вадес’. Муно’ла сянакоми хибяхартан нёр мис’... Тад ти, тарем иле хайдм. Ирикэй’, мерку ту’“.

Юн падарта тет янгорэй’ тамдалнгада сидя копейкавна тэмдавэда юн падар’ нгэ-

сянд пэнгада. Тянембовна ибедоркая юн падарта падкоця ни' хэсьданда нгэсымда пада:

„Нгэсын ирихини“.

Нгэвамда хадахалкая падвэмда нядада:
„Константин Макаровичан“.

Вопрос:

1. Иванко Жуков хибян ми'мы нгэса?
2. Нгобнгуна ервота хэ'мяхад нгамгэм пэрца?
3. Иванко хибян юн падарм падбаса?
4. Вадет, Иванко нгамгэм ирихинда падбаса?
5. Иванко ханзер' ервхананда илеса?

Нэвы сехэры.

Вася нися нгэ' сеи сэдыбада фабрика-хана манзара. Манзара'махаданда хардаханда то. Маниебта: Вася книгам толаби.

Нисяда юнра:

— Нгамгэм толабин?

— Ванька е'эмня падвым толабидм.

— Нгамгэ и'лика?

— И'ликахава и'лика нгани, саць Ванька хэныкабты.

— Нгаркавна толахаркарт, мань нгод инзеленггудм.

Тадхава Вася ваде'лада:

— Жуков Ванька хуты сэдыбадахана илевы, хуты сэдыбада ялэхэ' Ванькам ют-

бавэда. Тикы тарця нгэсь, Ванька ирихин-
да юн падарм падвы.

Вася нися инзеле'махаданда манзь ха-
нада:

— Нгули' ян тарцясь. Нюдя нгэвани
мальнггана мань нго' тарем си'ми тохо-
ламбиць. Теда' нгацекэнгэ илебцара' сава.

Вася ма:

— Теда' мал' нгацекы' си'ив янгганя
пото' нгэсонд школахана тоходанбато' тара.

Нисяда ма:

— Нгули' ян тарем лаханан. Теда' нгам-
гэ невхы по' вуни' нга'. Школахана мал-
ханда тоходанбат тара. Тюку школамд ёльце'-
махаданд тандая завод школахана тоходана
пянггур. Завод школа' заводха'на нга'. За-
вод школахана нгацекы заводхана манза-
раванзь тохоламбидо'. Завод школам ёльце'-
махаданд нгарка завод манзаям сертаба-
дангэ тарпанггун. Нибта нгани техникуман
тоходанванзь тюнггун. Техникум сававна
ёльце'махаданд харвабта высший школа-
хана тоходана пянггур. Теда советской
нгацекы' нёдо' нэ, нгодь' нён лэкад', ивьер
тоходан'!

Вопрос':

1. Вася ханяна тоходанса?
2. Тад нерня' ханяна тоходанггу?
3. Советской нгацекэхэ' ябдана илм хибя тада?

Революционер Таня.

Парэнгода мальнггы сераць. Мань та мальнггана сидя янгганя поминзь.

Нисями шрифм ма'ламбада, небыми нгани сэдоранась.

Нисями революционерась.

Тенад та мальнггы пэвсюмдём тенев.

Нгобнгуна нема тахамана намдав: нисями маймба тю.

Небахани мамонда:

— Манзева таранадами тэвадэйм... Хувыняна ёнар' падар' листовкам толаванзь тадтанггува'. Нина' нгани завод'мана хананггудо'.

Стол ни' шрифт вабтавонда.

Мань минханда хамадав нгамгэм пэрман харвавамда. Тикы шрифтхана парэнгода ядонгганзу', капиталист' ядонгганзу' листовка сертанггу.

Хонаравэв'. Лэркабт нема тахамана нгани нгамгэхэвам намдадм. Инзелеб'нани хибяхава нгэвани нгылым нензабтамбвонда.

Сэвни нянггарнгадм: небыми нини хылтадавы' сякананда нгоб' мада хэмда янггу. Нгамгэхэвам нгэвани нгыл' сы'нгада. Няби харад лохона нгамгэхэва сангговота нгэ' мун' товондо'.

— Мама', хасабарнгадама, тикы хибя'?

Полицейский неков, пыдар хоню! Маси' сит ни' яебтанггу'.

Нгэвани нгыл' нгудами нгэдарадама. Шрифтигэ тохокана пэбтё тания нгэвы'. Хоховабто' вэва нгэнгго. Еда мерку' сюрць тара. Мерку'! Ханя'? Печь мю' мэиць, шкаф мю' мэиць хонггудо'.

Ини нгук' ходэйм. Нер' нгавнанда сидер' нгылна молоко нгэся' молокосавэй нгась. Молоконгэ нгэсянда пеля пират тэвры.

Янамбоковна сидер' хэван сюрбыв' шрифтигэ пыдамдо' молоко мю' нгэдабтав. Хар'н нгани хонаюв'.

Тю'. Полицейский' пя хардана' мюйм яндаха'на хулцо'нгадо. Мань си'ми нгод ва'авхадани ила'.

Нгэцями ну, сидортангов. Небями лохонкон са'мермы'.

Мал' хамбхаледо' хонадо' янггу.

Полицейский' хэ'мяхад нгэцями ма:

— Нганзер' нгэвонда шрифтигэ ит пакалтадрем' янггу.

Мань нгани нгарка письнгэ ханав нгоб'тёреюв':

— Янгго, ит вуни пакал'. Нгэцёв', молокон пакал'й'.

— Нисями хамадада. Молоко нгэсянд сюрмбы' манзь ханада:

— Танюша пыдар тюкон мэр?

Тюкохона то, си'ми севолнга. Тадикахад ма:

— Тюкохова ненэй не нюкцями. Нянда ненэй революционер нгадимда.

Вопрос':

1. Таня небыда, нисяда хибя нгэсаха'?
2. Таня нися нгамгэм маймба таса?
3. Таня нися нгамгэ е'эмня шрифтам тасада?
4. Нгамгэ полицейский' хардахандо' тоса'?
5. Таня ханя' шрифтам такалцада?
6. Нисяда Таням ханзер' севолцада?

Пари юн падар'.

Париконд нисянда папа Ленинградхана
Северной Институтхана тоходана.

Нгобнгуна Парир някаханда тарця юн
падарм пада:

— Няков'!

Маня' мал' сававна илева'. Небями, Не-
неми, Вакоми тэ'нандо' мэ'. Колхозва' харто'
мэта тэддо' янгре.

Мань ненэцие школахана тетимдей класс-
хана тоходанадм.

Школаханана' тоходанна нгока. Маня'
„Харп“ колхозхадана' школахана тоходан-
нангэ няхар' ю'ма'. Тэри нгабцата школахана
тоходаннангэ сидя яхад турнгава'. Нгопона'
Нюдя яндер', нябингэ Нгарка яндерва'.

Яляхананда тет мэва нгаворцетыва'. Нгав-
рава' сава. Илебцава' нгули' сава.

Мань теда' пионерадм. Пионерхана мэ-
нангэ нгокава'. Школахана соревнуйнго
тоходанава'. Тоходана серони отличной'.

Нябимэхэна Великой Октябрь ялы мэ'-
нгаваць. Октябрь яляхана хар'на' тоходан-

нангэ театр сянаком „Няръяна нумгым“ сертаваць. Театр сянакова' саць мэкадувна нгадимя.

Великой Октябрь яляхана кино манэ'-нгаваць. Кинонгэ нюмда „Чапаев“. Кинонгэ тяхари сава. Чапаев ёльце герой нгэвы.

Маня' мал' пионернгэ Чапаев то'лахангэ нгэван харвава'.

Няков', саваха' книгадми нгэдара'! Мань хусувэй нгамгэм теневаван, харвадм.

Лакамбой Парир.

Вопрос':

1. Пари няка ханяна тоходанса?
2. Пари колхоз ил' е'эмня нгамгэм падбаса?
3. Школа е'эмня пыда нгамгэм падби?
4. Пари някахаданда нгамгэм ханза?

Радиом мэнена.

Гриша ялы' ямбха' панарнга: еся енти'-мякоци маторпи, еся лабцаку хутыби, тадхава еся ютекэци нгобт тилибтемби.

Хадада нгобкад хурцкусь:

— Хый, вэвако нгацекеы, нгамгэ'ям няр сертабадакыди'. Валакада хардана' мюйм хамболопи.

Пэвсюмдёхона нисяда юнрасеты:

— Серод хурков'?

Гриша манзеты:

— Саво'. Валакада телефонни трубка янгу.

— Хэ', хад нго' тэмда таранггоднакы?
Няданггохова ни тара'?

Гриша масьню'.

— Нингэй, нингэй, ни тара'. Ха'лин сер-
таван харвав.



Тики пуна ю' яля ваера. Гриша радиом
серта. Няби яляхана харданда махалэвна
антеннам сертаба няладолы'.

Пэвсюмб' хардахандо' нгокавна мядонда'
ма'ляад'. Сидндет час мале нгуркада. Нгаво'
пиркана радиохонанда нгамгэхэва нэрналъй'.
Гриша радиохонда сюрба төрей':

— Нявэй', янаркавна пядо'.

Хибяхава сато'явна нгани' ма:

— Доклад.

Тикы пуна нябир нертенгго манзарани'
холхозхана мэни' нгарка съездм ваде'ла. Пу-
куркана радио тамна музыка муно тэвра.
Мал' сававна инзеле'.

Кыс Мария.

Кыс-якут вадавна не нгацекы. Не нга-
цекы Мария еси', хою', пэдари' понггана
нгэда сидям сидеретана ламдик хардако-
хона иле.

Тикы не нгацекы илесь' я Якут' янгэ
нюмдембада.

Пыда нгэсыхынанда иленя хибяри' ханё
ныхына иле'. Нгэсыndo' колхоз нго' ханена
колхозм нюбе'нга. Ханена' мал' хадавэмдо'
ханесэмдо' тэмдолавахандо' мипидо'. Хане-
сэто' е'эмня мал' таранамдо' чайм, сахарм,
ям, тохосм тэмда пэрнга'. Мария сыра нерад
школан ядэрць пяда.

Совет яхана падарм ехэра нгобкарт нга-
цекы паропата ни тара'. Хусувэй хубтахана
сэр' сыра нимня яндахат нюдяко нгацекы'
школан варнасеты'.

Не нгацекы Мария не нгацекы нята понг-
гана едэй школахана нгамды.

Тохолкода не мамбта масьню':

— Мер', мер' тюкохона нгарка марка'на
нгэда школа то'лаха едэй нгарка школадава'
пэхэд сертанггу'.

Тикы пуна тохолкода не нгарка марад

ваде'ла, тадикахад харта сита тоходанванзь нгэдаравам ваде'нга.

Мария не нгацекы няби нгацекы'ня харида' тэри мэ'нга. Тохолкода не тамна тяха' совет яна' тинггырм ваде'ла. Ма:

— Совет яханана' иленя национальность нгока.

Мария не нгацекы сэвкаеда тохолкода не няю' тэри нялекаднгаха'.

— Нгамгэ ненэся тарця я' танядакэ'эм нгамгэ ненэся ядембаванда нид нгацекы' нгайто' нгадя ядэртакэ'эм нгамгэ? Тикавар нгэлирка нгэвондо! Манзевана' нгамгэ няна' сырава' тециню', няна' сырава' понтэйню' тад нго' нгэсь нго' няна' тама' хэмню'.

Пыда тад ханимонггаданда лимбика панаэхэ'на ядэрнга.

Мария не нгацекы хусувэй нгамгэм хамадаварин харва, хусувэй нгамгэн тоховарин харва.

Мария хардаханда то'махаданда книгамда пили' толабида. Тадикахад паднабцямда нгудахата мэсеты, тадхава падналцеты'. Нгаво' пиркана тарем паднахананда нангадя вада' нгадибелыд': „Хамадю!“

Вопрос':

1. Мария ханяна иле?
2. Нгэсында тер' нгамгэм пэрнга'?
3. Мария ханяна тоходана?
4. Мария тохолкода нен ханзер' инзеле?
5. Хардахананда нгамгэм пэрнга?

Нгоб' узбек не иле'ма.

— Ниаз, хусам тад!

— Ниаз, тумд пята'!

Ниаз харданда мюмня лыдумба нёхоб-
таравы'.

Ниаз небяханда ма:

— Невкэй', Хамран хантадэйм.

— Хэхэва хань', валакада пихиня нён
нулангг'.

Ниаз нгыдёда малда'мамда нэкалнга. Тикы
яхана нгудасавэй, нгэсавэй малда'маханда
малдай'. Сята нгани пойда понггарахана
синдада.

Ниаз ти малдё ядна. Малда'мам нянггарць
вэва тэдортадо'. Хамраханда тэвы'.

Хамра ма:

— Пыдар теневан? Манда' ма'ню': тюку
яхана не' ма'лангглава харад тая, турта'
не' нгани сядодо' нянггарпи'. Тикы харад
нюмдя клуб.

Небтвахаюд малдё яднгаха'. Нгули' янам-
боковна ма'лена яднгаха'. Хад нго' пухуцяха'
нгэдакэхэ'.

Ти неранди' няна нгарка харад. Сидереда
нгули' нгарка', нэвы'. Тикы хардан тахаби
тюнгаха'. Сядоти' малда'ми нгоб' лабхалъяди'.

Харад мюня нгамдёда' тандаяцей хоныд':

— Хай, тюкоховахаюна' ян нгацекеы пи-
рибтяха' нгэвэхэню'.

Нгарка яля мякана небтвид стол сюртё
нгамды'...

Нгоб' няндортана не тарем лахана:

— Малда'ма'я ха'авра тара. Малда'махад
хануй'ларангга', малдё сэв' мер' воворонга'.
Узбек не падарт нго' тоходанбата тара.
Падарт тохобта иланда сибимда. Тад нго'
сырнгада', сята нэвы не узбек яхана мале
нгока. Пыдра' ян нгацекэда', тандая манзара
пянггура'. Сядода' нэйда'!

Тикы яхана Ниаз тэри инзеле. Мэкадэ!

— Ниаз, тоходанванзь пяр?

Ниаз нгэвариди ха'амса, пивна сюрбы'.
Тохо' паныда нгули' сибицяко', нгэвахананда
нгани нгэва се' лембьякэцям мэ'нга. Теда'яхава
малда'ма вада янггу.

Ниаз яда, маймбахарта. Ниаз ёльце не-
сэй хибянгэ хая.

Няръяна Знамя орденом мэта.

Николай небя школан то, пальтомда ека.
Мюний панэхэ'нанда лэмбарахананда нга-
цекы' Няръяна Знамя орденом сэвте'.

Нгацекы' ма':

— Нгамгэ серо' е'эмня орденом та'мамдо'
няна' вадетэй!

Николай небя нгоб' ванибтей' тадхава ма:

— Саво, саво, нгацекые', вадетав. Тикы
сер' 1919 пуху. Та мальнггана саць сангго-

во'нгась. Совет ява' враг' яндахат нанибте-
донзь. Тикы тарця нгэхэва маня заводна'
рабочий' мал' ява' нгэдаванзь сайнолван
хаяць. Ни'ни'ня мань нго' сайнорманзь хая-
дамзь.

Нгоб' мэва (сид'няд енертахана' лэркабт
пянггуйна' юнутана палытана' сандадонзь.

Мань нгани та мальнггана нив ла'амда'
манзь төреюв':

— Нявэй', нерня'!

Хар'н нгани тунисавэй юнутана палытани'
нерад нгэхэдадм. Тюку' нгокхандо' нини
пумнани санаяд'. Врагна' сяхабта сензына'.
Нганидо' инд'лидо' хана'.

Ти, нгацекые', нгамгэ е'эмня Няръяна
Знамя орденом таць.

Вопрос':

1. Николай небя ханя' тоса?
2. Нгацекы' лэмбарахананда нгамгэм манэнга'?
3. Нгацекы' ха'манга'?

Задание:

Николай небя нгамгэ е'эмня орденом ня'ам'мамда ва-
де'нгара'.

Нюртей юн пэдарарахад то.

Нарэй тиртяко' то'. Хуркари тэнз лэ'-
морэця' харто' сё'омнандо' хыно'лыд'. Лэ'-
морэця' то'махавад вэтамдо' нгатева'.

Хаерад сэван сыра холк'лы'. Пи' нимня
ид ханзедахаявы'. Пинанда нгани марнана
нара. Пи ядбат нгэ табыта янггу.

Харнгэсако'я нюртэй сар'нюмда ха'авра-
ревы. Сар'нюнда ханимонггад харнгэс нер
пидякомда нида хаебю'. Хуна харнгэс ненд
нгамлаб' харнгэс нгавраха' тась пэрцеты.

Тарем мэнаханда сэро' ни' ид' нгамдвыд'.
Сензякоця'я сахадалвыд'. Тубкабцукут нгани
пыяридо' хутарнга'.

Варк синянда ванггхананда вангглы.

Вопрос:

Юну' природада вынггана ханзер' хан'нга?

Пэдара иленяко'.

Нарэй' нгэвы'. Нявакоця'я матад нюдяко
нявакоцям седа. Соявандо' мальнггана нгэ-
савэй таре' падкорха'. Харто' нгани тэри
ливартако'. Нявако небыдо' мат' нюдяко
нюкцямда сыра ни' вэлцрибтеяда. Нюдяко
нявакоця' соирканда сэв'нга'. Нявако небыдо'
нгавракодамда пюванзь пэдари' понд хая.
Хурка нгавормида ёльце' махаданда нява не-
быдо' нюкцида пюла. Невхы яханда тэвы',
нгамгэда нгэса? Нгобкарт нюкцяда мэ'маха-
нанда янгу. Та тэва сейда хая, сато'явна
хакцяхаюда пейба пя.

Тарцям намда няхар' нюкцяда сарвабарць
то. Нганида няхарта тенди' юху'. Хадри'
нгамгэхэва сарвананан ня'амранакыд'.

Вопрос':

1. Тюку рассказ нгамгэ е'эмня лахана?
2. Тюку рассказан хурка падта'мам падтавамбир?

Тюку падта'мавна рассказм сертада'.



Яха ху'лёда сэр' ниня нгацекы' нгамгэм манэ'нга'?



Вэнеком ханзер' сэр' нид ха'аврадо'?



Вэнеком ханя' нганохона тадо'?

Тиртя' тобць' синё.

Хувы' нгэвы'.

Нумда нгули' синё. Синё нгэбта нго' пыя ня'ам синё, нгамгэ вуни нгадю', нгудам вэнггала нгуда ни нгадю'.

Тикы тарця нгэсь нув' няюна нгамгэхэва' выврюридо' хан'нга'.

Нгаво' пиркана сенггби' мандал' нгэвакуна' нимня тайналтавондо'. Тарем мэнаханда синё вэркада.

Нумда хаерако, нгэбт я' ни манз'. Хурина тарина тиртя' мун' со'. Тикы яхана ханяри сылад' ялринда тиртя.

Ян нимняна' ябто' мандал' сейналтадо'.

Нгопой марнадо':

— Ла-лак-лак-лак!

Мандадарев': „Маня' ти това', иба ё'на' няна мэвава' ёльцева'“.

Сырангэ хаерад сэван нгадьри нгабланы'. Яхакоця' нгани нумд төреяд'.

Хыена' то' вар' нгамдёда тиртяхат парм-выд'. Сид'на' няна нгопой марна.

Сямян нято' нимня махакуд са'мондо', нгобо' манзеты':

— А'-а'-а'-алдык!..

— А'-а'-а'-алдык!..

— А'-а'-а'-алдык!..

Лак нарахана няхаркава аля нгобри хэври тиртя' ёндрисеты'. Тикы' нгэсонггана иде' хэвхана нгарка яха' хэвам тэркаба халэвар

нгадимлисеты, ёндаванда сер' нгобо' манзеты':

— Каха'-каха'!

Хай мандадарев': „Маня' нго' това“.

Сямян нята пуданаха'на сарём пэртяр нго' нгадимзеты. Сюдбякор нгоб' ёнда сарём пэрпата манзеты:

— Тюси'! тюси'! тюси'!

Сава нувм пэрпата нгани манзеты:

— Сюрли-сюрли-сюрли...

Тадхава валакада тиртя' то', тангомарида хаи.

Пон нись иле', яндан товы тиртякоцид манггта пясетыдо'.

Вопрос:

Юну' хурка' тиртя' вынд тось пэрниа'?

Икад хунмби'.

Сырангэ сяхабта ю. Яха' иктато' тиридо' паро'нга'. Ханянгы ё ёльце и' тондаяда.

Яндахат юн' турнга'.

Сямянхат нгаркавна нява' икад маям хо'. Тикы нята пуна хуркари тэнз пися' минга'. Ято' ванггхана илена' тад илесийто' икана панва сер' ид сяр' ни' тэри хатворнга'. Хусувэй я сармикэця' харто' пирувнандо' икад хунмби'.

Сэвсяда писяко янда вангган ид сехэ-даванзер' хаця хабтюв'. Пыда нго' сита^ги'



ила, тадхава нгохола пяда, хасуйха' якоця-
дамда пюла. Нгодь' ян тед'махаданда мин-
ханда я нгыл' пакалтъй'.

Нгани юн пэдрахад то.

Тасий сыра нгылад нгамгэхэва пудамтъй',
сававна манэць варк нгэва нгэревы.

Тикы сибекко варк сидя нюкцямда няць
тарпы'. Хурка нянггэрмамда ёльце'махаданда
пэдари' помна сабелабтада. Нюкцяхаюда не-
бянди' пумна тэри нявотыхы'.

Небяди' сыв' ямбан хэвдэмда хэвхалпа-
даханда хэвада нгули' вомы.

Нарэй тарпвахананда сэвда пэви'. Теда' тарпванда хусувэй нгамгэм нгаворнга. По техэ нгамдэдо хобта нгамлидасетыда. Нгоди хобта нгамзетыда. Нявако хадита нгыл' ерембата нида нгэдо'ла'. Сидяда нюкцяда небянди' нгавормаркахад нгани небяханди' лабцэсетыхы'.

Танго'лавахана' ямдаяна'.

Танго'лавахана' мюсева'. Мале сян мю' хаява'. Минзьма' хойна' ядхана синянда сыра.

Яхадекуна' минзьдана' ед ихиндо' ханернга'. Нялокоця' нгамдэдм нэдана' тэри вынернга'.



Маня' нгани ты'на' вэ'лим лэтрамбива'. Сидя нява' сидя хэвхад парнибтембиди'.

Нюртей яля валакада тей ни'мы яхадена' ню хаця' нгыбкартаркась. Няби мюва' пяхава тикарт я'авлахама нгабцата ты' пуданахана

манэкарт' нив. Неры маендавы су'ляко тэва-
када нгэвакадангоб' пирувна макабтыхы'.
Пи' сенггнахана' яхадена' ниня теб яхана
хэвы' нгэсеты'.

Хабтенггэцина' танго'лавахандо' минзь
маймбадараха'. Нгэсыя' няна мадарпаито'
пилибтари' янггу'.

Нгамгэда нгэвна самляннг мю' хэхэва
сеней ся'ны суюндангго'ма ява' сине юдря-
вувна ти хаёвы. Хыльцюв яхана' тирт нгэ-
сохова яха нгылня' сангоми хэвы, таняна
хунанда сидява' нгэсыва' тоди' яха саляха'
мядоди' мярвэхэ'. Тад яха тю'уня' сангоми
нгэдарадм. Нгамгэда нгэвна таняна хунанда
няби сидя колхозна' нгэсы таня мэриуэхэ'.
Харе'э льян тыди' няймыд'. Сянггэбохо'-
нанди' нгарка Хыльцюве'э яхам мада-
вэди'.

Пыдкони пэн сангом нгэдарадм ихини
няни мадм: — „Нгарка Пыдкова' тарем пяб'-
нана' колхозна' самляннг нгэсы' няр' юнд-
вэва'“.

Невхы пони ихини ха'мыд':

— Хэ', халэ! Ервомэво'! Нгамгэ ся'ня
та нгар яхана тангоцетыва'.

Пилю'.

Илеванзер' пилюхуд нгока ты хангга.
Пилю' ёльцьнггана тэкуцяе' тэри мыхыра-

сеты'. Пи'лимбавандо' нид нгоб' яхана ну-
сендамдо' нисеты' хо'. Нянэхэвавна сянув
пилюр са'нга. Сянувдо' хамдпавандо' мальнг-
гана иле'. Ня'амвы сянув пилюмд тад са'-
нуй пякоця ни' латраб'нанд ябтёйкоцявна
сяне юре' мянлад тэри маикарта'. Сянувда
ты пыян нгэдарамба тяхари ва'лэй. Харта
нгани пилюнгэ нюда хамдабаванда мальнг-
гана нгули' я нгэсомана тирнга.

Нюда ты пыян вындеб'нанда пыя ябтир-
мана маикарць тана пэръяд'. Таняна хунанда
нармэйха' япангга'. Тадикахад нармэйхад
хорака вангган танангга'.

Тэкуця' ху нарэйханда сянув минаръя-
до'.

Юну' нгамдэд нгэвахана тэртана тэкуця
сянувта пад нида ла'амданггу'. Нгадьбянда
сянувхат нгока ты хангга. Сиби пилюнд
нгод сабяхада янгу. Сиби пилюр нюда ты
тар' паханд хамдпида. Ты' хэвто' сава нгэб'
нгото нго' тянёркавна сибир лабценгга. Тэри
хэвада ябтарка тэхэвам сиби пилю тангы-
ламданггуда. Тад нго' нгэсь нго' хэвада
вэва тэр нинда нгамдана пилюхуртм пар-
халць я'амсеты'. Нара мальнггана сивта ты'
ярмбадараха' нгэсэты'. Тарем харахана тэ-
куця сянувта хавна хобанда янгокана ху
юнуйханда сибида минарць пэръяда. Нгадь-
бянда сянув', сиби' тюлыба тара'. Пилюнгэ
пыдадо' хадаба тара.

Обязательствони.

Мань Тельвиска школахана тоходанадм. Теда' тоходана ёльцейна'. Вынд хар'н колхозхани хантадм. Колхозни манзаяхана няданггодадм.

Тангы каникулы'ни ёльцьнггана колхозханани газета, журнал ненэцянгг' толабанггудм. Колхозханани стеной газетыхана таранггудм.

Пилю' ёльцьнггана пилю хадабанггудм. Мал' колхоз нгацекеы пилю хадабаванзь мэнггудм.

Та' ямбан самляннг ёнар' пилюм хаданггудм. Тикыни тяхамна юну' нгоб' нгэся' тарм ма'ланггудм.

Нгэрё ёльцьнггананда тоходанванзь тутадм.

Нгани тоходанна' нгобтарем обязательство мзя'!

Нгууци.

Тямдэ'нгэ хэва.

Менгга ерсехэна сывы хамб'махадандо' тямдэдэця' сиды'. Тад сидё'махадандо' ид сярт нгэвака'ядо' поркабтайдо', пыяка'ядо' тю'у' нгодо'ла'.

Нгоб' нгарка тямдэдэця'я я вархана нгамдёвы, тямдэ' сёвнанда нгоб' муно'лы':

— Квакс, куакс...

Тикы няндо' мунм намда нгоб' сёвна нгока'янгэ муно'лавондо':

— Брэ-ке-ке-ке ... Брэ-ке-ке-ке ...

Тадикахад нгани несэйвана нгани манзеты:

— Квакс-куакс ...

Нябид няндо' вади пэртядарев' себяртесетыдо':

— Брэ-ке-ке-ке.



Тикы тямдэдод тиребямдо' ит моёпи'. Тямдэд тиребя сэвкэця' ензарюй нюлак на-намлахана сенды'.

Ибиманда сер' менгга ерсен нгамдэ' вадёвы. Ензарюйкохона синдёда' тиребя сэвкэця' ид сярт хатмыд'. Тяхари мер' вадё-дана'. Хаерта сэв ядимдаванзер' тиребя сэв-кэця' манзаданггу'. Нюрте'эри манзадавандо' мальннгана тэвасавэй нгэва лонггрэцари'. Нись пон нга' нгэвакарир тиребянда хоба-коход янгамды'. Нгэвакэцяхананда икдала-хавнанда индтамда нэкалпи, нюдя нгэваха-нда нгэваринд тикы' нгавода халя тярлаха'.

Вадёрка'махаданда сэвкахаяуда нгадим-дангаха', нянда нгод нгадимда. Ид нгамдэдм нгаволанггу'.

Тамна нгамгэмбирко иле'махаданда пунгыда вадёда пянггудо', си'ивсян яля ваерахава хунгглида нго' вадёда пянггудо'.

Тарця' ямбхана сёнзъта тер' нго', тивакада нго' вадёда'. Нгобкад пере индтамдо' нгэхэлманзь ид сярт тарпорнга'.



Нгаркангэ хантанхава тэвакэцяда сусана пянггуда, тарем мэнаханда пахакэцярида хаёда. Тадикахад тямдэд нюкця ян тарпанггу'. Тямдэ' илеванда сер' яхана илева икана илева.

Нгармы тямдэ' невхэнда сер' нгамдэдм ни нговор'. Нгарка тямдэкавангэ нгавонадо' неняннг', нибярё', нюдяко ид халцуко'.

Задание:

Ваде'нгара', ханзер' [тиребя сэвкахад тямдэ' нгадибернга?

Пыя ямб Комар Комарович, няби тэва хэм' тар' ёря Мишка.

(Лаханако.)

Пыя ямб Комар Комарович нгарка'я вэба нгыл' тензерманда сер' хонарай'. Хонёбата нгод нема тахамана я'авкабтада тёрм намда.

— Ювэков', нисякэй'! Тальянгадов', тальянгадов'!

Комар Комарович вэбанда нгылад санаванда сер' нгобтарем төрей':

— Нгамгэра' хадкэ? Нгамгэ төрырнгада'?

Ненянггангэ нгопой сыб'надо' нгамгэхэртм хамадава серта янггу.

— Ювэков', нисьякэй! Саболкана' варкто. Варкигэ маня' яхана' хонай'. Нгамдэдни' ва'анванда мальнггана самляннг юр' ненянггм няелнга. Тад индтамда нэкалманда сер' тас юр' ненянггм няламнга. Някоцинэй, мая', мая'!

Пыя ямб Комар Комарович минханда партей'.



— Хый, ейна', нгэвадайда! — манзь төрей'. — Мань теда' хантадм нгани варкамда' пиденггув.

— Някамбоей', нгамгэ туюкон хонаян? — Комар Комарович манзь төрей'.

Тар' ёря Мишка нгоб' сэвмда нянггарнга, хибякохорт манэтада янггу. Тадикахад няби

сэвмда нянггарта, нгодъ сэвтеда. Пыянда нимня ненянггэця сюра.

— Нявэ', нянанд нгамгэ тара? — Мишка нгарналъй'.

— Хый, някангэ, саванда сермня тюкоход хань'!

Мишка тарцям намда токою' сэвхаюда нянггарнга. Пыйта си мяртахая няби хэвдэнда ни' хамбхалъй'. Нгани нгод нгарнгоёда нэкалнга.

Комар Комарович нята няна тирць хая, саболта нгардан сёда лэрха:

— Тар' ёря Мишка сейм няна' мэкадувна харевэ...

Хов, ненянггангэ Комар Комаровичхана-ндо' тияд'. Таня' тэвыд', нгамгэедо' нгэса? Варк халъя, манзхарта ни манз'.

— Нер' нгод мадамзеню': сейнда хэсь нив ха', — Комар Комарович тэри посана. — Нгамгэ нгэбта нго' та нгар варк'я харябта-ванда хэныкабтвонда.

— Нявэй', тикыра' ти хонэ! — нюдякоця ненянггэця ейналтада. Хардыта ян варканда пыя нгыл' тэвванда сер' варкар индкананда хацявэда нэкал'.

— Хый, нганзер' нгэда нгамгэ! Хый, сяцьда нгамгэ! Ненянггангэ мал' нгокхандо' нгоб' мальнггана сыб'нам ила'. — Хый, самляннг юр' ненянггм няелнга. Юр' ненянггм няламнга. Тикыта пуна тамна хоны, сермня хэ'мямда хумна нида пю'.

Тикы ямбхана тар' еря Мишка нгарнголи' сябыбты'.

Комар Комарович ямб пыяхананда варканда парисе'э пыям хэбхалнгада. Мишка санай'. Нгоб' пыямда хунггяхананда мэда. Комар Комарович варк пыяхана янгувэрха.

— Хурка ни мэниялу'? — Комар Комарович хыбелы'. — Тюкоход хэвня' хань'! Нябинзер' тамна вэварка нгэнггу.

Варк нарылы' нгоб' нгамдота:

— Янго, нидм хант'! Сидда' тюку' няелтадм!

Комар Комарович нгани тий', варканда няби сэван лабцей'.

Варк нерцирей'. Хокоцям хурка паханзавэй вэравэдада, ненянггада хо пяхананда ладорпа пяйда.

Тарем марэртаханда ху пэдай'. Нгод тарем нгод ненянггангэ варк нимня сюра нгопой сыб'надо'.

Мишкангэ нюнхава нгамдэд нимня мантилы'. Ихинянда ненянггата ям тюку' няелман харва. Иб' мантырнга, нгод тарем нгод ненянггангэ нгобпиня нимнянда сюра'.

Варкар пыямда няннгад понд сы'нгадада. Тикавана ненянггангэ варкандо' тэван лабцеяд'.

Михаилнгэ иб' нгод хэван харва, инда ядэла вэварахама: сейда хэнянгэ си'ми нирва' тола'.

Саболкад тямдэдэця ма:

— Михаил, нгамгэнгэ хумбанзи' пи'лим-бин! Сернгэ нёд пэр' нинянгэ мэсана ненянгэци.

Вади намда варкар май'.

Тикы пуна варкнгэ тад сюрхалманда лымб-дахад нгоб' варцяттеда. Ненянггангэ пумна-нда нгопой сыб'надо':

— Хэ', нгацей', ня'мара', ня'мара'! Варкра' хая... Ня'мара', ня'мара'!

Та'.

Ху'мер'.

Пэдари' тяхад хаер' вэдондолы'.

Лэркабт пэдаравна нгамгэхэва тэд'лы'.

— Тру-ру-ру-у. Трам-там-там. Тру-ру-ру-у.

Нгамгэ нгэдакыди'? Хибя нгамгэ пэдарам хурцкабтамбадакы?

Вынгоцён нгамгэмбиркана нгацекеы' отряд барабандо' мумна яда.

Нгацекеы' нермбэртядо' ма:

— Нгацекеы' отряд, нуя! Нгацекеые', мяканана' мэва'. Мядекуна' мярхава'!

Нгацекеы' мядекудо' мярыдо'. Час пеля ваерахава вынгоцёнд нград есер' мякат морермы'. Мядекудо' мяр'махадандо' пякоця-дамдо' мокоцяхат ма'лаванзь хая'.

— Хэй, сисудэй сянгокэй'!

— Ханзер' сису' нгэнггути'! Тикыд ти ладсэр'.


— Халцурэй лэтов!

— Мань нгарка'я лярцам ходм!

Сеня ман'ма;

— Нгацекые', тюку хусувэй тэнз нгамгэ ма'лахана'. Нганихина ядэра'мадана' школана' мядинзэнгэ митына'.

— Сенёв, ян хынебэн! Инд нгу' нгули' сава.



Нгацекы' манзара пядо'. Ма'алковандо' е'эмня лабарцикодамдо' тэва'.

Тарем харахана хурка та' ямб ма'алку'. Тедахава мал' маикарти нгацекы' пэдарахана иленяхандо' хамадайдо'. Тедахава хибяхарт ладсэрм нгани нялабартангэ нида нюмденггу'.

Пэдарам тисьде тара.

Пэдари лэтрамбан'.

Пэдарам тисьдена пи' соёлёко, пи' ямдко ни мальерпю', илебей пи' сябто ни хаде-

лерпю'. Пэдарам сянда илебей соёлёко ни
выярпю', илебей пи' вэби ни ныдпю'.

Пи' ни' нён таныр', пи тубкахана, хархана
нёд сапхалпю'.

Пэдари тисьдена пэдари' понд месури
тодабцие ни пятабю'. Пятавы тодабцянд
хантава мальнггана хабтад. Нябинзер пэда-
ра пара пирта.

Пэдари лэтрамбада тенева тиртякоця
пэдари лэтмбавам. Тиртякоця' тарця' нгэсе-
ты'ню': пя халцуко, вэба халцуко сусадам-
басеты'. Нгадьбянда пэдари тисьдена пэдари
тиртякоци' пид хибяри' тахабтамбабато' ни
тара'. Пидяхана нгада сар'нюко яебтамба
ни тара'. Мантавы ханикоцям нго' хоб' пи-
дыханда илба тара.

Пэдарохана.

Пэдарар вылаха вуни нга'. Тангы ядем-
бадахана пэдарохана сава. Пя паханд нгамд-
бат тараси' ханзокова.

Пэдаракохована сэвад мэпат малито' вуни
таня'. Пякоцяков' тэри нямдъяхаянггов', пир-
цёв', ябтов'. Екоцяр хаця' сябтанда нярмахала
лимбика ямдкоцида ливартахаянггу'. Хады-
коцянд нибераха ямдкоцида енда ирэ'на
тидертахаянггу'. Хокоцяр нго' нямдортахая-
нггу маликэцида тырцекаданггу', вэбакута
нгабт тэри лехэдарта. Няби пи' нята понг-
гана нгадибцёвна янггарка нюркар ну'умъя-

хаянгу. Хэвняд маниеб'нанд маликада тэри
вэ'мартарха' нгэнгу'.

Нгыльнякуна ванггарка ян сылабат паёнд
нго' вэбида тобъёва ямдюраха' нгэнгу'.

Нгэт нгыл' сангор хэбта нгамдэдо' понг-
гад лэ'мор' нгодянд сэр' паркако' сэврин
сэктанараха' нгэнгу'. Хэвмбохонанда лэ'-
мор' нгодяко сарермы' нгэнгу хури няръ-
яхаянгу.

Парэнгода мальнггы Нюртей май яля.

Харад лохо тяхакуна тыяк ядэлавахана
юрмян хибяри ма'лавьд'. Нята сава понггад
нгоб' сата му' тэбкадаванонда.

— Вэява' енздей нгодя тебтдарем' пал-
нгырпидо'!

Сян яха'на нгоб' мальнггана вахалмондо':

— Ненэсянда тарцё!

Андрей тарем ма:

— Хэй', няр варэемда мэ'нго! Хай, ня-
данггованзь хэхэрцюдм!..

Нгаво' пиркана нгани сата му' мамбта
масьню':

— Нямбоён! Манзеты' нгани яндир' ниня
хуркари еркар': еврей', француз', англичанин',
татарин' тая'. Манзьва тарця вадаха' нидм
пунрю'. Манзьва ини ядэрабцхана сидярим
яндир' ниня еркарм хомбидм, пирдырнгаха'
харти' понггананди', нгоподо' нгэдакы' капи-
талист', нябиюв' манггбада' нгэриданакы'.

Сидя еркар нгоб' пирувна нихи' ембдю', нгопой вадавна нихи' нго' лахан', теда' тям-нгадя капиталист француз, англичанин сыркарнгада' — мал' мазарани пиндебидо' — тая мал' лэхэна суйдамд'!

Хибяри понггад хибяхава письлаванонда.

— Тад няби хэван сылаб'нана', француз рабочий, татарин рабочий, турк рабочий — мал' маня' русской рабочийнгэ тотревна' вэндарем' иле'!

Тарем мэнаханда няби няд хибярингэ нгобпиня няданыд'. Нгока нято' понд тода' нгобпиня нерня' сы'ынгторнга'.

Хибяхава төрей':

— Полиция мингов!

Тая нгадьбата нгарка марад ядэлава няд тет полицей юнута минга'. Садкобцьедо' тэри садо'лайдо', тикы яхад манзь төреяд':

— Тода яха' тахарада'!

Хибярид нись нгод харва' полиция сехэрэхэ' танггумдамби'. Нгани ханянгы хибяри' вадод' ни' сандадо'.

Хибяри' понггад нгоб' мамонда:

— Хэ', хурка парсяндрев' нгайти юну' ни' нгамтавы'нёв' тикыид саюдарманзь мэ'ма.

Тая нгадьбата ядэлава ерня нгоб' Андрейри хаёвы. Полицейский' Андрейм ня'мадо'.

Вопрос':

1. Рабочий' ханяна ма'ланггса'?
2. Андрей нгамгэм вадеца?
3. Ма'лавы хибя питарпа псясида?

Няръяна знамя.

Школа нё нгобкад пере нэнгга, талнгга. Тюннгана' нгацекы' маймби'. Пихид харад мю' маймбади' мун' тэворнга'. Харад мюй хаеркад тэри ябере.

Харадм ерабада пухуця Степанком нюбета нюнда нюня сидер' хэвхана нунгаха'.

— Хадакэй', нгамгэ ярнган? Нгани небями, нисями тензибтен? Иле'мамди' мань нго' няни вадетэй!

— Ханзер' вадетавди'? Хуна тензибтеб'нани хораками нгэсанзеты'. Нюкцякоми пыдар нгэцяр, харта нгани нямдъяхаясь нгэвакокуда тырцекадась, харта нгани нгули' хынокадась... Янггэбцаха'нанда манггбада хибари' е'эмня янггэрнгатсь, янггэбцаха'нанда манзеты: Мал' манггбада' сававна илелтыд', тикы тяхамна хибяхарт манггбада нида пиндембанггу'. Тадхава нгобнгуна ма:

— Тюку яля Нюртей май яля, мал' рабочий' нгарка яля. Сырнгадм: нисяр, небяр марад хэвня' нгарка ялям мэ'манзь сабе'яха'. Небяр нгобтарем фабрикахана манзарась.

Нгаво' пиркана фабрикандо' манзарана' хардахана' то', хуримна латолы', мамбто' мацню':

— Олянгэ, вададава' мэтан.

— Ят тикында нерхартана лахана'мита е'эмня сяролава мякана сярысь. Мань нгани тикана ма' нидум':

— Оляков, янаркавна нгэинэй.

Нгамгэхэдэй! Валакада письлы', тадикад ху нида вэта'. Тарем мэнаханда хамиковато' малхана хэсь пядо'...

Нумда нгани тюку тотрем' хаеракось. Небянд, нисянд хантанхава сюрикодрев' сидю' нинув', тэри харт серкат себярннга пяр: „Небёв!“ Та мальннгана потокоцянась.



Хая'. Нгамдыдм, нгатенадм. Едми пиредм, нгатенадм, ханзеркарт нгатенини нго' тось я'ма'. Хаерта туебтахавана Настя нгопорингэ то. Ся'едов нганзер' хэвъей. Мань төреюв':

— Оля хуна хая? Нгамгэда хадкэ?

Тики яхана вадахартм тюхулць я'мадм. Хуна нга'на ма...

Рабочийнгэ марад тяха' ма'лавыд'. Таниянанда няръяна знамядо' тью'у' илвыць. Тад-

хава нгоб' сёвна янггэлавыд'. Тикы яхана пыдар нгэцяр нго' вадам мэ'манзь танавы'. Сёда сава нгэсава, сацава... Хибярингэ тэри инзелевы'... Нгамгэмбиркана яндахат юнотана саюв' сюртевыдо'.

Мирвсяда тэри пярыва пяйдо'. Тикында нго' саювнгэ енелыд'... Тад ти Оляеми хубтакана пя нид ха'авравэдо'.

Настями сенейта нимня манзара пяда. Олявнанда тябехутнаханда сейда небянд юмя... Тикыринда нгод хануй'ларамба пяда... Илесеяма' тад нго' са'ньюй нгэсава... Пон нго' нись нга', небяр янггума... Сидямборингэ хаю'мами' тикыхы.

— Хэй', сыркарэй'! Мань нини' ханзер' иръя нултаныд'. Знамямдо' нго' хамадавы'...

Валакада теда' няръяна знамя е'эмня хибяхартм ни' еданггу'...

Школа тоходанна' знамяханандо' ханя нгадибцёвна падвы: „1 Май яля тая илея!“

Хусувэй нгацеки лэмбарахана няръяна нумгыця' селв хасимда'. Тад ти, тикы няръяна нумгыця' сенений рабочий' хамдумбавы вэям хэта'.

— Хадакэй', хантадэйм!

Степанко школахана тоходана нясармита ирт пыда нго' нульй'.

Вопрос:

Хадада Нюртей май яляхана нгамгэм тензибте?

Нюртей май яля.

Нюртей май яляхана сямь яндер' трудящийся' пин тарпа пэръяд'.

Маня' яханана' няръяна знамясавэй мал' трудящийся' пихиня мэ'.

Совет яна' знамя' нгани ё' рабочийха' тарем ма':

— Маня' ти нерня' мингава'. Маня' ти мэбернгава'. Няна' тода! Маня' ти сидда' няданггува'.



— Нюртей май яля тая илея!

Нгани яха'на тамна совет власть янгу.
Нюртей май ялям мэманзь таяна ни' табамбю'.

Нюртей май яляхана нгани яндер' рабочий' хурка ервото' мадарпаб' нгод пыдо' нго' манзаидо' хае пин тарпорнга'.

Нгани яндер' рабочий' няръяна знамядо' капиталистха' тарем лахана':

— Маня' ти рабочийнгэ сидна' латрамбадангэ, сидна' пиндебадангэ капиталистнгэ еканда' пили' самб'яна'. Совет я рабочий ни'на' вади вади намдоръяна', сидна' капиталистнгэ еканда' миманзь хамамдо' намдорнгава'. Нгамгэ хадкэб' совет яндер' сидна' няданггу'. Маня' ныхым ныхы'нгава'. Ханзели' нгэбта нго' капиталистнгэ сидда' выдартанггува'.

— Нюртей май яля тая илея!

Вопрос':

1. Советской я знамя' нгамгэм ваде'нга'?
2. Нгани ё' рабочий' знамя' нгамгэм ваде'нга'?

Гарри Айзман.

Гарри Айзман Америка школахана тоходана. Мал' тоходанна рабочий нгацекы' пионернгэ падыд'. Тадикахад нида няд'мяць нгани школахана нго' пионер отряд серта'.

Нгоб' мэва пионер' ма'лангглаван ма'ляйд'.

Гарри я тавна совет властьм серта пионер пёдванзь ханъяда. Тикы яхана лэркабт юнутана' то'. Юнутана полицияпионер' понд пакалъяд'.

Полиция Гарри хэван тэвхава Гарри по-

лиция юном иняхаданда секадтада. Полиция
Гаррим тикы яхана ня'мада, ханада.

Сян яля ваера. Гарри Айзманм судеба
пядо'. Суд Гарри Айзманм мат' ирий сяро-
лава мякана нгамдэванзь судеда. Сяролава
мякана Гарри Айзманм талей' понд нгамтадо'.
Сяролава мякана вэвавна пэрнигадо'. Гарри
Айзман мат' ириймда нгамдэ'махаданда
сяролава мяд ерв ма:

Тамна няна' нгодь' еремгавабат теда' мэ'-
мана' нимня вэваркава' нгэнггува'.

Хурка сеймда харебабто' нго' Гарри Айз-
ман харева техэ. Нью-Йорк маркана юр'
ёнар' рабочий' пин тарпхава нгаврадамдо'
хаманзь, манзаядамдо' хаманзь Гарри Айз-
ман нгобтарем тикы няха'нанда пин тарпы'.

Тадхава нгани Гарри Айзман полициян
ня'амрай', нгани нго' судедо'.

Судда тарця: самляннг пон сяролава
мят тала.

Вопрос':

1. Гарри Айзман ханяна иле?
2. Гарри нгамгэм пэрманзь пионер ханъяда?
3. Полицейской' Гаррим ханзер' мэдо'?
4. Гаррим нгамгэ еэмня сяролава мят сярадо'?
5. Гарри пинсав'?

Тиб пионер.

Сангговота тер ха'аврамбада Рами Ти-
бан ма:

— Пыдар сарё тэс санггартарев' нюдян.


Сарё сэвкэця пэвсюмб' пивна мантаб'нанда
хибяри хамаданггудав'?

Тиб ман'ма:

— Хибяхарт нида хамаданггу'.

— Хибяхарт ниб'нанда хамада' сюрбад'!

Тюку листовкам фабрика нёны' хэван ивтед!



Тикы яхана Рами нгарка'я падар' листов-
кам ми'нга.

Ху' тад фабрика нёнэхэ' хибяри' ма'ла-
выд'. Пирця'я Аман сёнда нгардан тола-
бида:

„Нгаворцива'. Ла'амдамба мэсь нгэя! Бур-
жуй' питармы' нгэя! Я'я нгардан рабочий'
капиталистато' ядонгганзу' пёдая!“

Нгаво' пиркана пясавэй, револьверсавэй полиция то. Мандалада хибяри яндаха' питаръядо'. Аманм полицейский' ня'мадо', автомобильхана тадхава ханадо'.

Пэвсюмб' Тиб Рамимда хода.

Тиб ма:

— Рами, пыдар ха'ман? Хусувэй пи' падрэцид марад помна ивтембхан. Таня хибяри' сэвха' падрэця' сэктанараха' нгэя': „Мэсь нгэя ла'амдамба! Капиталист' питармы' нгэя'!“

Тиб тикы яляхат пионернгэ хая.

Вопрос':

1. Тиб нгамгэм пэрца?
2. Тикы листовкаха'на нгамгэ падса?

Нябинзер' нгэсь я'ма.

Хасуюдм пота Карл хардахананда нгопори. Небьяда хая. Нисяда нгани сидя си'ив хардаханда ни нгадибер'. Нюдякоця Карл тарця серт ни пысымбю'. Карл мале тенева нисямда полиция пювам, нгадьбянда хардахана янгуваюмда сава. Карл нисяда коммунист.

Нгаво' пиркана Карл нгэ' муно намда. Нё нэй'. Няхар' хибяри тю.

— Нгацекэця, пыдар нгамгэ нгопорин?

— Тад нгопорим...

— Небяр ханяна мэ?

— Хаясь.

— Нисяр ханяна мэ?

— Хаясь.

— Ханяна хаяха'?

— Ехэрадм.

Пирця'я хибяри ма:

— Мань сит сяролава мят хананггудм.

Карл сейда намгадаванснда. Нгод тарем нго' ха'манггарт' ни.

Карлм таси' вадалнгадо', пин тарпрадо', тадхава автомобилян нгамтадо'.

Час пеля ваерахава нгарка яля мят тэв-радоню'.

Неранда нянгы хэвхана полиция панэхэ'на ембдэда хасава нгамды.

— Сян пор? Нюмл нгамгэ? Школан ядэрнган?

Карл ваде'яда.

— Нгаворман харван?

— Нгаворман харвадм.

Сидя минута ваерахава Карл няньхана нгамзам нгавола.

Лэркабт полиция паны мэта юндалы':

— Нисяр ханяна мэ?

Карл нгамзида пу'яд'.

— Нисяр ханяна мэ?

Мунзи.

Нисяр хана? мадамню'?

Карл мэбць' яля мякана нгамгэ ни манз', нгопой часри' хутармондо'.

Хибяхава тювонда. Хибяхава ма:

— Сит ханга'.

Полицейский тэдоркава пин тарпы’.

Нгамгэмбирко ваера Карл нгули’ хасена. Хибяхарт ни мий’. Карл нё няю’ сюрбы’, нём тирцидеда. Нё нэй’.

Карл пин тарпы’. Палытана’ нгацекэн сыркарта ни’ сыр’. Тикы яхана Карл хардаханда сюрбы’.

Вопрос’:

1. Нгамгэ полицейский’ Карлм полициян ханадо’?
2. Юнравандо’ мальнгана Карл хурка нгэса?

Испания нюдяко герой.

Рабочий’ нюдякоця Хуан Торнадам еваком нянандо’ сайнолван ханадо’. Нгобнгуна гвадарамской сайнолван табадяр’ то, мал’ мат’ янганя похотато’ нгацекы сайнолвахад нгахаку’ нгэ-дара тара. Хуан тарем ма:

— Нисями теневавы тенева-ни’ни хэвхана мэван харвадм, нгобкарт яля нгатебто’ сава нгэнггу.

Хой мадхана пи’ часовой нгоб’ тёрей’:

— Нуя! Хибя минга?

— Мань Хуан Торнадам.

— Хибя нянанд минга?

— Фашист’ тэмбаравы’ палытана’. Нёвэ’, штабан сидна’ хана’. Мань палытани иле хае ваторадамзэ.



Нгавнанда нгарка хибядарев' сайнолва- хана сайнорць пир'маханда командирмда пунрабтаван харвавы. Нгули' тас яля ямбан фашист' няюд сайнорти' мэсь ям талабтамб- вэда. Пи' хою' няю' вацодолвы'. Таняна хунанда фашист' саюв' еранггулван тэвы'. Янамбоковна лаханани' муно намда.

— Ханзер' нгамгэ фашист' тэмбара'ма сайнормахад хэб' сава нгэбта?

Тарця вадахана Хуан лынггарё'ма яхаданда тарпы'.

Манзь ханада:

— Сидда' рабочий' нянгы хэван хана- хадм.

Палытана' юндаалыд':

— Пыдра' няюнанда' нгамгэ нгацекы' сайнорнга'?

Тикы яхана сайнолван ерева'мамда ваде'- нга.

Палытана' ма':

— Тад сит штабхана' ханаб'нана'?

— Янгго, тая' хэвани екававна хахадм.

Палытана' харто' тунидо' Хуанан ми'ий- до'. Туни мине лэды выенгга. Тарем палытани рабочийха' тэврайда.

Вопрос':

1. Нюдяко Хуан ханзер' сайнолван еремя?
2. Хуаннгэ сайнолвахана таравамбир нгэвамда ханзер' манэ'лабтада?

Хасан то хэвхана.

Восток няна ян СССР граница хэвхана Хасан то нга. Хасан то вархана Заозерной, Безымянной седаха' танянгаха'. Японской самурай' тикы седаха' ня'ма



идеяд'. Тикы пирця седина' маня' яна' няю' енермандо' е'эмня таралгъяд'ма. 1938 по июль 29 яляхана японской отряд границава' мада пограничникха'на' теба'.

Ненэвна сайнолыд'. Японец' хурка сян мэвамбирувна толырто' нямна нгока' нгэбто'

нго' пинва техэ пограничникна' ява' герой-
нгэ нгэдабидонзь. Пограничникна' японец
пулеметха'на, штыкха'на, гранатаха'на янг-
гумдамбидонзь. Японец' пограничникна'
ханзеркарт нгосорць я'мыдонзь. Тикавахана
нгокавна саюв нензла'.

Нгокавна саювдо' хадарабтахавана японец'
седи мэйдо'.

Японской самурай' Советской я ниня
пон ниць мэ'.

Пыдо' екандо' героической Няръяна
Армияна' часть' пядо'. Маня' артиллериява'
енелы'. Тю'умна юде' мянлад аэропланна'
минга'. Враг' мэсь ям бомбаха'на няиба
пядо'. Японской самурай' ханяри лынгга-
рабто' нгод янда'на бомбаха', пулькаха'
тебернга'. Пендерта бомбахат я тарворнга.
Ти', танк' пядо'. Лозунгсавэй „Сталин
е'эмня!“ „СССР е'эмня!“ пехота нерня'
пяда. Японец' хурка мадарман харвавы'
нгэбто' нго' Няръяна Армияна' тебвам нидо'
ла'амда'.

Японской самурай' няялмы'. Советской
я нид пидевы'.

Седи' ни' нгани Няръяна знамя илы'.

Японец' ядонгганзу' сайнормахана Ра-
боче-Крестьянской Няръяна Армияна' боец',
командир' героической серо серта'. Нгока
боецм, командирм Советской правительство
орденхана награди.

Коник танкист.

Няръяна Армияна' танк' сайнорць пэяд'. Японец' енелыд'. Японец' енерма танк тянёхортувна нида таб'ла'.

Маня' танк'на' енелаванзер' японец' флагто' пеля', пулеметто' пеля', пушкато' пеля' тю'умна тилыд'.

Хов, младший командир Коник минрена танк нерня' нгэхэда. Японец' окопха' тэри пэригада.

— Коник, мер', мер'! — командирда тёрена. Тикы' ямбхана Коник танк тэри нерня' мирна. Ти мале враг окоп'. Пехотам тэри няялпида. Танк санаванда сер' враг пулеметм няярта. Тикахад хэванда проволока ёбт'мам ныдпа пя. Няръяна Армия хэбцям нганамхамдамби.

Коник нява' сырцянгганда сылы'. Тарем сырпата тюндко тяхад нерданда самурай нялода. Нгуда'нанда граната сярувм ня'амби. Коник вуни' лыдабтара'. Танкмда пуданакханда мерхаледа, танкда тю'умна хая. Японец гранатада мо яноларай'. Сангговота машина та няяртада.

— Коник, мер', мер'! — команда сул'ый'. Тарця вадахана японец няялпа нгэхэдалы'.

Гальянов пулеметчик.

Нгоб' окоп хэвхана японской снаряд пенды'. Пендна снаряд Гальяновм мерёледа. Пенднгэ тин'мана са'мы нгани Гальяновм окоп мюд хэвня' лабхалмэда. Пинва техэ Гальянов пёд'мамда ямда вунида хае'. Едямда ебтаба нгани пуны' окопан нялода хая. Тикавахана Левченко командирхандо' тунимда табадамбада японской снайперм манэ'нга. Гальянов пулеметханда санай', пинва техэ командирнда илм нгдаванзъ пулеметда пидналтъй'. Японской снайперм хадада. Гальянов нгани сырнга. Японец' танк'манана' енермандо' е'эмня пушкам нэкалнга'. Гальянов пулеметхаданда пидналтада. Враг артиллерист янггумдайда. Нгаво' пиркана няби снайпер красноармеецна' яебтамба пяйда. Гальянов тикы снайперм янггумда идей'. Снайпернгэ нгули' сававна таклавы. Манэ'ма серта янггу. Таня нгадьбата нга'на японской мэйра'ма' та'альцюна пendarтавы танк ну.

— Самурайнгэ хуна нгамдэбата? — Гальянов ихинянда ман'ма. — Нуя, сит сероць мэнггудм.

Штык ни' савам серибте. Янамбоковна илба пяда. Окоп мюд нгодь' красноармейской сава нгадиманзер' пendarтавы танк нгылад ту ялкабтай'. Пулькангэ красноармеец саван нгуркада. Ти тарем японской

снайперм манэ'нгада. Манэса'махаваданда
Гальянов японской снайперм та янгулдада.

Красноармеец Гальянов — комсомолхана
мэна. Хасан то хэвхана сайнормахана юр-
кад вата самурайм хада.

Злой Матвей комиссар.

Злой Матвей летчик тю'уд японец мар-
дамбвыда.

Хадаравы японец' советской я нид ху-
ныд'. Август 8 яляхана ху' собрание минга.
Экскадрилья комиссар Злой Матвей японец'
хынулдавам ваде'нга.

— Враг серо'нга, хамадэб'нана' тара, —
комиссар манзь ханада.

— Нись сяй' врагм марданггува', — лет-
чик' ма'.

Собрание ёльцей'. Грузовик ни' баянист'
танаяд'. Летчик' концертан инзеле'.

Лэркабт нув' няюна хонаркобць ракета
есамъй'. Летчик' аэропланхато' сюрбыд'.

Няхар' минута нгэсонггавана няхар'
аэроплан тю'у' пенадаяд'. Граница няю'
тидхаледо'. Нгопой аэроплан ниня Злой
Матвей ти.

Аэроплан' табадавы ян тэвыд'. Нгылэндо'
няна еся сехэры'. Еся сехэрым японец'
сертавэдо'. Еся сехэрэвна едэй саюв таванзь
мэ'. Хамадэ саювсавай сидя поезд ну. Па-
ровозхат якэри монггэ. Советской летчик'

ханавэдрем' таси' нгэхэдалыд'. Злой Матвей паровоз'мана тумда нянггарнга.

Японской палытана', офицер' вагон мюд пин санаяд'. Яндаха' тэри сюрби'. Маня' летчикна' тью'уд тэри едпидо'.

Табадлярнгэ сертавы. Аэроплан' харто' аэродромхандо' пядо'. Седи' тью'укумна пены'. Красноармеец' пеи пейдемби'. Тарця мание летчикна' аэропландо' хаця хамба-лабтабидо'.

Злой Матвей комиссар аэропланмда нерня' ена минреда. Таси' сырць тэри ва-нерабты.

Родинава'.

Маня' яханана' капиталист' янггу', помещик' янггу', кулак' янггу'. Тарем харахана маня' яханана' буржуазной ё' тотрев' рабочий, крестьянин эксплоатируйбада класс' янггу'. Капиталистической яха'на трудящийся' есям, пэ ята'мам, нефтьм, машина, хуты, паны, няньм, нгавона нгаво нгокавна сертана яхана капиталист', помещик' тамна сатакувна саваилелтаныд'. Таняна рабочий', крестьянин' невхэндө' сер' нгаворцявандо' хавна манггбалтаныд', по'на илебцадо' вомдана.

Совет яхана рабочий', крестьянин' есям, машинам, хлопокм, ленм, няньм, нгавона тэнзм, нгани хуркари тэнз мире нгокаркавна

сертана яхана тамна сатакувна ява' сава-
илелтаны', мэбертана, трудящийся' илндо'
сатакувна саваиленаркангэ хантана.

Капиталист', помещик' эксплоатацияхад
СССР рабочий', крестьянин' нгуйва' маха-
дандо' харто' илебцамдо' харто' сертабидо'.
Яля илебцамдо', маймбада илебцамдо', яб-
дана илебцамдо' харто' сертабидо'.

Богатой', манггбада' янггода общество
е'эмня, пинденггоди', пиндебади' янггода
общество е'эмня, ерво', недватна раб' янг-
года общество е'эмня нгока юр' по' сава
хиби' ибедо' ядэрнгаць, пёдаць. Тикы е'эмня
яндир' ний трудящийся' масса' пёдаць. Вала-
када маня' яханана' трудящийся' масса'
нга'и ибето' ядэра'ма талей' — социализм
сертавы.

СССР — яндир' ниня нюртей социализм
вадува'ма я.



КНИГАНДЕР.

	Стр.		Стр.
Едэй книга	3	Электро	35
Водопьянов летчик ваде'мы	4	Трактор' станцияхад турта мядонда' . . .	37
Ямда иле	6	Невхэна	38
Мани' нго' няданггуни'	7	Парэнгода мальнггана заводхана манзара'- мава'	41
Баразби пионер	8	Владимир Ильич Ленин	42
Хэ' сарё	10	Ленин врагхат лынг- гарё'ма	49
Лев сармик, няби тё- някоця	12	Иосиф Виссарионович Сталин	52
Ниня пинана	13	Революция нерцюна Сталин няна' ман- зара'ма	56
Тёняко, нюняко	15	Сталинской Конститу- ция	58
Хасьда Икця	16	Тюку яля сыра'мамд ху- няна нир тумданггу'	59
Ёрма	18	Артек теда' маня' е'эйва'	61
Падта'мавна рассказм сертада'	21	Михаил Иванович Ка- линин илннгад	64
Еня	22	Армиян хамы	67
Сад	23	Красноармеец юн па- дар'	69
Нгадыхы пя малик . . .	24	Хамадыва'	70
Мичурин садхана . . .	26		
Пахакэцидо' екар тара', маликэцидо' екар тара'	29		
Писякоця, синзевкоця	30		
Тюку падта'мавна рас- сказм сертада'	32		
Лымбад нго'ма	33		

	Стр.
Няръяна Армия	71
Няръяна Армия мир- хана сямьхат мэ- бета армия	72
Ворошилов вэдарнга	73
Казбек	76
Николай Щорс	78
Нюдяко чапаевец	81
Красноармеец ваде'мы	84
Няръяна Мар'	86
Маня' ява'	87
Еся сехэры	88
Нгарка я еся сехэры	89
Сую	91
Хорецако, няби пися- коця	93
Нин тэмбаранггу'	96
Хибяри' тирць тохо'ма	98
Тю'уна манзарана'	100
Челюскинец'	101
Нгамдарма нимня аэро- план нгадимя	106
Сохахад аэропланан	107
Папанин мядонда'	109
Валерий Чкалов	111
Алексей Стаханов	115
Няхар' герой не	117
Карацупа пограничник	121
Границам лэтбада Дин- го	123
Пионер' шишонм ня'ма пограничник няда'	125
Сармик'	126
Ниня пинана нява	128
Парюд ябтокоця	132

	Стр.
Нгавка	134
Тигр нюкця	136
Сёхо'мяко	138
Лаханакком падта'мав- нанда ваде'нгара'	142
Нямдода мирвета ко- рова	143
Пидяхананда нгамдэда лэ'морэця	145
Пёдва	147
Акула	149
Беркут лимбя	153
Беркутня ханева	155
Лэ'мор'	157
Нганзер' нгэда ханико	158
Евако Ёнко	160
Нгацекы мирдапава	165
Жуков Иванко	167
Нэвы сехэры	169
Революционер Таня	171
Пари юн падар'	173
Радиом мэнена	174
Кыс Мария	176
Нгоб' узбек не иле'ма	178
Няръяна Знамя орденом мэта	179
Нюртей юн пэдарахад то	180
Пэдара иленяко'	181
Тюку падта'мавна рас- сказм сертада'	182
Тиртя' тобць' синё	183
Икад хунмби'	184
Нгани юн пэдарахад то	185

	Стр.		Стр.
Танго'лавахана' ямда-		Няръяна знамя . . .	200
яна'	186	Нюртей май яля . . .	203
Пилю'	187	Гарри Айзман	204
Обязательствони	189	Тиб пионер	205
Тямдэнгэ хэва	—	Нябинзер' нгэсь я'ма	207
Пыя ямб Комар Кома-		Испания нюдяко ге-	
рович, няби тэва		рой	209
хэм' тар' ёря Мишка	191	Хасан то хэвхана	211
Та'	195	Коник танкист	213
Пэдарам тисьде тара	196	Гальянов пулеметчик	214
Пэдарахана	197	Злой Матвей комис-	
Парэнгода мальнггы		сар	215
Нюртей май яля	198	Родинава'	216

Ответственный редактор *Н. А. Макаев.*

Технический редактор *А. И. Тосс.*

Корректор *Н. Н. Васильева.*

Обложка художника *В. М. Фирсовой.*

Художники: *Г. А. Травин, А. И. Козлов, А. М. Блохин, А. Л. Карасик.*

Сдано в набор 31/V-1939 г.

Подписано к печати 21/VII 1939 г.

У-12.

Учпедгиз № 10472.

Заказ № 2105.

Тираж 5000 экз.

Формат бумаги 60×92 см.

Печ. лист. 134.

Уч.-авт. листов 14,47.

Бум. листов 6¹/₈


Тип. зн. в 1 бум. листе 40670.

Леноблгорлит № 3794.

Бумага Окуловской фабрики.

Типография „Коминтерн“, Ленинград, Красная Ул.

Книг. № 51



Стр.

200

203

204

205

207

209

211

213

214

215

216

Тосс.

10472.


134.

40670.

брани.

12. 4. 1. 0





1 р. 50 к.

Нен.
Н 3-9
26166



А. П. ПЫРЯ, Н. М. ТЕРЕЩЕНКО

Книга для чтения, ч. II, на ненецком языке